

Борьба кудзыл



7.2019

Изьва. «Луд» гаж



Снимокъясъс Алексей Полугрудовлѳн.

ПЕТӢ 1926 ВОСЯНЬ

ЛЭДЗӢНЫ: КОМИ РЕСПУБЛИКАСА ЮРАЛЫСЬЛӢН АДМИНИСТРАЦИЯ,
КОМИ РЕСПУБЛИКАСА ГИЖЫСЬ КОТЫР

ВОЙВЫВ КОДЗУВ



ISSN 0134-4323

БЫД ТӢЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

7 (871) СОРА (ИЮЛЬ) 2019

ТАЙӢ НОМЕРЫН:

Ольга БАЖЕНОВА. Кытї некор на эг ветлы...	
Кывбурьяс	3
Алексей ПОПОВ. ОлӢм войтгьяс	7
Ксения КАРМАНОВА. МукӢд муӢ ветлӢм бӢрся.	
Кывбурьяс	20
Аркадий МИШИН. Из вылӢ из. Роман	22

И.А. КУРАТОВЛЫ 180 ВО ТЫРИГКЕЖЛӢ

Диана ХОЛОПОВА. «БытгӢ ачыс Иван Куратов мычӢ пырысьлы асьыс ки...»	56
Альберт ВАНЕЕВ. Коми поэт Иван Куратов да Пишпе- кын медводдза кыргыз школа восьтӢм	66
Иван КУРАТОВ. Коми бал. Кывбурьяс	71

12+

Обложка вылын: Изьва. «Луд» гаж.
Снимокыс Алексей ПолугрудовлӢн.

© «Войвыв кодзув» («Северная звезда»), 2019 г.

СЫКТЫВКАР

СЕВЕРНАЯ ЗВЕЗДА



*Ежемесячный
литературно-художественный
журнал*



Учредители:

АДМИНИСТРАЦИЯ ГЛАВЫ РЕСПУБЛИКИ КОМИ

**«СОЮЗ ПИСАТЕЛЕЙ РЕСПУБЛИКИ КОМИ» - РЕГИОНАЛЬНОЕ
ОТДЕЛЕНИЕ ОБЩЕРОССИЙСКОЙ ОБЩЕСТВЕННОЙ ОРГАНИЗАЦИИ
«СОЮЗ ПИСАТЕЛЕЙ РОССИИ»**



Издатель:

АУ РК «ИЗДАТЕЛЬСКИЙ ДОМ КОМИ»

ДИРЕКТОР ОРЁЛ И.Н.



РЕДАКЦИОННАЯ КОЛЛЕГИЯ:

Главный редактор

ПОЛУТРУДОВ А.В.

Ответственный
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.



Ольга БАЖЕНОВА



Кыті некор на некод эз ветлы...

КЫВБУРЪЯС

Гижтөм кывбур

Көні кодзулыс мичсьыс джөмдө,
Ыджыд Из йылын, вылын-вылын,
Тэныд кевмысьны коми кылөн
И не аддзывны тэнö, не тöдны.

Юмов сьыланысь, ошкан везйись,
Гудыр шоныдысь ылö-ылö!
Медым славаыс көнкö сьылö:
Меным чунькытш ни юркытш оз көсьысь.

Пöся эска ме ина вöтлы,—
Чизыр төвъяслы паныд петысь —
Корсьны кок туйтö тэнсьыд сэтысь,
Кыті некор на некод эз ветлы.

Öввö

Югъялö му вылын саридзлөн солыс,
Кылалö зэв ылö шондінас лун.
Идөг моз небыда матыстчö войыс,
Узь, менам Шондикöй! Синуктö кунь!
Саридзыс — гыяснас,
Төвруыс — шыяснас,
Пуясыс — увъяснас,
Упкөмөн — сюзь!
А ме тэныд —
Вом дорөн,
Олөмөн,
Помтөмөн
Вашкöда пеляд:
«Мусанюшка, узь!»

Зарни Ань

Пемыд горсйын узыö Зарни Ань.
Шебралöма мелiа да кужöмөн.
Ортсы кадыс, си моз, ньöжйö нюжалö,
Си моз сийö орыштöма тан.

Зарни сикöтш — сийöсалöм вöт:
Оз лысьт синва войтөн весиг усьыштны.
Водтöдлiсны недыр кежлö узыыштны,
Кадыс орис — узысысыс эз пöт.

Вöталö, кыз öшкамöшка рöм
Тулан куөн плавгысьöма мыш вылас,
Кызди зонка гортсыс гусьөн пышйылö,
Козьнавны мед Аньлы — зарни сьöм.

Кöдзыд кымöс, окавлытöм бан,
Лов шы руыс вом дорыс оз вазыышты.
Сöмын зарни сьöлöм кöсийö казыышты,
Кызди вöли сийö коркö — ловъя ань...

* * *

Ме пола ачым от тöд мыйысь,
Кор тöдтöм вылнаяссö кыла.
А ёртöй — жыннiанъясөн сьылысь,
А ёртöй — тöвруа да гыа.

Ме муна олан постi гусьөн:
Кыв джынйысь векни поскыд орлö.
А ёртöй улын поскыс усьлö,
Но йитчö жыннiанъяслөн горөн...

* * *

Эз тöлыс ота виддзысь лок,
Эз тöлыс дзоридзьяссö гычöд...
А кытчö тöлалöма шог,
Да курыд нюмöй тöвзис кытчö?

Кузь тöвнас бушков, скөр да дзор,
Сигудök-лөлöс чашйис-жвычкис...
А öнi лолысь петö гор,
И сияс йитчöмаöсь кызкö.

Эз тöлыс ота виддзысь лок:
Тэ локтiн тöвруөн. И ола.
Ме тэкöд лои ворсысь лола,
Ме, йökтысь дзоридзьяса от...

* * *

Рөдтi небөгтi төла вөлөн.
Юи шыяссө кывбур шорсьыс.
Эг и төдлы, а вөлөм... Вөлөм,
Менам муслунөй тэнө корсьө.

Висьта видзьястi надзөн-надзөн...
Мыла сьылана гыяс пөлөн...
Мойданкывйын моз джөмдiс вөлөй:
Менам муслунөй тэнө аддзис!

Пывсим-пасьтасим, кызди колө,
Пельсьыс петiм да: томсьыс-томось!
Сийө лунсяньыс
Нэмъяс помөдз
Менам муслунөй тэкөд олө.

* * *

Ме тэнө новлөдла век сьöрысь —
Тадз енэж шондiсö век новлө.
Ки визьтö аддза корьяс серысь,
А көрыд — дзоридз көрөн волө.
А лымйыс — кучик кодьыд сөстөм,
А биыс — синва кодьыд сола.
Ме танi эськө, а тэ — эстөн,
Но сьөлөм пыдди
Тэнө новла.

* * *

Тэнад эмось мелi кывьяс —
Морөс тыр!
Меным олөм вылө тырмас
Дырсьыс-дыр!
Йөзлы олөм вылас тырмас —
Быттьö ю...
Тэнад эмось! Тырыс! Тырыс!
Шу мен, шу!

* * *

Менө некод на
 тэ моз эз окавлы:
Öти синукөс окыштан,
 мөдсө...
Медым лөк вөтъяс
 некор оз локтавны,
Мед эг аддзыв ме
 войшөрсa сьөдсө.
Медым бөрьяөн —
 лөньюдысь вом дорыд —

Югьд лунсянныс
 небыдик юөр.
Сэтшөм колана
 лелькуйтөм-дорйөмыд —
Олөм вой пырыс
 вуджодысь югөр.

* * *

Ичөтик перна, ичөтик перна
Мусалы веськыда сьолөмысь перъя.
Визувъяс вомөн,
Войтыръяс вомөн —
Сы мында вуджлөма уна сюрс воён!

Уна сюрс во менө пернаой видзис —
Лов рөдысь ёртъястө видзлөны сідзи.
Ичөтик перна, ичөтик перна —
Ставыс, мый козьнавны тэныд ме верма.

* * *

Ме тэнө төдмала. Эн пов.
И сюрс, и миллионъяс лыдысь.
Тадз ловсө аддзө чужан лов
Көть кутшөм ылысь,
Кутшөм пыдысь...
Тадз локтө чужан тыас юсь,
Тадз сьомга локтө
Чужан юас...
Мед туйыс овлө вывті кузь,
Ме локта.
Кызиджык?
Эн юась...

* * *

Мортыс нинөм ыджыдсө эз вөч,
Мамыс весиг нинөмсө эз казяв.
Прөста сылөн мөвпыс — ёна стөч:
Дзугөм кывъя гөрөдъяссө разьё.

Гөрөд разьсис, воссис паськыд эрд,
Мортсянь мортлы восьтөмторйыс тырмө...
Некоді эз кывлы ни эз төд,
Кызди мортыс коркө гижис
Кывбур.

❖ ❖ ❖

Олём войтъяс

Отувъя пöрт

Дас арöса Ваня Микушев пукаліс бипур дорын да ставкөд тшöтш виччысис шыд пузьöмсö. Гожся шондiыс вошис кымöр сайö, да сынöдыс вежсьыштiс. Эз ло сэтшöм пöдтана. Ваня мукöд зонкаяскöд тшöтш пажынöдз кыскаліс зорöд дорö турун юръяс. Сэсся вöвъяссö шойчöдны лэдзöм бöрын матыстчисны бипур дорö, көні шыдсö пуис налөн сиктысь медся варов мортыс — Катя Петя. Коркö кодкö шулöма, мый Петялөн пö сöмын гөлöсыс юралö, а нинöм бура вöчны оз путымы. Со и чöвтны весиг мужикъяс ас дорас эз босьтны. Индiсны пусыны. Медым шыдыс вöлі нуръяджык — öтувъя овмöссиянь вичмöдiсны вель ыджыд яй тор. Сылөн чöскыд көрыс локтiс öнi пöртсянь, да Ваня Микушев-лөн весиг морöс улыс гияльны мöдiс. Тшыгъялöма нин да.

Коркö сэсся шыдыд пусис жö. Катя Петя босьтiс вель ыджыд дар да кутiс пуктавны нюжöдöм тасьтiясö. Но медводз видзöдлас, кодi чургöдöма дозмуксö, да сэсся сöмын сэк сюяс дарсö пöртъяс. Рöдня кодъ кө тасьтiсö нюжöдöма — шедöдас дарнас вель ыджыд яй шмак да чöвтас. Миш Васькöд со неважөн на мыйыскö венö волiсны. Мортыдлы куш ваыс и вичмис. Ваня Микушевлы, абу некытiсянь рöд да, кизьöрсö жö вичмöдiс.

Сэксянь тайö серпасыс некыдзи оз вушйы Иван Сергеевич вежöрысь. Мыйла тадзи олöмас артмö: код кийн сёян разöдан дарйыс — сийö и быттö медся ыджыдыс. Öд сэкинас öтувъя овмöссияныс яйсö вичмöдiсны став вылас. А Катя Петя быттö ассьыс юклiс. Сы кийн дарйыс вöлі да. Киясаныс дар кутысьяс-тö Иван Сергеевич олöмас унаöс аддзывлiс. Со, шуам, кантораныс, көні сийö уджалö. Сьöм юкан «дарйыс» веськöдлысь кийн. Көть эськö сьöмсö ставныслы вылö вичмöдiсны, но юклö ас ногыс. Нювсьысьяслы вермас унджык сетыштны. Премируйтас таысь. Кывзысьысьясöс оз жö дзерöд. А лыстан кө мыйкö паныд шуны, то «дар» пыдöсас тöлысь мысти сьöмтö пуктыштас. Быттö казнаыс эськö и öтувъя, но юклысьыс, веськöдлысьыс, сэтшöм жö, кутшöм вöлі уна во сайын яя шыд пуысь Катя Петя.

Нимкодълун

Варялы сизим арöс вöлі. Школаö арнас мунiс. Гожöмнад карад, ок, гажтöм, оз вермы пöчыс дорын моз ывлатi котравны. Гөгöр машина журъялö. Гортын овны абу жö кокни, пöдтö пöжсьöм сынöдыс. Нимкодъ лои, кор батгыс патераас пыригмоз юöртiс: ветлам пö вай менам ылысса рöдвуж дорö нимлун сёйны. Варялы лои зэв нимкодъ.

Нимлуныс вöлöма ськöд жö тшöтшъя кодъ нывкалөн. А пызан вылас мыйыс сöмын эз вöв! Татшöм сёяныс налөн гортын

эз мыччысьлы. Батыс мырсис кутшөмкө удж вылын, көні сьом-сө этшаник мынтылісны. Та вылө тай ыстысьліс-а. Варя азыма уськөдчис тепйыны кутшөмкө чөскыд вотос. Абу жө татчөс, көнкө лунвылын быдмө. Сылысь тэрыба сөйөмсө казялөм бөрын батыс вашнитіс:

— Гашкө, тырмас да.

— Чөскыд да,— вочавидзис нывка.

Сэссия гырысьяс ассыныс сөрни панісны. Варя нимлунасьысь нывкакөд пырисны торъя жырийө. Тайө пө менам, ошйысьыштіс нывкаыд. Кутшөм чачө сөмын сэні эз вөв! Мичасьыс-мича аканьяс, ичөтик крөватьяс, тэчөм керкаяс... Варялөн синмыс паськаліс. Бергөдчис да казяліс, мый өдзөс дорын сулалөны батыс да нимлунасьысьлөн айыс. Варялөн батыс, мыйлакө, кельдөдыштіс, тыдалө, ныв водзас яндзим лоис, мый оз вермы татшөмсө Варяыслы лөсьөдны. А нывкаыслөн айыс ошйысьыштіскодь:

— Челядь ради өд и олам. Мед налөн ставыс вөлі. Сідз өд?

— Сідз эськө да,— нурбыльтыштіс Варялөн батыс.

Пөттөдзыс ворсіс сэк Варя аддзывлытөм чачөяснас. Ок, эськө гортас кө татшөмыс вөлі!

Колины вояс. Варя нин дасөд классө ветлөдлө. Сэкса нимлунасьысь нывкакөд өти школаын велөдчөны. Урокьяс бөрын өтлаын и гортаныс мунөны. Варя гортас пырөм бөрын аддзис батысө, коді мудз чужөма пукаліс да сөйис. Удж вывсьыс сөмын на локтөма. Нывсө аддзөм бөрын шудаа вашмуніс. Варялөн топавліс морөс улыс. Сэтшөм мусаөн да донаөн кажитчис сылы батыс да. И мыйлакө, лои зэв жаль нывъертис, сэкса нимлунасьысь нывкаыс. Сійөс айыс гортас оз виччысь. Во-мөд сайын дзескыдінө йөртісны да. Быттьө эськө сылөн ставыс гортас эм, мый Варялөн абу, но тайө мортыдлы вывті на этша.

Юрлөс вылө пуктантор

Педөр Микулай кымын водзө оліс, сымын броткысьджык кутіс лоны. Но бөръя каднас торйөн нин няргис сы вылө, мый вель уна во уджаліс, а некутшөм медаль да орден таысь эз сетны. Код төдас мыйла тайө ётшкис мортыслы.

— Кула да весиг юрлөс вылө нинөм пуктынысө лоө,— унаысь шуасьліс Педөр Микулай.

Дерт, кувны эз на дасьтысь, но мыйлакө син водзас сувтөдліс серпас, кыдзи сійөс гортйын петкөдөны. И мыйлакө ковмөма, медым горт водзвылас кодкө юрлөс вылын нуис орден либө көть нин медаль. Кинояс вылысь татшөмсө аддзыліс да со юр вемас сатшөма. Көть эськө кулөм бөрад мортыдлы ставыс нин веськодь. Но абу Педөр Микулайы.

И со ёртъясыс мөвпыштісны мездыны сійөс татшөм майшасьөмсьыс. Сөрнитчисны, мый нельөн, дерт, на пиын лоас и Педөр Микулай, лэчасны ю дорө купайтчыны. Отилы колө вөчны сідз, мый быттьө вөйны кутөма. Мөд босьтчас ыстысьны, мый варччынысө оз куж. Коймөдыс лөк сьолөм вылө норасяс. Ковмас бытён Педөр Микулайы уськөдчыны отсөг вылад. Тадзи өд и вөчисны. Микулай мездіс вөйысь ёртсө, коді збыльвылас кө, вермас юсө дасысь өтарө-мөдарө шойччытөг вуджавлыны.

Ёна и аттьоалсны ёртъясыс Педөр Микулайос да шуисны гижны сылөн вочомтор йылысь кутшомкө чина йозлы. И гижисны. Кад кольом мысти Педөр Микулайлы веськыда удж вылас моросас пысалсны медаль, кодос сетлоны вейысь мортос мездомысь. Татшом шуданас Микулайос ёртъясыс некор на эз аддзывны. Соптыс мортсылөн потіс. Оні сылөн лои юрлос выло пуктантор.

Каитчөм

Нелямын арөслань матыстчысь Олексан Габовос корисны нимлун сейны. Отлаын уджалысь томиник нывлөн чужанлуныс, да мөвпыштөма пасйыны ас патераас. Олексан тодіс, мый том войтыр чукормасны да босьтчыліс пыксыны. Но томъяс эскөдісны, мый сытөг лоас гажтөм. Тэ пө сямман ставныслысь серамсө петкөдыны, да рытыс кокныдджыка мунас. Татшом ошкөмсьыд нө кыз он сылітө нюждөдөмөн юртө кыпөд. Ас улас на мөвпыштис, мый вермас гажмыны, да гөтырыс пинялас. Та вөсна звөнитліс да ыстысис, мый мөдөдчө войколөн ылісса сиктө. Сэсся өд көнкө узяс. Ёртъясас ли, гашкө, кодкө гажмыштөм нывъяс пөвстас на сюрас сы выло ыштысь. Колөкө, гортөдыс на нуас да узыны кольодас.

Нимлуныс муніс кыпыда. Чужан лун пасйысылөн воөма кутшомкө рөдвуж, да сійө ставсө зэв бура дасьтөма. Ачыс ставныскөд жө пукаліс. Зэв визув нывбаба. Олексанысь, гашкө, вөмөдөн сөмын и ыджыдджык. Олексан вель ёна гажмис. Но нывъясыд, көть и гижисны сылөн быд шуөм выло, эз ыштыны. Ставныс тай вочасөн кытчөкө муналісны-а. Весиг нимлун пасйысыс кытчөкө воши. Колины сөмын Олексан да нывбабаыд. Вель дыр на пызан сайын пукалісны да сералісны. Сэсся өд узьтөг он ов. Нывбаба Олексанлы вольсалис диван выло, а ачыс кроватын узьмөдчыны лөсьөдчис. Водөм бөрас мужичөйлөн кывйыс водзө разьсис, сөмын печласьө. Нывбабаыдлы, тыдалө, эз жө узьсы. Медбөрын Олексан шуис жө юрас гартчысь мөвпсө.

— Гашкө, ме дорө локтан? Пельөй сьөктіс да висьталөмтө ог кыв.

— Ог. Менам өд верос эм. Төдмалас да джагөдас,— серөктіс нывбаба.

— Каитчыны өд кутан,— шмонитыштіс Олексан.

Көсйис эськө и водзө на висьтавыны, мый эн жалит, кулан да номыръяс жө сөясны-а. Но эз жө лысьт горасө тайос шуны, дөзмас, гашкө. Сідзи өд и эз лок. Мужичөй эз жө сы дорө вудж. Асывнас юрыс эськө висис, но кольөдіс нывбабатө автобусөдз. Ачыс довгис удж вылас.

Коли, гашкө, дас кымын во. Олексанлөн тайө рытыс важөн нин юрсыс пыркаліс. Но отчыд воис камандировкаө ылі сиктө. Йөзкөд аддзысылыны, аския лун йылысь мыйкө висьтавыны. Сы йылысь, мый налөн сиктын регыд босьтчасны выль школа кыпөдны. Кор ставыс нин кутісны разөдчавны, Олексан дорө матыстчис олөма кодь нин нывбаба.

— Тэ мэнө помнитан?

— Ог.

— Сідзи и чайті,— ышловзис нывбаба.— Коркө важонкодъ нин ми нимлун отлаын сэйлім. Тэ сэки кольччин да диван ылын шкоргин.

— Оні уси тōд ылō. Кыдз нō ог помнит.

— А тэ, тыдалō, тун рōдысь петлōмыд,— жугыля вашмунліс нывбабаыд.

— Мыйла тадзи чайтан?

— А ме од збыльысь недыр мысти каитчыны куті, мый тэ дорад эг вуджав. Локті гортō, зумыш чужōма верōсōс аддзи и, пыр жō тэнад вашмунōм обликыд мыччысис. Сэксянь и век на каитча.

— Оз ков. Нинōм сэтшōмсō эн вошты,— шмонитыштіс Олексан.— Гашкō, и бур, мый ни тэ, ни ме сэкинад эг вуджōй. Вōлі кō мыйкō, то, гашкō, и казътылōмыс эз вōв. Мōдарō на, колōкō. Ота-мōдōс лēкōдīm.

— Гашкō да,— ышловзис нывбаба.— Но каитча тай со. Йōйыд.

И мōдōдчис петны ывлаō. Олексан эськō кōсйис вōтчывны да мыйкō такōданаōс шуны, но эз кут.

Яндысьысь би

Асья войнас сиктын ыпнитіс-ōзйис керка. Бур, мый водз казялісны да биыс эз слōймы чеччыштны мукōд стрōйба ылō. Сиктса став йōзыс воисны кусōдчыны. Но биыс сэтшōм азыма сэйис кос керъяссō, мый некыдзи оз вермыны лōньōдны. Орчча керкаын оліс зэв пōрысь пōль. Оз нин торъя вермы ветлōдлынысō. Но татшōм кадад сылы ошиньōд видзōдны абу мича. Кыдзкō-мыйкō пасътасис. Пельсаысь гумовтіс кōшōн ва. Кōсйис петны, но кōшыс вōлі сылы зэв нин сьōкыд. Мыніс кисьыс да уси джоджō. Пōль ветліс пызан дорō тшай юан кружкала. Сэсса сйōн гумовтіс васō. Дзōран кийс солькйōдліс пōшти пыдōсōдзыс. Кашкигтыр лэччис кильчōд да чушиктіс озяялысь керкалань. Койыштіс пыдōсас нин кольыштōм васō. Билы лои зэв яндзим да кусі.

Гōсьтлы ылō

Меным мойвиис быдмыны сэк, кор олōмыс эз на вывті кокни вōв. Торйōн нин сēян кузяыд. Медся чōскыдыс вōлі преник, кодōс ми весиг няньōн сэйлім. Сакар торъяс лыдōн жō тшай юигōн мамō мыччыліс. Ме весиг вōлі кōть нин отиōс зйя кольны, медым чукōртны вочасōн вель унаōс. Кōсйи кōть отчыд пōтмōн сйōн чōсмасьны. Но нельысь уна эз чукōрмыв, тэрыба сэйлі.

Отчыд ыджыдджык воккōд, мыйлакō, кыскасис гōбōчын. Гашкō, дзєбсясьōмысь ворсīm да. И немвиччысьтōг вок горōдіс:

— Олексей! Ме мыйкō аддзи!

Сйō киас кутіс важ дōраысь тубрастор. Ми полігтыр разим сйōс. И муртса эг йōймōй шудысла. Тубрасас гартыштōмаōсь паса некымын кампет, мукōд пōлōс чōскыдторъяс, весиг суктōм юмов йōв банка вōлі. Татшōмторсō ми сōмын ыджыд праздник дырйи видлім.

— Вай сёям,— вöзйи ме.

— Мамыд видас,— ышловзис вок да бөр пуктіс тубрассö.

Сэссия луннас некымынысь на вöлі гөбöчад пыралам. Дерт, сöмын тубрассö малыштам, босьтны сэтысь нинöм эг лысьтöй. Колöкö, мамöлөн ставыс сэні лыда да казялас.

Коркö ötчыд локтіс мянö зэв пöрысь пöч. Беддö пыксьöмөн, муöдзыс гөрбыльтчöмөн. Мамöлы сьлөн пырöмысь лои зэв нимкодь. Пуксьöдiс тшай юны. Сэссия пыралiс гөбöчö да вайис сэтысь тубрастö. Пукталiс чöскыдторъяссö пöч водзö. Дерт, эз жö ставсö. Ми пукалiм лабич вылын да видзöдiм, кыдзи пöчыс сёйö. Сэтшöм мисьтöмөн да мустöмөн кажитчис мянлы тайö пöрысь мортыс. Пиньыс абу — кампетсö сöмын чурскö-нёнялö. Суктöм юмов йöвсö ыджыд паньон гумовтö да дзöран кион паськыд вом дорас вайöдö.

— Атгö, Людмила, бура гöсьтитöдiн. Миян татшöмыс гортын абу.

Мамöлы таысь, видзöдам да, зэв любö лои. Водзö тшöктö чöсмасьны. Кор пöчыд мунiс, мамö бөр лэччöдiс кольыштöм чöскыдторсö гөбöчö. Но пыртöдзыс мянöс стрöжитiс:

— Эн лысьтöй тайöс разьны да сёйны. Тайöс гöсьтъяслы вылö лöсьöдöма.

Сэки ми воккöд ёна дузгöдчылiм мам вылö. Сöмын быдмöм бöрын кутi гөгөрвоны, мый коми войтырыдлы гöсьтыд зэв пыдди пуктана.

Козинъяс

Васька Миш лöсьöдчис гөтрасьны. Кабала вылö пасъялiс, кодъясöс корас кöлысь вылас да мöдöдчис на ордö. Медводз кежис вежань дорас. Кыв-мöдөн шыбитчöм бöрын висьталiс нимкодь юöрсö.

— Слабог!— вашмунiс вежаньыс.

— Кежав кöлысь вылас,— корис Васька Миш.

— Куш кион öд абу лöсьыд локны. Кутшöмкö козин ковмас лöсьöдны.

Васька Миш чöвтлiс видзöдлассö кабала вылас да шуис:

— Бур эськö вöлі, тшайник кö вайин.

— Вая. Мый нö ог вайыс?— нимкодь весиг лои вежаньыслы, мый оз нин ков юрсö жуглыны козин корсьöм кузяыс.

Тадзи кымын жö мунiс Васька Мишлөн сёрниыс и мукöд керкаясын, кытысь гöсьтъяссö виччысис. И быдöнлы урчитiс, кутшöм козин вайны. Сöмын сёр рытын тапсьöдiс бөр гортас да шудаа вашъялiс. Ыджыд удж лои вöчöма. А то водзвыв висьтавтöгыд ставöн öти пöлöс козинөн воасны. Кытчö сэссия найöс воштан? А öнi со ставыслы юкöма лои.

Мездлун

Эм абу му вылас морт, кодi эськö вöлі ставсьыс мездысьöма? Мед некодысь эз ков повны, кодянькö мыйкö виччысьны да сiдз водзö. Тайö мөвпыс бөръя кадас менö ёна нин йирис. Чужас мортыс, бөрддзас да, мамыс пыр жö вердны уськöдчас.

Бытгьö, мөвпыштан да, сэки тэ медся мезд мортыс. Няргыштан — вердасны, рузумтö вежасны. А оз кө? Көть семдытöдзыд омляв, некод кө оз видзöдды? Бара жö абу дзик мезд морт. Быдмыштан да бать-мамьддысь ковмö кывзысьны. Сэсся школаын на велöдысьыд туйдö, индалö, велöдö. И зэв сюся видзöдö, медым тэ кывзысин. Челядьдырйи кажитчыліс, мый гырысьяслы ставсö позьö вöчны. И телепит вöлі öдйöджык быдмыны. Со, мөвпалан, көні мездлуныс. А кор быдми, казялі, мый тэ вылын ыджыдыс да кесйöддысьыс помтöм-дортöм.

Со и шогся, мөвпала, көні да кор лоас мортыслөн дзик мездлуныс. Карын абу, удж вылын абу жö. Гортад гөтырыд. Оз эськö дивит да вид, но век, мыйлакö, мөвпавны лоö, мый он сы ног мыйкö вöч. И кузяөн аддзи жö, кытөн ме дзик мездмөм мортыс. Изьва районысь Сизяб сиктдорса куръя бокин. Сэні сөмын ачым ас вылын ыджыд. Пукала вугыр шатинөн, дзорга ва вылас. Кадысь кадö чөвтла видзöддасöс таблань. Веськодь, дэбодас али оз. Некод лов вылад оз öшав. Сё майбыр!

Шоглун

— Пöрысьман тай,— сизим арöса Саша да вит арöса Митя вылö мыжа видзöддассö чөвтіс ыджыд мамыс.— Мый сэсся вöчан? Ог нин со вермы да.

Детинкаяс нинөм эз шуны. Мый шуöма, ставсö нин шулісны.

— Со öд на шогыд. Он и тöдлы воас,— водзö ышлоаліс ыджыд мамыс.— Шуöй нин мыйкö. Эн сьölөмös поткөдöй.

Но детинкаяс водзö чөв олісны. Шогыс найös суис вежон сайын. Кувсис мамыс. Айсö найö эз тöдлыны. Сөмын Саша вуджөр моз помнитö. Мунлöма кытчökö да вошöма, абу аддзöма гортас бөр локтан туйсö. Тадзи тай мамыс шуліс-а.

— Ог, шуа, вермы нин ме тiянös видзны. Пöрысьми-и-и,— водзö лөвтіс ыджыд мамыс.— Эн дивитöй. Сэні мекöд олөм дорысь тiянлы лöсьыдджык лоас. Став дась вылад.

Пöрысь нывбаба ружтігтыр сувтіс да ветліс нöшта öтчыдысь видзöддыны ичөтик кык нопсö, кодös аскöдыс босьтны дасьтіс детинкаяслы. Аски асыв найös нуасны детдомö. Та вöсна со и дузгöдчöмаöсь. Мед нин көть бөрдісны ли мый. А со оз. Зумыш чужöмаöсь пукалöны.

Вель на дыр ыджыд мамыс дорйис асьсö, мый ковмö найös детдомö сетны. Тi пö сэтчö мунанныд, а менö регыд мысти индомö гургасны-нуасны. Водөм бöрас сэсся дыр ас улас элясис висьömьяс вылас. Регыд пö пес пыртны ог кут вермыны, кытысь нин кык зонкаös видзны. Коркö сэсся лөнис жö.

А Саша да Митя войбыд вашкөдчисны. Асывнас ыджыд мамсьыс водз чеччисны. Саша корсис вила, Митялы вылö дасьтіс пес поткөддан чер. Кыпöдіс найös пывсян вылö. Сэсся отсаліс кавшасьны сэтчö Митя воқыслы. Пуксисны да кутісны виччысьны. Коркö сэсся ыджыд мамыс петіс найös корсьны. Чайтіс, мый пышйисны кытчökö детинкаясыс. Весиг нимкодь лои, кор аддзис пывсян вывсьыс.

— Лэчöй. Сёйыштам. Регыд öд тiянла воасны. Ме тшыг кынөмөн тiянös ылі туйö ог мөдöд.

Эз ӧд и лэччыны. Нинӧм оз шуны. Пукалӧны, туй вылӧ дзоргӧны. Ыджыд мамыс на дорӧ кавшасьны, дерт, оз нин вермы. Коли сӧмын кевмысьны, мед лэччасны, йӧз водзас сійӧс эз янӧдны. Коркӧ сэсса ичӧтик машина мыччысис. Петісны сэтись кык нывбаба.

— Кӧнӧсь нӧ пӧчӧн шуысьясыд?— юасьӧны ыджыд мамыслысь.

— Со. Пывсян вылынӧсь.

— Лэччӧй. Миян кадыс абу. Мунны колӧ,— шыасис челядь дорӧ ӧтиыс. А мӧдыс весиг кӧсйис на дорӧ кавшасьны.

— Лысьтлы сӧмын матыстчыны. Бытшка!— киас босьтис виласӧ Саша.

— Коді вок дорӧ матыстчас, бур оз ло,— видліс кыпӧдны пес поткӧдлан черсӧ Митя.

Зонкаяслӧн кодзалісны синъясыс. Татшӧмъясыд бара бытшканы. Вель дыр кевмысисны, мед лэччасны. Сикт джынйыс нин налӧн керка дорӧ чукӧртчис. Кодкӧ лэччыны жӧ корӧ, кодкӧ чӧв олӧ. Но некод пывсян вылӧ кайны эз кут. Мужикъяс, дерт, эз повны бытшкӧмсыд. Но эз кутны кавшасьны, и ставыс. Сиктса нывбабаяс мыйкӧ ыджыд мамыслы висьгалісны. Мӧдыс сӧгласа гогйӧдліс юрнас. Сэсса челядьла локтӧм кык нывбабасӧ, мыйлакӧ, керка пытшкас пыртӧдіс. Код тӧдас, мый йылысь сӧрнитісны сәні. Бокысь воӧм аньяс тай петісны да машинаас пыр и сӧлісны. Сэсса мунісны.

— Лэччӧй нин,— шыасис детинкаяс дорӧ ыджыд мамыс.— Кыдзкӧ ӧд олам. Со сиктсаяс отсыштны кӧсйысисны и...

Ылысса вуж

Коркӧ гижлі нин, мый коми йӧзыд бура тӧдӧны ассыныс вужъяссӧ. Мукӧдыс вермасны лыддьӧдлыны вель кузь кӧленаӧдз. Ме та кузя ёнасӧ ошйысьны ог вермы. Бать кузя лоа Анна Иван Пиле Васька Ветшеслав Ӗлексейӧн. Миян ӧд пилӧн либӧ нывлӧн ним водзвылас век пуктивлӧны батыслысь нимсӧ. Иваныс, Пилеыс. Васькаыс да Ветшеславыс гӧгӧрвоана. Но кытысь Аннаыс мыччысис? Мыйла менсьым ылысса вужйӧс кутӧмаӧсь шуны Анна Иванӧн? Кӧні сылӧн айыс. Гашкӧ, чурка вӧлі? Айсӧ эз аддзыв. А ас грездсаяс мамыслысь нимсӧ сы водзӧ содтісны. Колӧкӧ, верӧсыс Аннаyslӧн водз кувсис да ачыс писӧ быдтіс. Вермас жӧ лоны, мый омӧль оласнога морт вӧлі да йӧзыс сылысь нимсӧ эз и суйны пи ним водзвылас? Мун да и тӧд сэсса ӧні. Но юрӧ самасьӧма тайӧ и ставыс. Ивансӧ ни Пилесӧ син водзӧ ог вермы сувтӧдны, а со Аннаыс тшӧкыда сувтлӧ. Быттӧ сулалӧ кутшӧмкӧ латшкӧс тушаа сьӧдіник нывбаба Джиян чой йылын да видзӧдӧ Висер ю кывтчӧслань. Сэсянь сійӧ вель ылӧдз тыдалӧ. Ростагъяӧн шусьӧ тайӧ местаыс. Сэсса юыс песовтчӧмӧн кежӧ да вошӧ син увсьыд. Мыйла сэтчӧ видзӧдӧ Аннаыс? Висьтавлӧны, мый Джиянас кодкӧ век вӧлӧм видзӧдӧ, мед чукыль сайсяныыс немвиччысьтӧг эз мыччысьны пыжаяс, кытчӧ тырыс сӧлӧмаӧсь тӧдтӧм мужичӧйяс. Локтӧны, мед мырддьявны татчӧс олысьяслысь эмбурсӧ. Либӧ пыртны джиянсаясӧс выль Енлы эскӧмӧ. Со и кыйӧдны кад воӧма Аннаыслы. Аддза сылысь синъяссӧ.

Найö повзёмаöсь мыйыскö. Тыдалö, локтысь йёзöс казялöма. Найöс, кодъяслөн пыжъясыс матыстчасны да сэнi локтысьясыс пазöдасны джиянсаяслысь лөня пуксьöм олöм-вылöмсö.

Сэсся Аннаыслөн чужöмыс вочасөн саймовтчö менам вежö-рын. И мыччысьö мöд коми нывбаба. Олöма нин, зэв жугыль синъяса. Кодi тайö нывбабаыс? Мыйла сылөн видзöдласыс и жугыль, и кевмысяна. Колöкö, Перымса Степаныдлөн мамыс тайö да? Корö писö, медем эз веж сылөн чужанiнас олысь войтырыслысь оласногсö... Коркö ёна важөн нин Коми муын олысь нывбабаясыс меным, мыйлакö, зэв донаöсь да мусаöсь. Та вöсна и сувтöны найö син водзö, а оз менам вужлөн мужик рöдыс.

Кадыс кольöма

Семён Иванович Козлов дыр кад уджалiс районса шöр сик-тын. Зэв сёлöм сертиыс вöлины сыкöд орччөн мырсысь войты-рыс. Дерт, эз кер былгьöддыны, а кабалаясөн ноксисны. Быд праздник öтлаын пасйылисны, быдөнлысь чужан лунсö паськыда жö сэйлисны. Гажа вöли. Дерт, уджыд удж на и эм. Корсюрö венö воывлисны. Дыр эз дузъявны, мöд асывнас нин öтлаын табак тшын апавны петавлисны.

Сэсся Семён Ивановичöс босьтисны уджавны юркарö. Танi мöдджык олöмыс. Кык морт кө бокын моз варовитöны, сiдзкö, кодöскö крукыштны дасьтысьöны. Куимөн кө чукöртчöмаöсь — мыйкö гудыртны көсийöны. Семён Иванович, сиктад быдмигөн да уджалiгөн, мый мөвпалö, сийöс и висьталö. И мыйлакö кантора-са медся чинаыс аскинас ставсö нин тöдö. Но сiдзсö эз жö вöв гажтöм. Петас калидорас да, ставыс нин тöдсаöсь, быдөнкöд позяс варовитыштны куритчигмоз.

А районса шöр сиктас медводдза кадас воывлис тшöкыда. Гажыс ставсыс бырлö да. Воас да, ставыс зэв нимкодъöсь лоöны. Петасны куритчан пельöсö да вель дыр варовитасны. Но кадыд тай öдйö лэбö. Во-мöд мысти воис да, öти пенсия вы-лö нин петöма, мöд нёрпалö да код тöдас дыр-ö нин овнысö ко-льöма. Дерт, жугыльтчылö таысь сёлöмыс Семён Ивановичлөн. Но мукöдыскöд дыр на варовитас. Бурмöм сёлöмөн карас лэч-час. Сэсся вочасөн важ тöдсаясыс кутiсны этшмыны и этшмыны. Но воыны эз дугды. Öтчыд во кык эз сяммы ветлынысö. Воис важ уджаланинас, кашкөмөн кайис выли судтаас. Сувтовкерис посводз сямаас, көни коркö артельён куритчисны. Кыскис тшы-насянторсö да öзтiс. Öдзöсöд петалисны да сы дортi мунлисны дзик тöдтöм йöз. Некод важ ёртъяс пöвстсыс нин тшын апавны эз мыччысь. Сэсся кык том ныв быльснитисны.

— Миян танi бокöвöйяслы куритчыны оз позь,— чорыд гөлö-сөн шуис öтиыс, кодi öзтiс вöсньыдик сигарет да азыма кыскыш-тiс тшынсö.

— Ме эськö абу бокöвöй да,— нурбыльтiс Семён Иванович.

— Весась ывлаас. Танi сöмын татчöс уджалысьяслы позьö тшынасьны,— скöра шуис мöд нылыс.

— Ме эськö коркö важөн танi уджавли да,— дорйысигмоз висьтасис Семён Иванович.

И кутіс лыддьѡдыны нимъяссѡ. Нывъяс веськодя кывзісны, тыдалѡ, некодѡс оз тѡдны да. Сэсся ѡд вѡтлісны ывлаѡдзыс. Эз, дерт, шошаѡдыс йѡткавны. Зэв гора чарзісны, да Семѣн Ивановичлы бытъѡн ковмис петны. Сьѡлѡм вылас лои зэв деливѡ. Быттъѡ мыйкѡ ыджыдтор олѡмас воштіс. Сэсся татчѡ воысь оз нин ло. Некод дорѡ да. Важыс ѡніѡдз сійѡс шонтыліс, сьѡлѡм сетліс. И со воштѡма лои важ олѡмсьыс тайѡ воывлѡмъяссѡ.

Та бѡрын кар кантораса олѡм вылас кутіс сюсьджыка видзѡдны да повзис весигтѡ. Ѳд дзик нин мѡд йѡз сѣні бергалѡны. Мукѡдсѡ весиг нимнас оз тѡд. Водзті вѡлі асывнас, час уджыштѡм бѡрын, петасны да артельѡн куритчасны. Ставныс ѡта-мѡдсѡ бура тѡдісны. А ѡні со том йѡз кызвыныс бергалѡны. Шыр моз котѡртасны калидорѡд, уйкнитасны уджалан жыръяс да сэсся пажынѡдз нырсѡ оз мыччывны. Компьютерѡ дзоргѡны, келалѡны интернетас. Кыв-мѡдѡн шыбитчыны некодкѡд лои Семѣн Ивановичлы. Дерт, некымын во нин сійѡ пенсия босьтѡ. Кѡсйис на эськѡ нѡшта недыр уджавны. Но ѡти лунѡ казясліс, мый некодѡс нин оз тѡд, ставныс дзик мѡд йѡз уджалѡны. Жугыль лои таысь Семѣн Ивановичлы да сетіс удж вылысь мунѡм йылысь шыѡдчѡм.

Петіс ывлаѡ. Паныд йѡз локтѡны. И некод жѡ тѡдсаыс абу. Водзті вѡлі гортланьыс мунігѡн унаысь сувтлѡмѡн тѡдсаясыскѡд варовитлѡ. А ѡні некод эз паныдась, кодкѡд эськѡ окота вѡлі Семѣн Ивановичлы бурпѡт сѣрнитыштны. И нимкодъ лои, кор ылысянь казясліс томдырся ѣртыслысь мыгѡрсѡ. Сыкѡд сійѡ паныдасьліс зэв гежѡда. А водзті, кор на бурлачитлісны, пыр ѡглаын вѡліны. Оз аддзысьлыны лун-мѡд да дыр варовитлісны. Сѣрниясыс мунісны сы гѡгѡр, кодкѡд юин да кодкѡд узин. Сэсся янсавлісны. Кор Семѣн Иванович карас овны вуджис, бара кызкѡ падвеж лоины. Вель дыр сералісны асланыс томдырся олѡм вылѡ. Казытывлісны ѣртъяссѡ, но медся нин нывъяссѡ, кодъяскѡд мусукасьлісны. Та бѡрын эз кѡ и аддзысьлыны-а. Кытчѡкѡ ѣртыс воши. А со ѡні паныд тапсьѡдѡ. Семѣн Ивановичлы телепит лои ѡдйѡджык восьлавны, медым казытыштны ассъыныс том кадсѡ, гажа рыт-войсѡ.

Кокъясыс эз нин воддза кодъ тѣрыбѡсь кыкнаныслѡн вѡвны, но воча локтігад кузяѡн ѡтвесьтасисны жѡ. Семѣн Иванович кѡсйис панны важ олѡм казытылѡмъяссѡ. Мѡдыс сюся видзѡдліс сы вылѡ да панйис сѣрнинас.

— Сѣма, тѣ тай чужѡм вылад абу на висьлѡс. Мый нѡ давленньѡссыд юлан?

— Быдсямасѡ. Зеп тыр со лекарство кышакылѡ.

— А костѡ мыйѡн зыравлан?

Сідзи и эз артмы бур сѣрниыс. Сѡмын асланыс висьѡм-нѣрпалѡмсѡ дѡжналісны. Сэсся быдѡн мѡдѡдчис аслас туйѡд. Семѣн Ивановичлы лои нѡшта на жугыльдзык. Дзикѡдз сьѡлѡмнас уси. И немвиччысьтѡг сылы паныд веськаліс мичасьыс-мича ныв. И мыйлакѡ зэв меліа вашмуніс Семѣн Ивановичлы. Олѡма морт пыр жѡ и веськѡдчис да тшапа босьгчис пуктавны кокъяссѡ. Ныв сувтлытѡг муніс сы дорті. Семѣн Иванович бергѡдчылѡмѡн видзѡдліс ань вылѡ. И мышсянныс нылыд эз лѣк вѡв. Чѡрс кодъ кокъясыс сѡмын печласьѡны. «Да эськѡ да»,— ышловзис Семѣн Иванович да бѡр ляшмуніс, да коксѡ кыскигтыр мѡдѡдчис гортланьыс.

Сорас

Тайос гижа сорас ыло. Мед кузя лыддьомсьыс шойччыштін-ныд.

Вөлі гоҗся лун. Владимир Павлович Мелехин куйліс доналөм лыа ылын да вуграліс. Орччөн гигзисны-сералісны том йөз, сылөн уджвывсаяс. Талун налөн, кодъяс мошкоритчөны вузасьомөн, сёян-юан дасьтөмөн, праздник. Зэв ёна, тыдалө, пыдди пуктөны төргөвечьястө да гоҗом шөрнас весиг урчитөмаось пасйыны. Кызвыныс, видз-му овмөсын, школаясын уджалысьяслөн, шляча усигөн пасйөны. Кодъяслы кө и кодзыд төвнас празничайтны ковмылө. А налөн со гоҗомнас. Кытчө пасйынысө мунан? Дерт, вадорө. Татшөм жарнад кантораад уджавнытө дыш, а гаҗөдчыны поэс ю дорын. Со и пасйөны. Некумын доз пөрөдісны нин. Шонді водзад Владимир Павловичос вугыр босьтны кутіс. Томджыкъяслы веськодъ, водзө гигзьөны.

Медым вөтлыны унзілсө, Мелехин келіс ваө. Кодсюрө том йөз пөвстысь эськө видзөдлісны жө сы ыло, но регыд мысти бөр асланыс гаҗө кутчысисны. Владимир Павлович варчынытө бура кужө. Ю шөрөдыс буретш пур вөлі кылөдөны. Эз ачыс кылав, а катер кыскис. Мелехин варчис сылань. Сэсся и кавшасис пур ылад. Көсийс неуна шойччыштны да бөр ёртъяс дорас воөдчыны, но, трустыд, унмовсьөма куйлігад. Эз, дерт, вывті дырсө узь. Но часыд коли. Садьмис да оз нин гөгөрво, кыті пурйыс мунө. Тэрыба варчис берегань. Гөгөрвоис жө кодарлань муннысө колө. Подөннад тапиктігөн бара час-мөдыд исковтіс. Трусик кеҗсьыд өд гортад он мун. Ковмис довгыны сэтчө, кытчө пөрччысис. Кутіс матыстчыны да казяліс, мый ю дорас тырыс йөз. Сы ыло оз и видзөдлыны. Коді тыв кыскалө, коді пыж вывсянь багырөн васө гудралө. Кодкө, тыдалө, сылөн вошлігкості пөдөма. Ковмас отсыштны корсьнысө. Тшөтш пырис ваас. Со өти мужичөй таҗъясьөмөн тыв кыскө. Кутчысис тыв помө, мед сійөс кыскысьыслы кокныдджык вөлі. Сөмын та бөрын юаліс:

— Кодкө вөйөма али мый нө?

— Вөйөма тай. Ме эськө сійөс ог төд да. Кутшөмкө пө тай Мелехин. Гаҗа юрнас ваө сайкөдчыны пырөма да, абу сэсся некод и адзылөма.

Вен

Пётр Иванович да Николай Кириллович бара венө воисны. Унаысь найө отлаын рытйысьлөны, быдсяма йывсьыс варовитлөны вежөра кык мортыс. Весигтө өд вина ютөг вермөны зэв дыр пукавны. Олөм йывсьыс сёрнитігөн, важсө казтылігөн унатор өта-мөдыслы вермасны висьтавны. А талун со кузяөн налөн кыв песөмыс люкасис Көрт Айкаө. И венөдз со воисны.

— Öні сэсся мун да төд, кызди ставыс сэки вөлі,— броткөдчис Николай Кириллович.

— Кыдз он төд. Важ йөзыс со вель уна юөр кольөмаось Көрт Айка йывсьыс,— вомаліс мөдыс.

— Мый торъя унаыс. Сөмын висьталөны, мый зэв скөр вө-

лӧма. Эжва ю вомӧн кӧрт чеп зэвтӧма. А мый водзӧсӧ лӧма — некод оз вермы висьтавны.

— Кыдзи оз вермы? Виӧмаӧсь сэсся сийӧс лӧк вӧчӧмсьыс,— весигтӧ кыпӧдчыліс улӧс вывсьыс Пётр Иванович.

— Кытысь тэ тайӧс лыддылін?

— Михаил Лебедев со аслас «Кӧрт Айка» поэмаын та йылысь гижӧ.

— Гижысьыдлӧн сийӧ и уджыс. Мый юрас воас, сийӧс и парсалас. А мый вылӧ сийӧ мыджсьылӧма поэма гижигас? Кӧні важся пасйӧдъясыс Кӧрт Айка йывсьыс?

— Йӧзсянь воӧма. Кӧленасянь кӧленаӧ висьтавлӧмаӧсь,— оз сетчы Пётр Иванович.

— И чайтан, мый кывйысь кывйӧ ставыс миянӧдз воис? Содталӧмыс эз ло?

— Тэкӧд тай сёрнит кӧть эн, ассьыд ныран. Лебедевыслы кӧ нин он эскы. Сэні со гижӧма, мый Изьюр да Эбӧс нима зонъяс сийӧс, Кӧрт Айкасӧ, виӧмаӧсь. Пикӧ воштӧма став войтырсӧ да.

— Ӧд Лебедевыс поэмасӧ гижис Сӧвет власьт дырйи нин. Со тадзи и помсӧ мӧвпыштис. Быд нартитысьыслы век пом воис. Сарӧс со весиг чӧвтисны. Кӧсьян, ме выль пӧлӧс висьт Кӧрт Айка йывсьыс лӧсьӧда.

— Эн сӧр. Висьт лӧсьӧдысь петӧма. Тэ, гашкӧ, чайтан, мый и Кӧрт Айкаыс эз вӧв да?

— Талунъя кадӧдз нин кӧ воис кутшӧмкӧ Кӧрт Айка йылысь казътылӧмыс, то кодкӧ сэтшӧмыс збыльысь вӧлӧма. Но кодӧ сийӧ? Мыйла татшӧмӧн коли казътывлӧмъясас? Ӧд некутшӧм гижӧд сы йылысь ме эг аддзыв. Гашкӧ, кӧнкӧ эм, но син улӧ эз на усылы,— водзсасис Николай Кириллович.

— Йӧзыслӧн, шуа тай, висьталӧмъясыс миянӧдз воӧмаӧсь,— дӧзмыштӧмӧн крапкис Пётр Иванович.— А тэ сӧмын вомнад изан. Шуин, мый ачӧд сямман Кӧрт Айка йывсьыс мыйкӧ лӧсьӧдны, а виньдін. Оз на Лебедевыдлӧн моз шыльыда быдӧнлӧн артмы.

Николай Кириллович эз вочавидз. Вель дыр чӧла пукалісны. Пётр Иванович аддзӧ ёртыслысь кӧрӧм кымӧссӧ да эз жӧ чӧвлӧньсӧ торк. Мед мӧвпалӧ. Видзӧдлас, сяммас оз Николайыс мыйкӧ лӧсьӧдны.

— А ме со тадзи аддза Кӧрт Айкасӧ,— немвиччысьтӧг горӧдӧм моза артмис Николай Кирилловичлӧн.— Водзас весиг кывбур позяс суйыштны. Дерт, ме абу Лебедевыд, да бура оз артмы. Но кӧть водзас, колӧ кывбур сяма суйыштны.

— Мыйкӧ лӧсьӧдін,— вашмуніс Пётр Иванович.— Висьтав, сідзкӧ.

— Кывзы.

**Абу ылын, кӧнкӧ матын.
Кӧнкӧ Коми муын, татӧн.
Кӧні весиг юньнас сайкыд,
Оліс-выліс скӧр Кӧрт Айка.**

— Лӧсьыда сӧран,— бара вашмуніс Пётр Иванович.

— Тайӧ и став кывбура гижӧдыс лоас. А водзӧ со мый

висьтала. Съод пемыд вөрса олысьяс дорö немвиччысьтөг петис көрт паськөма морт.

— Кытысь сійö воис?

— Позьö висьтавны, мый Новгородса ушкуйник сійö либö Мёскуаса дор сулалысь. Гашкö, пышйис кодъясыськö да öтнасөн вөрöд мунис. И бырснитис петис йöз дорö. Көрт паськөма, сьöкыда восьлалö, көртыс сöмын клонакылö. Пемыд коми войтыр, кодъяс тані олісны, некор на татшöмсö эз адзывны. И дерт, ёна повзисны. Пырالیсны асланыс оланінгясö, мыгчысьны оз лысьтыны. А көрт паськөма мортыд уна лун нин абу сёйöма да муртса коксö кыскыны вермö. Зэв ньöжйö керкаяс костыс ветлöдлö, öтарö-мöдарö видзöдалö. Тыдалö, корсьö, мыйöн эськö пöткöдчыштны. А сиктса олысьяс весьöпөрöмаöсь. Со пö мянöс корсьö, мед ловйöн нылыштны. Тадзи рытöдзыс оласны. Көрт мортыд некыдзи водзö оз мун. Пуксьöма ю дорö да ваас видзöдö. Сöмын кадысь кадö керкаяслань бергöдчылö. Вой суас, асыв локтас. Некод сиктын оз узь. Сэсся öд нэмсö керка пыткад он пукав. Колö чери кыйны, вөрö ветлыны. Көрт мортöс кытшовтöмөн көсйисны ва дорö лэччыны, но сійö клёнöдчитыр сувтас да тöдтöм кывйöн мыйкö букöстас. Йöзыс сямунисны. Көрт морт на бöрся. Тшыг öд дзик да, сёйны колö. Дерт, оз йöзсö сёйны көсйы, а мыйкö корыштны. Медбöрын сиктсаяс гөгөрвоасны жö, мый тайö көрт мортсö мыйöнкö колö вердны. Ваялöны сёян-юан. Тшыгыялöм мортыд азыма няргялö, некыдзи оз пöт. Та мында сёйысьыд, дерт, ыджыд вына,— мөвпалöны татчöс олысьяс. Ковмас сійöс топыда пыр вердны, мед оз дöзмы да мыйкö лёкöс накöд вöч. А көрт паськөма мортыд первойсö ачыс весиг йöз-сьыс полис, но сэсся казяліс, мый сійöс лыддбöны оз ас кодъысөн, полöны, пöчитайтöны, дöзмöдны оз лысьтны. Весиг Айкаөн ыджöддыны босьтчисны. Со вельмыны, гашкö, кутис. Гөгөрвоис, мый сылөн көрт паськөмысь медсясö полöны да весиг вой кежлас эз пöрччысьлы.

— Кужан жö тэ лöсьöддынытö,— бара ошкыштіс Пётр Иванович.— А мыйöн помасяс тэнад висьтыд? Виясны сэсся вельмöм Көрт Айкатö? Дышöдас верднысö да. Дась нянь сёйысьтö нö коді кутас дыр видзны.

— Оз. Менам мöд ногөн помасяс висьтöй. Тайö жö кадас, көнкö Доддын, Эжва катыдын либö Важкуаын, Эжва кывтыдын öти озырджык олысь морт көсйö гöтрасьны. Дерт, сэки эз гижсьыны да венчайтчыны на. Босьтасны ас дорас кажитчана нылöс, да и ставыс. Но озыра олысьыд вöлі нин пöрысь, а нылыд том. Оз көсйы сійö олöма мортыдкöд öтилаын узылыны. И пышгяс.

— Мыйöн?

— Чайта, мый пыжөн. А сы бöрся уськöдчасны вöтчыны. Нылыдлөн пыжыд кокныдджык да öдйöджык мунö. Но и вöтчысьясыс абу жö эбöстöмöсь, мый вынсьыс сынöмөн суöдöны. Со нин сикт дорас, кытөн Көрт Айкаыд, матыстчöны. Нылыд казялас, мый регыд сійöс суасны да суныштас ваас. Некод мездыны оз уськöдчы. Көрт Айкаыд эськö видлас пырны Эжваад, но көртыд асьö вöйтö. Ковмас сылы пöрччыны көрт паськөмтö да уськöдчыны мездыны нывтö вöйöмысь. И вермас öд. Петкöдас косинö. Йöзыс видзöдöны, а тайö вöлөм томиник морт на. Но зэв омоль, лы да кучикыс сöмын. Эмöсь тай сэтшöм

йӧз, кодъяс кӧть мыйта оз сӧйны, век оз ёнмыны. Татшӧмъяс лыдсьыс кӧрт паськӧма том мортыд вӧлӧма. Киыс вӧснъыдик, кокыс мукӧд мужикъяслӧн сой дорысь на вӧсни и.

— И виасны сӧки сӧйӧс?— кӧсийӧ тӧдмавны висьт помсӧ Пётр Иванович.

— Мыйсяма морт тэ, Петя? Тэныд пыр телепит, мед кодӧскӧ бырӧдисны. Оз, оз вины. Мӧдарӧ на, вӧтласны ныв бӧрся вӧтчысьястӧ. Кӧрт Айкаыс сӧсся нылыскӧд овны кутасны. Отамӧдсӧ радейтӧмӧн. А кӧрт паськӧмыс сӧдзи и мӧдас куйлыны Эжва кыр вылын. Тайӧн и керӧссӧ Кӧрткерӧсӧн кутасны шуны.

— Кужан жӧ тэ, Коля, эськӧ лӧсьӧдлыныгтӧ да. Но тайӧ ӧд абу збыльтор.

— Мыйла абу? Ог дышӧдчы да гижа кузькодъ висьт тайӧ сюрӧс сертиыс. И коркӧ уна во мысти босьтасны, лыддясны сӧйӧс да, шуам, Михаил Лебедевлысь поэмасӧ да, кызди тэ чайтан, коднаныс йӧзыслы кажитчас? Он вочавидз. А ме чайта, мый менамыс. Бура помасьӧ да. Йӧзыдлӧн таысь сьӧлӧмыс бурмыштӧ. Мӧвпыштлӧ сы йылысь, кутшӧм легендаяс воисны миянӧдз важсьыс? Юркаӧс вӧйтӧсны, Йиркапӧс нямӧдысь пыдзыртӧм ваӧн юкталӧсны да сьӧктӧс. Ваӧ жӧ пырис. Шыпичаӧс виисны. И мукӧдыслӧн олӧмыс абу жӧ бура помасьӧма. А танӧ со, менам висьталӧм серти кӧ артыштны, Кӧрт Айкаыслӧн ставыс бурлоӧ. Тайӧ мӧй лӧк?

— Абу эськӧ да. Но ӧд миянӧдз мӧд висьталӧм воис,— ышловзис Пётр Иванович.

— Мыйла татшӧмӧн миянӧдз воӧма, позяс мӧдысь сӧрни тыштны. А талун со сӧр нин, гортын виччысьӧны,— лӧсьӧдчис мунны Николай Кириллович.

— А Кӧрт Айка йывсьыс ассъыд висьтгӧ гижан?

— Видзӧдлам,— нюммунис ёртыс да петӧс.





Ксения КАРМАНОВА

Мукöд муö ветлöм бöрся

КЫВБУРЪЯС

* * *

Но и олöм! Коми кывйысь яналам!
Мыйсяма ми коми войтыр, сідзкö?!
Мый вöсна нö асьнымöс ми талялам?
Кутшöм омöль гудыр-няйтас личкö?
Но и олöм! Коми кывсö кедзовтам!—
Дугöдчам пö велöдöмысь!— Со öд!
Татшöм шуöмторйыс лёкног пензьöдö...
Бытьö тэныд съöлыштöны лолад!
Но и олöм! Коми муын олысьяс,
Чужан кывлы ог жö сувтöй паныд!
Ми öд абу прöстö мунысь-волысьяс,
Ми öд чужим-быдмим, олам тані!
Но и олöм! Мыйöдз воам, водзö кö
Коми кывсö огö пыдди пуктöй?
Бöрыннас нö кызди сійöс ловзьöдан,
Дзикöдз кор нин вужъяс бердсьыд чуктан?

* * *

Мукöд муö ветлöм бöрын
Гөгөрвоан öтитор:
Помöсдінын медся лöсьыд!
Ловнад сы дорысь он ор!
Ставыс гөгөр ас да муса,
Тані миян олан гаж!
Кöть и кытшовта ме мусö,
Кывкөртöдöй кольö важ!
Туйö пета. Вөръяс пöвстö
Саялö нин чужан сикт.
Юрын öти мөвп и öзйö:

«Виччысь! Локта регыд дзик!»
Тэысь донаджыкыс мый нө?
Тэ и сөстөм, тэ и рам.
Овсьө шуда мен тырвыйö,
Кöни чужтисны бать-мам.
Тані быд пельöскöд йитчö,
Сьöлöм ышöдана дум.
Вөр-ва тані кыпыд, мича!
Видзöдлан, да петö нюм!
Помöсдинын менам вужъяс,
Нэм помöдз ме лоа тан!
Уна морт на нöшта чужас!
Ов жö, сиктöй-шондібан!

* * *

Миян дорті дзик быд тулыс,
Сідз нин артмö, лөкмö туйыс.
Кор нин сывны босьтчö лымйыс,
Ставныс кватитчöны зырйö.
Писькöдчыны лоö дыр на,
Шоръяс йөрö мед эз пырны.
Он кө, кывтан керка сорыд
Помöс либö Эжва дорö.
Гöпсö миян дорысь тöдан?—
Весиг «Титаникнад» пöдан!
Майбыр, саридз! Няйтджык сöмын.
Видлы мунны прöстöй көмөн!
Брöдни пасьталан да ласты,
Тэ öд абу вөрöг аслыд!
Купальникась, сэсса, колök,
Гожйöдчы дай! Век нин долыд!
Сусед муніс да и келіс,
А ме босьта пыж да пелыс.
Вуджöдчыны кута! Мый нө?—
Мазай пöль моз көчьяс кыйны!
Век нин отсöг да и уджпом!
Пуксьы, Евгений, гортад вуджам!
Кодкö шуас: «Мун, эн сөр вай!
Ме кө, бурджык, коса бөрлань!»
Аслад делö, ме öд бурөн —
Кöть нин петан туйыд сюрö!
Эськö гумсин. Ме öд шулі!
МИЯН СИКТÖ ВОИС ТУЛЫС!

❖ ❖ ❖

Из вылө из*

РОМАН

Өкмысөд глава

1

Одью сиктса овмөс нэмсө омөлик вөлі. Видз-му вөдитөмыд сэнн эз вөв медшөр могөн. Сиктсаяс ёнджыка вөрүн уялісны-шөйтисны. Коді кыйсис, а коді вотөс да тшак чукөртис. Кыйдөссө и вотөссө сдайтлісны госпромхозө. Таысь босьтөм сьөмөн и бергөдчисны. Но кор странаын олөмыс заводитис дзугсьыны, госпромхоз подув вылын лөсьөдісны совхоз. А совхозын мый вөчөны? Йөв да яй, быдтөны картофель да град выв пуктас. Виль овмөссө котыртисны вылісянь индөмөн. Йөз неокотапырысь паныдалісны татшөм вежсьөмсө. Өд вөр-ваыс өні быттьө бокө коли...

Кыксёысь унджык морт лыддьыссис ичөтик овмөсын. Вердны-юктавны ставнысө татшөм овмөсад өдвакө позис, да кадыс петкөдліс, эз и артмы. Велькөдлысьыс заводитліс зільны-котравны, сэсся аддзис, мый весьшөрө педзө. Сьөкыда висьмис да эновтис овмөссө.

Кутісны корсьны виль директорөс. Сиктсьыс, буракө, некод эз сюр да, шыасисны Игнатов дорө. Сійө өти во ашшөр овмөс кутіс, инас эз өшйы. Абу сы серти тайө уджыс, но и корөмөн тшөтш эз уськөдчы бокөвөй сиктө. Өти-кө, төдө вөлі сэтысь овмөссө, а мөд-кө, уяліс на морөсас дойыс, ягдорсаяслөн парсаломиныс. Эз көсйы мөдысь сэтшөм жө рыө веськавны.

— Кытчөдз тіян йөзыд кырымпаса кабалаөн оз корны, некытчө ог вөрзый!— чорыда вочавидзис сійө Одью совхозса зоотехникилы, коді кольөма директор пыдди.— Корасны кө, вөлісь кытшовта овмөстө. Сөмын сэки, йөзыс кө оз лоны паныд, босьтча уджө.

Кырымпаса кабалатө вежон мысти нин вайисны. Сёрнитчисны матысса вьльунө кытшовтны овмөссө.

Индөм кадө Игнатов керка дорө матыстчис важиник «уазик»: бурджыкыс пө овмөсын абу.

Воисны скөт карта дорө. Өдзөсөд пырөны-петөны йөз: коді мешөкөн, коді нопйөн.

— Мый найө кыскалөны?— Андрей чуймөмөн видзөдліс директорлысь удж вөчысь вылө.

— Начкысисны да удждон пыдди яй сеталөны.

— Яйөн мынтысьөны?

— Да.

— А сьөмнас кор?

* Журнал вариант. Заводитчөмыс тавося 1-6-өд номерьясын.

— Көкъямыс төлысь сьёмсө эз нин аддзывны. Унаён няньсө гортас отруб сора пызысь пöжалöны.

Дусыдмис чужöмыс Игнатовлөн. «Кытчö юрöс сирала? Этша на сюри? Эз öмöй мөрччы воддза овмöсыс?— ас кежас мөвпаліс сійö.— А мөдарö кө, гортад шняпвидзöмыд бур али мый? Инад он öшйы, прамöй најотка абу жö. Гöтыр кошта вылын пукавны? Ог! Босътча, том на паччөр сэрöгö кайны!»

Кытшовтісны картаясöд, сёрнитісны лысьтысьсысьяскöд. Сэс-ся лэччылісны гаражö, пилорама вылö. Уджалысьяс юасисны, кыдзи Игнатов, локтас кө уджавны, вермас вөрзьöдны овмöссö, бурланьö йоткыштны. Найö ёна нин дöзмöмаöсь омöлик, туйтöм олöм, сьöм абутöм вылö. Аддзас-ö Игнатов петан туйсö?

— Аддзам, öтвылысь кутам та вылын уджавны,— Игнатов кывкёрталіс сёрнисö механизаторъяс водзын.

Кывсö лои шуöма, а шуис кө — вöчас. Мöд луннас нин Андрей Игнатов лэччис Сыктывкарö, видз-му овмöс министр дорö.

Заводитчис быдлунъя тöжда удж. Первой коліс корсьны көть мыйтакö сьöм да заводитны вештыны чукөрмöм удждон. Лэччис райисполкомö, сёрнитіс финотделса заведующёйкöд, районса юрнуöдыськöд. Буретш ськöд, коді «отсаліс» Швановалы вöтлыны Игнатовс Ягдорысь. Паныдаліс районса юрнуöдысь сідз, быттö на костын ставыс бур. Сöмын синсö öтарö зіліс дзебны. Кöсйысис эськö отсасьны, но сьöм кузя нинöм эз вочавидз.

«Миритчис менам Одьюса овмöсö локтöмөн сöмын сы понда, мый мöд морт татчö юрсö эз сирав, көть и ёна корсисны»,— думыштіс Игнатов. Сöвет кадас на партияса райком Одьюö мөдöдліс уджавны «штрафникъясöс», быдөнöс кык во кежлö. Игнатов коркö серавліс Важтыбокса леспромхозысь профкомса вöвлöм председатель вылын. Кутшöмкö делöысь сійöс райком көсьяс мыждыны кыдз партияö пырысьöс. Но друг ковмас юрнуöдысь Одьюса госпромхозö, и морттö кык во кежлö тойыштасны сэтчö директоравны. Мортыд вежон Одьюын оліс, а шойччан лунъяс кежлö лэччö вöлі гöтыр дорас, Важтыбокö. Лыддис, кымын төлысь коли тадзи люзикасьны. Игнатов, кор паныдасьліс, пыр и юавліс:

— Ссылкаыд оз на помась?

А öні ачыс быттö ыстöм морт, быть лои мунны сьöд вөр шөрö. Öд сиктыс дзебсьöма чурк сайö. Мир туйыс сиктсьыс водзö некытчö эз нуöд. Гөгөр помтöм-дортöм парма шувгис, ыджыд и ичот керасьясөн, кушинъясөн, вöралысьяслөн чöс туйясөн, вөр керкаясөн да чукльöдлысь-мукльöдлысь дзоля юөн.

Андрей Васильевич паныдасьліс районөн веськöдлысьöс медводдза вежыськöд. Раиса Павловна кывзіс да тшöктіс аслас отсасьысьяслы сетны сёян-юан кредит. Сэки сьöм абутöм вöсна вöліны и татшöм кокньöдъяс.

Регыд мысти Игнатов кутіс нин виччысьны вагон тыр пызь. А сэккості шуис восьтыны пекарня. Важтыбокса ОРС отсаліс судзöдны пöжасян эмбур.

Гараж бокö коркö лэптылöмаöсь сруб. Квайт метра пасьтаыс и кузьтаыс. Чукöстіс стрöитчан бригадаысь нель мужичöйöс. Тшöктіс налы вевттыны да жырйыслысь пытшкөссö пелькöднылöсьöдны. Ачыс лэччыліс карö кирпичла. Одьюысь сюри и пач

тэчысьыс. Муртса сыліс лым, перйисны сёй, трактор кёшён гудйыштисны. Пач тэчысь босьтчис уджө. Вежон мысти жырйын сулаліс кык пөжасян пач. Быд лун найөс ичөтика заводитисны ломтыштавны, медем вөляысь косьмасны. Пач, позьө шуны, лои дась, а пызь вагон век абу. Игнатов бара лэччис горувлянь. Пыравліс юрсиктса веськөддысьөс вежысь дорө. Төдмаліс вагон кузя: кабалаяснас пө падмөг лолөма, сы вөсна сөрмис вагон мөдөдөмыс. Игнатовлы сійө тшөктіс, медем ас дөзьөр улө босьтас пызь вайөмсө.

Коркө сэсса, вежон мысти кымын, звөнитчөны: Сыктывкар станцияө пө воис пызь вагон, колө ректыны.

Игнатов тшөктіс пырысь-пыр стройбригадаса бригадирлы чукөртны йөзөс карө лэччөм могысь и асьсө сэтчө нарадитіс. Карө мөдөдчис став машинаыс, коді вөлі кок йылын. Весиг чаг новлөддан кузь прицепа ыджыд «КамАЗ» корисны лесопунктысь. Пызь лои ас кадө вайөма да меститөма складө.

Андрей Васильевич сетіс индөд — пызьнас медводз могмөдны уджалысьясөс, кодъяс окотитасны босьтны сійөс удждон пыдди. Мөдысь шуөм эз ковмы, пара лунөн комын тоннаыс инасис.

Вагон ректөм бөрын мөд луннас нин выль пекарняысь петіс ас нянь. Йөз окотапырысь босьталісны пөсь тупөсыас. Тайөн выльпыртөмыс эз помась. Совхоз кантораса өти жырйө восьтісны вузасянін. Ньобасыны позис сьөм вылө. Кодсюрө заводитлісны пинясыны.

— Мыйла сөян-юансө удждон пыдди он сетөй?

— Сідз кө вөчны, лавкаыс талун жө тыртөммас, а сэсса тупкыяс. Сьөмыс вьльторсө вайны кысь лоө? Гырысьторсө, кодөс мешөкъясөн вермам судзөдны, кутам сетавны удждон пыдди. А воас кад, и бырөдам татшөм мынтысьөм. Сьөмөн мөдам вештысьны,— лабутнөя вочавидзис Игнатов.

— Кор сэтшөм кадыс воас?

— Воас, а медем өдйөджык матыстны, тиянсянь виччыся бур удж.

Йөз довкйөдлісны юрнаныс. Эз ёна эскыны, но ланьтісны.

Төвнас пөрөдісны бура уна вөр. Вөрсө позис пилорама пыр лэдзны да бокө вузавны, содтөд сьөм овмөсө вайны.

Заводитісны тшупны сө юр вылө выль карта. Важыс гөгөр нин пыклөма. Тулыснас панісны сө тонна вылө картупель видзанін. Воддза воясө картупельсө овмөсын эз вөдитны.

Игнатов корсис медбур мусө. Первой колө вөлі дискуйтөмөн орөдны эжа вутшсө, а бөрас гөрны. Гөрөм водзвылын петкөдісны тырмымөн куйөд да разөдісны му пасьтала.

Гөрысьыд му вывсьыд регыд и воис гаражө.

— Эштіс,— збоя вочавидзис сійө.

Игнатов муніс видлыны. Аддзө: гөрөма да сөмын эжа пластсө вөсньыдика путкыльтөма. Мукөдлаас пластыс сулалө.

— Ерөмакань, тадз өмөй позьө уджавны?!

Воис гаражө да морттө выль пөв гөрны ыстіс.

— Мед бөрөздаыслөн судтаыс 25 сантиметрысь этшаджык эз вөв!— велөдіс гөрысьөс.— А бөрас нөшта кыкысь дискуйтан. Сэки муыс гөн кодь небыд лоас!

Игнатов ачыс видзөдіс, кызди трактористыс уджсө вөчас. Эз лэдзчысь сэтчөдз, кытчөдз муыс эз небзы.

— Өнi позяс визьйöддыны, радъяс вöчавны,— кытшовтöм бöрын кывкöрталiс Игнатов.

Картапель кöйдыссö ньöбис пилитöм плака вузалöмысь сьöм ылыö. Тайö кöйдыснас позис пуктыны вит гектар. Унджыкыс ылыö Игнатов эз лысыт ырыштчыны, да и сьöмыс кутiс.

Пуктысисны лючки, овмöсын торъя агроном эз вöв. Андрей Васильевич ачыс пуктысян агрегатсö ладитiс-лöсьöдiс. Медым картапель кöйдысыс усыласис радъясас буретш 20—25 сантиметр костөн да колана пыднаöдз, небыд мунас тупкысис и.

Гожöмыс коли кöрым заптан да картаяс дзоньталан тöждьясөн. Колiс тырмымөн чукöртны турун, суйны гуö силос. Такöд тшöтш син улын кутны картапель видзанiн кыпöдöм.

Турун пуктöм Одьюын мунö дзик мöд ногөн, ёна торъялö ягдорсаясысь. Ягдорын кöрым заптысьяс быттьö заводуын уджалiсны. Öкмыс час асыв заводитлiсны, вит час рытын лэдзасьöны нин. Ытшкысьяс сöмын каднас эз лыддьысьны. Налөн «вöвдом» мед пыр вöли. А чöвтысьяс да куртысьяс вила-курантö вит бöрад эз нин босытлыны. Весиг прессуйтчысьяс лишнöй кад уджалöмөн плешсö эз жугöдны. Шойччан лунö совхоз видзьяс ылын некод эз тыдав. Кöрым заптöмыс артмылiс унджык трактор-машинаөн да мукöд техникаөн вöдитчöм отсöгөн.

Одьюын пуктысисны семьясөн. Ичöt ю пöлөн бура ылöдз видзьясыс нюжалöмаöсь. Унджык видз ылыö тракторөн он веськав, кайö пода туй. Нöшта ю кузя верман катны. Мукöд семьяыс кайлiс пуктысьны мöскөн да посни видзантийөн гожöмбыд кежлö. Кутшöмсюрö видзьяс ылын позис кывны чипаньяслысь котсöм да петукьяслысь чуксасьöм. Пуктысьöм бöрын ставөн бергöдчылiсны гортас.

Игнатов тулыснас на чукöртлiс сиктсаясöс, кодъяс пуктысьлiсны. Сёрнитчис: заптасны аслыныс турунсö сöмын колана мында, мед позис тöвйöдны ассыныс мöс да мукöд видзантор, но медым тырмымөн лои и совхозлы. Öд видзьясыс совхозлөн, и лöө тешкодь, оз кö öтув овмöсса сюраньяслы заптыны кöрымсö тöвйымөн мында. Кольöм тöвнас, кор сийö локтiс уджавны Одьюö, совхозлөн туруныс эз тырмы. Пуктысьысьяс бокö вузавлöмаöсь. Лудö петтöдз, тулыснас, Игнатовлы турунсö ковмис ньöбны, корысявны. Весиг Ягдорысь ассыс пуктöмасö Одьюö катöдiс кык трактор телега тыр.

Аръявылыс лöсьöдiс куим морта комиссия да став сувтöдöм зорöдьяссö кытшовтöдiс. Пуктысьысьяс асьныс индалiсны совхозлы ылыö лöсьöдöмсö. Туруныс чукöрмис тырмымөн.

А матiгöгöрса муяс ылысь уна вося быдмөгъяс силосуйтiсны. Овмöсын бур техника эз вöв. Силосуйтчисны важ КИР-1,5 ытшкан машинаөн. Сийö тшöкыда жугласис. Та понда мукöд луннас «киргисны» сöмын кык-куим телега. Тайö вывтi этша, силос гуын ытшкөм туруныс воштiс пötöслунсö.

Игнатов тшöкыда волiс силосуйтчысьяс дорö, тэрмöдлiс. Кöсйысис ыджыдджык дон пуктыны. Механизаторъяс кызвыннас гөгөрвоисны сийöс да зiлисны кадсö не воштывны, но, овлывлiс, руль сайö öткымынөн пуксыылiсны код юрөн. Игнатов казьявлiс да сэтшöм трактористъяссö тодышкавлiс пальöдчыны.

Мужичöйяс Одьюын вина-водкатö, аскуртö, ок, ёна радейтiсны. Овмöсын турун пуктöм бöрын стройбригадаса йöз тшöкыда жö кодавлiсны.

Игнатов кутіс найӧс ӧтикӧн-ӧтикӧн корлыны кантораӧ. Пуксьӧдліс ас водзас да лабутнӧя юасис, кыдзи олӧ, мыйла юӧ. Унджыкыс кывзисны да шпынниялісны. Юӧмысь дзикӧдз энӧвтчыны эз кӧсйысьны. Шуалісны, мый кутасны асқурасьны сӧмын празникъяс дырйи.

Андрей Васильевич торйӧдчигас ӧлӧдліс.

— Ас вылад сӧсся скӧрав, юӧмысь кӧ тодмышкалам овмӧсысь. Тӧкӧд ми лючки сӧрнитім. Сідз абу?

— Сідз,— нурбыльтлісны мужичӧйяс.

Ӧтчыд локтіс пилорама вылӧ. Пилитчысьяслӧн шойччан будқа стеньысь ылысянь на адзис выльысь пилитӧм паськыд пӧв. Тувьялӧмаӧсь да шомӧн гырысь шыпасӧн рочӧн гижӧмаӧсь:

— Пьянству бой!

Тыдалӧ, серам ради ляскисны гижӧдсӧ. Лабутнӧй сӧрнияс эз отсавны. Коді тӧкаритліс-юис, сідз и водзӧ оліс, мукӧд уджалысьсӧ падмӧдіс, ас бӧрсяяс кыскис.

— Кутам татшӧмъясыскӧд янсӧдчыны!— чорыда шуис Игнатов быдлунъя планёрка вылын.— Унаӧн удж вылын юӧны, а бригадиръяс табельӧ пукталӧны тыр лунъяс, да тӧлысь помас сӧм на таысь мынтам. Тадзи овны водзӧ оз позь. Кыксӧ сайӧ уджалысь миян овмӧслы уна. Колӧ кодсюрӧысь мездысьны.

Удж вылын юӧм-кодалӧмысь вӧтліс ӧтпырйӧ куим мортӧс, медся наянъяссӧ. Вежон коли, да содтӧд витӧс тодмышкаліс. Эз статья серти, а мыччыліс кабала да корис гижны ас вӧля мунӧм йылысь шыӧдчӧм. Вӧтлӧмыс артмис небыдик, но асқур радейтысьяс пӧвстын заводитісны ропкӧдчыны. Игнатов эз видзӧд броткӧм вылӧ. Кольліс уджавны сӧмын найӧс, кодъяс кӧть ышмылісны да тӧлысьнас кык-куим лун кодалісны, но пальӧдчӧм бӧрас мусӧ и васӧ бергӧдісны, сӧлӧмсянь уджалісны. Найӧс Андрей Васильевич эз вӧрӧд, сӧмын нурбыльтліс:

— Водзӧ эн ышмы.

2

Игнатов пажнайтіс гаражбердса совхознӧй котлопунктын. Нуръясьсӧм бӧрын «уазикӧн» воліс кантораӧ, пуксьыліс пызан сайӧ да уджаліс колана кабалаясӧн.

Ӧтчыд ӧбед кадӧ, қор кантораын сы кындзи некод эз вӧв, пырис лесопунктса технорук Пустышев.

Пустышев сатш пуксис улӧс вылӧ да зумыштчис. Игнатов весиг кучикнас кыліс, кыдзи писькӧдіс сійӧс кельыдруд синъяслӧн повзьӧдчана видзӧдлас. Локтысь мортлӧн сӧ чуқыра чужӧмыс скӧрысла веқыштчӧма, а тшӧка вывсӧ вомӧналіс вӧсныдык визь. Тупкӧма вомсӧ да, мортыслӧн быттӧ лӧбӧйыс эз вӧв. Пустышев-сянь ӧвтіс кодзыд руӧн, тӧдчис, сӧлӧмтӧм, жаль тӧдтӧм морт сы дорӧ пырис.

— Чолӧм,— гартчана кывйӧн шыасис сійӧ.

— Бур лун, мый могӧн?

Андрей Васильевич видзӧдліс гажа юра техноруклы веськыда синмас. Мӧдыс здук кежлӧ дзебліс синсӧ. Мурч курччис пиньсӧ, нӧшта топӧдліс лӧбсӧ да кыскыштіс нырнас. Дыр нин шырлытӧм рудов юрсиас ӧшйӧмаӧсь турун сіяс.

— Чӧвтін али мый? Турун сіяс ӧшйӧма юрад.

Пустышев бытгö эз кыв, дзаснитліс синнас паныд пукалысь выlö.

— Тэ мыйла йöзсö вöтлалан?!

— Ме тодмышкала сöмын уджалан кадö аскурасьöмысь.

— Смотри, эн чотась! Ягдорсаясыд кө прöстö вöтлісны, тани ловтö вермасны босьтны!

— Абу полысь рöдысь.

— Ме öлөдi,— Пустышев чеччис да шатовтіс. Жырйысь петігөн водз чуьнась öтарö-мöдарö вöчис, бытгö чирыштіс директорс.

Игнатовлы сьölöм вылас эз ло лöсьыд. Пуктіс ручкасö, чукöртіс кабалаяссö да суйис папкаö. Сувтіс öшинь дорö. Уличын вуджрасисны гежöдик ветлысь-мунысьяс. Велькодпырысь колльöдіс найöс синнас. А юрас бергалö Пустышевлөн волöмыс. Мыйла пыраліс? Чайта, эз алкашгъяс вöсна. Сідзкö, мыйла грöзитчö, öлөдö?

Одъюсаяс нэмсö вöліны аслыспöлөсöсь. Локтысь морттö кө оз примитны, быть лоö бөр мунны сиктсьыс. Андрей Васильевич тайöс тöдіс. Сійöс корисны уджавны кабалаөн да кырымпасгъяс-өн, но пырас вöлі гаражö либö стройбригадаса уджалысьяс дорö, и найö пыр жö лантьöны. Сёрни сы дырйи эз нуöдны. Сöмын тöлысь вит мысти кымын заводитісны явö варовитны. Думайтіс, мый сійöс ас мортөн нин лыддьöны йöзыс, но, вöлөмкö, водз радліс. Со Пустышевыс кыдзи грöзитчис: ловтö пö вермасны босьтны. Сідзкö, эмöсь йöз, кодьяслы сійö горшö тасасьöм сирпинь кодь.

Регыд и тыдовтчис, мый Пустышевыд эз весьшөрö грöзитчы. Игнатов овмөсса «уазикөн» ачыс пыр ветлөдліс. Шоперос босьтіс сöмын карö лэччывны. Öтчыд пилорама дорсянь машинаөн петіс шөр туй выlö, сиктсьянь неуна бокö. Муртса муныштіс, бөрвылас петкөдчис «кунг» — тупкыса вына машина, кодөн вөр пөрöдысьясос вылыс складöдз новлөдлöны. «Кунг» вöтчис бөрсяньыс да «ворсөдчис» бинас, корис сувтны. Игнатов бөргя зеркала пыр аддзис кабинаысь кум мужичöйöс. Шöрас пукаліс Пустышев да öвтчис кинас. Став серти тыдаліс, мый вөтöдысьяс код юраось.

Игнатов содтіс «уазиклысь» öдсö. Бөрсаяс öддзöдісны жö. «Мый вöчны?— югнитіс Игнатов вежöрын.— Сувтны оз позь, вермасны ёкмыльтны да шойтö весиг оз аддзыны».

Крута бергöдіс рульсö, веськөдчис скöт картаяслань. «Кунг» бöрыньтчыштіс да тшöтш жö көсйис кежны, но кор вöтчысьяс аддзисны Игнатовлысь карта öдзос дорö матыстчöмсö да сэтчö пырөмсö, сувтісны. Кыйöдісны, петас оз картасьыс.

Минут дас мысти «кунг» косіс, ас вöляысь тюрис сиктлань. Тыдалö, повзисны йöзасьöмысь да энөвтчисны...

Гожöмнад уна пөлос удж вöчигөн «кунглөн» вöтчылöмыс вочасөн вуні, таялісны быдлунгя тöждгъяс. Воис картофель керан кад. Первойя луныс жö петкөдліс: урожай, ок, ыджыд. Витсё ветымын центнерөн öти гектарсьыс артмö. Та мындаыс весиг Ягдорын эз овлы. Картофель идралöм муніс надзөн. Йöз тани абу велалöмаось копрасьны копалка бөрся совхоз му вылын. Помысь сувтöмаось шойччыны, коссö зыралöны да бипур дорö

жмитчоны. Быдса вежон чөжөн сөмын гектар вылысь картупельсө өктисны да йөртөдө меститисны.

Игнатов быд лун некымынысь му вылө воліс, но удж эз өддзы. Мөдарө, йөз заводитисны пышъявны. Асывнас мыччысласны, а час мысти лыда морт нин кольөма. Кайоны вөрө вотөсла да тшакла. А вөралысь мужикъяс весиг эз юасыны. Кайисны вөр керкаясө, асланыс чөс туйө.

— Пуктөдіс кө, мед ачыс и керө картупельсө,— воис пельөдз овмөссаяслөн сёрниис.

Весиг канторасаяслөн плешныс эз пот ывла удж вылын. Муртса директорлөн «уазик» саялө, картупель өктысьяс гусьөникөн пышйылісны му вылысь.

Воис нин октябр төлысь, шяча петіс, көдздөдіс, а дзонь гектар на кертөм шыльквидзө.

Игнатов чукөртіс канторасаясөс, сиктсаясөс, корис отсыштны школаса челядьбөс. Ачыс накөд тшөтш кымыньөн кыскасис му кузя. Куим лунөн и помалісны. Бөръя луннас ва гөпъясыс йизьмабсь нин вөлі. Ковмис шоныда пасьгасьны. Картопель муыс вывтасінын да, чизыр төлыс йиджис купайка пыр. Игнатов эз мун, кытчөдз медбөръя мешөксө эз нуны картопель видзанінө.

Ёна дөзмыліс, ас кежас шуаліс: «Оз гөгөрвоны! Ыдждыд урожайыс вайө содтөд сьөм. Төвнас позяс вузавны. Поснисө сюраньяслы вердны. Содас йөв, унджык маслзаводө ваясны. Бара содтөд нажөтка. Тадзи, сөмын тадзи позьө гөль олөмысь мынтөдчыны. А йөзлы нинөм оз ков. Мөд во сюсьдзык лоа».

3

Мөд вонас Игнатов водзвыв сёрнитчис мужичөйяскөд. Сетіс уркөвөй: картопель керөм бөрын ставнысө лэдзас отпускө. Ветлөй, кыйсьөй, вотчөй. Откывъясьны лои кокныдджык и сы понда, мый Игнатовлы удайтчис таөдз вештыны овмөссаяслы став уджйөзсө да быд төлысь на джынсө мынтыны сьөмөн. Дерт, удждон вөлі ичөтик на, но сійөс йөз кутісны босьтны ас кадө.

Та бөрын Игнатовөс сиктсаяс кутісны пыдди пуктыны. И ачыс чайтис, мый тырвөйө ас мортөн лои. Весиг кызкө быттө вуні нин Пустышевлөн грөзитчөмыс. И лесопунктса технорукыс сэсся эз матыстчыв сы дөрө.

Өти рытө Андрей Васильевич сёрмыштіс. Пукаліс кантораын, виддаліс чукөрмөм кабалаяс. Удж помалігас нин звөнитіс сельхозуправлениеысь начальникыс. Стрөга сёрнитіс, корис аски жө бөр вайны «уазиксө», кодөс Одыуса овмөс көртымаліс управлениеысь. Овмөслөн сьөм выль машина ньөбөм вылө эз вөв. Первой восө уджалігөн на Игнатов районса юралысь пыр корис управлениеысь тайө машинасө. Налөн сійө сідз гаражын сулаліс, сыысь өддор вөлі на и «Волга». Асфальт кузя шыввьялісны буретш сы вылын. Талун начальникыс пинясис: өти во кежлө пө сөмын сетім, грөзитчис ёрд пыр мырддыны машинасө. Телефон трубкасө пуктөм бөрын Игнатов бура дыр пукаліс вөрзьөдчөтөг. Думайтис, машинатөг кольчыны сылы оз позь. Көсйис сёрнитлыны районса юралыськөд. Та вылын позис эськө лөньөдчыны, но мыйлакө кыліс лов пытшкас кутшөмкө гудрасьөм, весиг чу-

жис полөм. Эз машина мырддьом вөсна, эз. Мыйыскө мөдтор-йысь, гөгөрвотөмысь сьолөм вылас лои деливө.

Рөмдігас нин петіс кильчө помын сулалысь «уазик» дорө. Арыс таво вөлі мича, дыр нин зэр тусь эз усълы. А өні со төв-зыысьома, енэжөд кывтісны сьөд-лөз кымөръяс. «Зэрмас,— ча-төртліс юрсө Игнатов.— Водзджык колө вөлі петны. Абу нимкодь зэригөн да нөшта пемыднас Ягдорөдз воөдчыны».

Кытшовтіс машина гөгөр, чужйис бөръя колесаө да пуксис кабинаө. Уджөдыштис моторсө, вөрзьөдчис. «уазик» өдйө тюрис туй кузя. Бөрө колины сиктпомса керкаяс, мөс картаяс да си-лос гу. Туй өтар-мөдарас бьдмысь козъяс шенасисны лапъяснас, копрасиг кольөдісны Игнатовлысь «уазиксө». Кыдз пуяс вылысь төлыс нетшкис вижөдөм коръяссө да шыблаліс өтарө-мөдарө. Туй вылө, козъяс улө, весиг машина мышкө лякис.

Игнатов содтіс өдсө. Сійө тэрмасис, көсйис пышйыны зэр-сьыс, но төлыс пыр өнджыка өддзис, пөльтіс бөрсяньыс да ва-йөдіс сьөд кымөръяс. Ывлаыс нөшта на пемдіс. Андрей Василь-евич видзөдліс спидометр вылө, верст дас лои мунөма. Туйсө вомөналіс кытшолөн кывтысь ичөтик вөрса ю. Туй мудөдыс сэ-ті кайис вылө. Сыв нель, а, гашкө, вит лоө. Буретш пос дорас машина рульыс другөн нетшыштчис Игнатов кийсь. «Уазиксө» шыбитіс бокө да өд вывсьыс сійө бурскысис туйбокса кырөдө.

Андрей Васильевич удитіс сөмын чорыдджыка кутчысьны рульө, личкыштны тормоз вылө, но вөлі сёр нин. «уазик» патур-ликаситгырйи тимбыльтчис пос улөдз...

Здук мысти пос дорө матыстчис ьджыд «кунг» машина. Каби-наысь петіс мужичөй. Пос шөрсянь видзөдліс бок вылын куй-лысь «уазик» вылө, скөрысь вашмуніс. Сьөвзис да бөр пуксис шоперкөд орччөн. Машина бөрыньтчыштис, бергөдчис да мөдіс Одьюлань.

Игнатов паляліс Важтыбокса бурдөдчанінын. Первойсө эз гөгөрво, көн-мый. Эз путьмы висьтасьны еджыд паськөма мужи-чөйлы, коді копыртчөма вөлі сы весьтө. Висис юрыс, кийс да став тушаыс. Быттьө нөшкөн вачкалөмаөсь. Сійө ымөстис, кунис синсө. И бара быттьө дзумгысис-пырис пемыдінө. Син водзас петкөдчис вежаньыс.

— Тэ жө кулі!— чуймис Андрей Васильевич.— Ме ачим гуасигас вөлі.

— Гуалінныд вир-яйөс, а лолөй менам Ен дорө кайис. Енэж-сянь тэ бөрся видзөда.

— Вылысяньыс, сідзкө, тэныд ставыс тыдалө. Он төд, мыйла дойми?

— Лөк морт пакөсьтсө вөчис. Тэ сійөс ачыд төдан.

— Сійө и эм, ог төд коді. Пакөститчысьыс, гашкө, мөдарь-югыдас көсйис мөдөдны?

— Бурдан, тэнө тані оз на виччысьны, видз асьтө.

— А коді мыжаыс, коді?

Андрей Васильевич юасис, өна юасис, но вочакывсө эз кыв. Вежаньыс кыдзи мыччысьліс, сідз жө и другөн воши.

Кор вылысь воис ас саяс, дінас пукалісны Иван пиыс да погона морт.

— Андрей Васильевич, ті менө кыланныд?— казяліс палялөм-сө милиционерыс.

— Да.

— Одьюось петом водзвылын «уазикысь» кутшомкө нелючки казялінныд?

— Эг.

— А водз көлеса крепитан гайкаяссө эн разылы? Гашкө, вежлін көлесасө?

— Эг, сійө пөльтөма вөлі.

— Машинаыслөн водз көлесаыс сюри бокысь. Гайкаясыс разьсьөмаось, көлесаыс мынөма да водзө тюрөма. Сы вөсна и туйбокса кырөдас тэнө шыбитіс. А сэсся «уазикыс» тімбыльтчис пос улөдз, дойдаліс тэнө. Ме чайті, мый ті асьныд көлесасө перйылінныд да вунөдінныд гайкаяссө бура зэлөдны. Эн кө, сідзкө, кодкө личөдіс нарошнө. Одьюас тіян эмось лөгалысьяс?

— От төд.

— Ак, сідз,— друг торкис сёрнисө Иван.— Ме ачым туяся! Сөтана пызь, лоө кось! Менам батьлы грөзитчөны, көсйөны вины либө инвалидөдз вайөдны! Та дырйи ме кута пукавны полысь көч моз?! Мый, ме неморт? Кута виччысьны милициялысь милөсьт? От, ачым тшапнита злөдейсө!

— Но вот, пыр жө төді ассьым пиөс,— дой пырыс нюмдіс Игнатов.— Бара тяпнитін?

— Муртса, чуньлыс мында.

Игнатов ышловзис. Сылы эз вөв лөсьыд, мый пиыс бара на юыштөма. Некыз оз вермы шыбитны, энвотчыны курыдторсьыс. Колө эськө кодируйтчыны, но сійө нинөм оз көсйы кывзыны.

Погона морт чуймөмөн видзөдліс батя-пия вылө да чеччис.

— Ладнө, бурдөдчы.

— А татчө коді вайис?— Игнатов чөвтліс синсө милиционерлань.

— «Ниваён» вотчанинысь вөлөм локтө Пименов Василий Васильевич, карса олысь. Сійө аддзөма да вайөдіс тіянөс бурдөдчанинө. Ме ськөд аддзысьлі нин. Бурдан да верман аттьөавны тайө мортсө.

Погона петіс жырйысь. Регыд мысти муніс и пиыс. Игнатов кутіс думайтны. Збыльысь өд, коді гайкаяссө личөдіс да көні? Дойман луннас эз уналаө воы: гаражө, скөт картаө да бөрводз пилорама вылө. Картаын сөмын мөс лысьтысьяс да кук видзысьяс вөліны. Найө машина дорө эз петавны. Да и уджалөны нывбабаяс. На пиысь некод техникаөн оз вөдитчы. Кольө пилорама да гараж. Сэні шопер-трактористыд тырмө, но коді на пиысь ме вылө лөгалө? Да сідз, медым мөдарьюгыдө мөдөдны либө инвалидөн вөчны. Некодөс веськыда шуны оз вермы. Кыдз шуан? Кодкө кө аддзыліс пакөсьт вөчигас, позис тшапнитны. Позис, аддзыліс кө да висьталіс. Вермис и чөв ланьтны. Одьюын веқджык тадзи и овлө. Көть йөзасясны, сиктысь сёрни водзө эз петлы.

Коркө тулыснас, Совет власьт дырйи на, мотора пыжөн лесопунктса кык уджалысь да кассир лэчасны банкө сьөмла. Удждон сеталан лун воөма да. Сэкса кадө лесопунктса мырсьысь-зильысьяс бура нажөвитісны. Бөрсө локтігөн пыжыс быттөкө путкыльтчас, сьөмыс да кассирыс вөйөмаось. Тадзи висьтасясны кык мужичөйыс, кодьяс кольөмаось ловйөн. Найөс вакульыс абу кыскөма. Дыр корсисны кассиртө да сьөмсө, но нинөм эз

сюр. Милиция заводитліс кыскавны кыкнан мужичойсö. Сэсса лэдзчысисны, кывсьыліс: найö пö абу мыжаöсь, а гоз-мöд во кольöм бöрын кыкнанныс öти бöрся мöд лёкнога кулісны. Енмыс мыждіс али кодлысь рöднясö бөрэдзöдісны, найö отсалісны мунны мöдарьюгыдас, тайöс некод эз тöд. Татшöмсяма лоöмторьясыс Одьюын овлісны и бöрынджык нин...

Игнатов некодлы эз висьтавлы нöшта öти лоöмтор йылысь. Вежонöн водзджык, «уазикöн» пос улö лэбтöдз, машинанас сійö лэччыліс ю бокö. Сэтчö тшöкыда лун сьöмöснас вöлі ветлывлö. Пырджык öти кадö: берегас пукуыштны, вөр-ванас любуйтчыштны. Тайö здукьясö сійö думнас энöвтчыліс быдлунья тöждьясысь.

Ю дорас неуна эз во, сувтіс кыддза рас дорö. Радиаторас ваыс вывті ёна кутіс шонавны. Муртса петіс кабинасыс да восьтіс капотсö, кыліс лыйöм шы. Дзик машина дорын быдмысь нейджыд кыз пулысь россö пуляыс орöдіс, быттьö ёсь черөн сöтыштісны. Игнатов повзис, эз кут кöйявны. Пöддаліс капотсö, сöліс машинаö да ыджыд öдöн бөр төвзис сиктлань. Коді лыйис, сідз и коли гусятөрйөн, тöдмавны эз вермы.

И öні öдвакö гайка личöдысьыд сюрас. Андрей заводитліс выльысь думнас корны вежаньсö. Мед сылөн бур ловыс отсалас, индас пакöсьт вöчысьсö. Кор Ягдорысь ненога вöтлісны, корліс жö вежаньсö вöтөн уськöдчывны, велöдны сійöс. И уськöдчыліс öд, асьядорыс нин петкöдчис.

— Енмыс ставсö тöдö и аддзö, мыжаяссö накажитас. Тэ эн шогсы, уджыд сюрас. Йöзыс асьныс кораласны.

Шуис тайöс и вошис син водзысь. Андрей сэки папаліс да дыр куйліс восьса синмөн, думайтіс. Думьяссö торкис гөтырыс.

— Тэ век на вольпасын? Талун карö вöлі кöсьян лэччывны.

— Да, да.

Андрей звирк чеччис да кутіс зіля пасьтасыны. Талун нюжмасыны вольпасын оз позь. Колö туйö лөсьöдчыны.

Лэччылöм бöрын унаысь на тöд вылас усьлісны вежаньыслөн кывьясыс. Кöсйис гөгөрвоны, мый зілис висьтавлы сійö. Коді коралас удж вылö? Кутшöм кывкутöм лоö сійö жö Швановалы?

Сэки майшасис, öні, дерт, гөгөрвоана. Сійöс öбöдитысьясöс Енмыс накажитіс. А удж вылö збыльысь йöзыс корисны. Мыйла либö корисны? Медем йөткыштны-вөрзьöдны овмөссö бурланьö да ассьыс юрсö воштіс?

Бурдöдчанінö волысь милиционерыд кытшовтіс Одьюсö. Сёрнитіс йөзкöд, но пакöсьт вöчысьсö эз аддзы.

А Тоня Микушева кывлöма Игнатовлысь доймöмсö да нимкодясис. «Тайö медея бур юөр. Сылы сідз и колö! Енмыс кыліс менсьым бөрдомöс! Сöмын доймöма? Ок, эськö, верми кö!.. Менö шыбитіс ковтöм ветьököс моз. Водзöс, водзöс пыдди доймöмыс лои! Сэки компот кружкасö гутöдіс. Эськö важөн нин водзöссö лои босьтöма! Синмөн видзöдны ог вермы, пельөн медеясся ог кывлы сы йылысь!»

Тоня унаысь кöсйыліс шыбитны юрсыыс Игнатовöс. Вежорнас гөгөрвоис, мый налөн туйыс важөн вожа. Пöрысьмис нин, но нинöм аскöдыс вöчны эз вермы. Первой радейтіс, а сэсса чужис сы ыджада лöглун, мый ас ку пиас эз төр. Оліс öтнас, некодкöд олөмсö эз сяммы йитны. Та вöсна нöшта на вежсис этшыс. Лои шогмытöм, но ыджыд пакöсьт вылö мунны эз нин лысыт.

Сөмын вермис броткыны да лөгаддза радлыны. И ставсө, мый свет вылас эм, скөрйивсьыс ёрис.

Путкыльтчылөм бөрын Игнатов дугдїс өтнас ветлыны, «уазик» вылө пуксьөдїс торъя шоперөс. Медым машинаыс дөзёор улын оліс. Кодкө кө лөгалө, шопер дырйиыд пакөсьтсө вөчны лоө сьөкыдджык. Оз кө кыйөдны да пищальысь төддытөг лыйны. Татшөмторйыс вермас жө лоны. Öнї странаын тадзи и став олөмыс мунө. Бандит чукөръяс ыджыдалөны, виалөны, нөйтөны, мырдөналөны.

Öти пөрйө Андрей Васильевич заводитіс катласьны: «Гашкө, эновтчыны уджсьыс, мунны Одъюысь? Мед оласны, кыз ку-жөны».

4

Быттьө төдөмаөсь, регыд минсельхозсянь воис телеграмма. Министр корис ас дорас аски жө дас час лунө. Игнатов лөсьөд-чис лэччыны карө. Костюмасис, весиг галстук голяас пысаліс, рөмпөштан водзын шыльөдчис. Думыштїс на: парикмахерскөйө колө пыравны юрсисө шырны.

— Гашкө, министрыд ас дорас босьтас?— кор нин кышаліс вылыс паськөмсө шыасис гөтырыс.

— Эн сөр.

— А мый? Он шогмы али мый? Төндзи вөлі вөзйөны министрө вежысьө, да кинад и кокнад пыксин. Йөйталін, жаль лои эновтны Ягдорсө. Мунін кө эськө, татшөм «путчыс» эз ло. Öнї, гашкө, ачыд нин министралін?

— Ладнө, тыдовтчас, мыйла корө.

Кык час мысти Игнатов пырис министрлөн приёмнойө. Олөма нин секретарша пыр и дзугыльмөдїс сійөс.

— Павел Дмитриевичөс корисны Правительствоө.

— Дыр кежлө?

— Эз висьтав, тыдалө, ачыс оз төд.

— Сїдзкө, кытшовта отделясьөд. Локтас кө министрыд, чукөс-танныд.

— Бур.

Андрей сёрнитіс минсельхозса специалистъяскөд. Пажнайтіс, а министр век на абу. Виччысигад кадыд дыр кыссьө. Пырис кадрьясөн юрнуөдысь дорө.

— Зэв бур, мый пырин,— воча сувтіс сійө.— Звөнитліс министр: Правительствоын налөн уджыс рыгөдз пө кыссяс, тшөктіс меным тэкөд сёрнитны.

— Мый кузя? Ме со лунтыр танї довъяла.

— Министр вөзйө тэныд веськөдлыны Карбердса порсь видзан овмөсөн.

— Виччысьтөм вөзйөм.

— Мый шуанныд?

— Öдвакө кутчыся.

— Ме думысь, оз ков пыр жө орөдны. Дерт, сьөкыд овмөс, уджыс сэнї дзугсьөма. Öнїя веськөдлысь эз сяммы уджсө кытырны, тшөкыда адзылөны код юраөн.

— Семьяысь торйөн общагаын овны?

— Патератö сетасны. Думышт, сэсся звöнитлан министрлы либö меным.

Игнатов дусыд чужöмөн петис минсельхоз керкаысь. Пуксис «уазикö» шоперкöд орччөн да кутис мөвпавны. Лов вылас, кыз шулоны, каньяс парсасьоны. Телеграммасö лыддьöм бöрын чайтис, мый министр вöзьяс сылы бурджык, ыджыдджык чина удж. Шуам, корас аслас вежысьö. Водзын, гоз-мöд во сайын, сылы тайöс вöзйылисны нин. Со гöтырыс карö мöдöдчигас на казътыштис. Сэки Игнатов збыльысь пыксис, эз окотит эновтны Ягдорса овмöс, а вөлөмкö, весьшөрö. Тöдiс кö, мый сыкöд ягдорсаяс вöчасны, дерт жö, мунис. Öнi ачыс виччысис, но со мöд вöзйöм. Бара сэтшöм удж, кöни узьöм ни олөм. Бурджык нин Одьюо кольччыны. Овмöсыс ичöt, сiдзкö и тöждсö Карбердсакöд он öткодяв. Сöмын пакöсьт вöчысь либö вöчысьяс эмöсь. Гашкö, удайтчас найöс тшапнитны? А оз кö?

А Карбердас олөмыс лөнъджык? Öдвакö, Карбердад унджык на шпанаыс.

Гöтырыс, Лариса Матвеевна, Карбердö мунöм йылысь весиг кывзыны эз кут.

— Ме сэтчö ог мун!

— Тэнö öд некод сэтчö оз мöдöд. Менö коралöны уджавны.

— Юр пудъялөм кодь!

— Ог тöд, меным абу жö окота кöсйысьны.

— Сiдзкö, звöнит да öткажитчи. Ме эськö киөн и кокөн пыкси, аддзöмаöсь ййöс!

Министр дорö Андрей Васильевич эз шыась, вежавидзтис. Звöнитис кадръяс юкөнөн веськöдлысьлы, öткажитчис мунöмысь. Трубкасö пуктис да морöс пытшкас личмунi. «Öти майшасьöм быри»,— мөвпыштис ас кежысь.

Мöд лун асылö лов вылас шукöб*.

— Бара вöталi лёк вöt,— шыасис гöтыр дорö.— Асьявылыс нин гöри сьöд вөлөн да картупель сюялi.

— Сьöлышт, эн думайт.

— Ог эськö кöсйи думайтны, но лёкыс ачыс юрö воö, сьöлөмöй абу местаын. Мед эськö Иванкöд да Тасякöд ставыс лючки, нинöм эз ло.

— Ен отсöгөн, эн асьтö думъяснас пöдты. Пуксы сёйышт, Одьюад каян кад матыстчö.

Но тайö асылö Одьюö кайöм эз ло. Муртса удитис нуръясьыштны, звöнитисны Важтыбоксянь. Мамыс, Анфиса Ивановна, чорыда висьмöма.

Чуланын, кöни коркö эновтис таладор югыдсö батыс, öнi куйлис мамыс. Сьökыд висьöмыс топöдöма нывбабасö сiдз, мый öдва поиктö**.

Полiгтырйи, лов шысö дзебиг, ыджыд сьöлөм дойөн Андрей матыстчис крöвать дорö. Небыдика кутыштлис мамыслысь кисö да весиг дрöгнитис: кöдзыд, чайтис кулöма нин, но Анфиса Ивановна востис синсö.

— Пиук,— шыасис сйö.— Воин, ме виччыси, ёна виччыси. Прöстит ставсыс, гашкö, коркö öбöдитлi. Олöй чой-вокыдкöд

* Шукöб (диал.) — деливö.

** Поиктны (диал.) — сьökыда лаваны.

өтсөгласөн. Төд, сөмын ас рөдвуж, ас семьяын выныс, видзөй сійөс. Тэ менам мам пи, та понда и бөръя кывсө тэныд висьтала. Тэ вылө лача кута.

— Эн тадз сёрнит,— торкис мамсө Андрей.— Тэ бурдан, чеччан вольпасьсыд, внукъястө водзө кутан лелькуйтны.

Андрей шуалис ышөдана кывъяс, кодъяслы весиг ачыс эз эскы. Мамыс бөръя аддзысьлөмсянь, страсьт, ёна омөльтчөма. Чужөмыс сьөд пөв сяма лөма. Син дорыс вөйөма, сэрапом кодь. И лолалө сьөкыда, киргөмөн лолалө.

Андрей аслас удж вөсна пыр вөлі оз эшты. Сылы некор, век мыйкө падмөдліс. Уджыс эз и помасьлы, эз эштыв, а мамыс со куланвыйын. Гежөда вохлыліс видлыны. Тайөс вөлись өні гөгөрвоис, кор мамыс эз нин вермы вөрзөдчыны, өстатки эбөсыс бырөма да.

Андрей чужөм вылын төдчис ыджыд шогалөм, ёна шогсьөм! Сійө выльысь кутыштіс мамыслысь кисө, пидзөсчанясис да сыркъялөмөн бөрддзис. Зунгысис, дзедис чужөмсө мамыс эшкынө. Синваыс шорөн визувтіс, көтөдіс еджыд вевттөдсө. Синсө эз лэптыв, сылы чайтсис, мый лэптас кө юрсө, паныдалас мамыслысь дивитана видзөдлассө. Сійө кыліс мамыс водзын ассьыс мыжсө. Мыйла эновтіс, эз кад вылө вохы. И таысь асьсө өні лыддис мыжаөн.

— Öнюш, мый тэкөд?— кыліс мамыслөн небыдик шөпкөм.— Лөньөдчы, Ен тэкөд. Видзөдлы ме вылө.

Андрей лэптіс юрсө. Мам синмын эз тыдав весиг войт мында көритөм.

Анфиса Ивановна сьөкыда нюмдіс. Бөръя лов шыөдз сійө зіліс сетны пиыслы лача. Мед сөмын сьлөн ставыс лои лючки, а аслас? Аслас син водзас ставыс нин бергаліс. Йиркыс, шпалера стенмыс, крөвать дорын сулалысь шкапыс...

Со выліыс югдіс, воссис. Анфиса Ивановна осьсаинас и кыпөдчис быттө, лэбзис мича, лөз енэжлань, өдйө лэбзис. Аддзис веж коръя пуяс, дзользысь лэбачьясөс. Воськаліс ас Закарсиктө. Паныдасис читкыль сьөд юрсиа зонкөд. Зонмыс мыччис кисө.

— Василей,— шөпкө Анфиса.— Тэ тани?

— Ме важөн тани, виччыся тэнө.

— Локта, локта,— Анфиса воча нюжөдіс кисө.

Зільө матыстчыны верөс дорас, но кодкө быттө кутө сійөс, оз лэдз. Видзөдө: платтө бөждорас кутчысьөма коркөя пөрысь чиганкаыс.

— Эн матыстчы сы дөрө. Вунөдін, кыдзи ськөд олін? Суетнөя, лөжнөя, сьөкыда олін! Мыйта челядь йывтінныд, аслыд личөдыс здук эз вөв.

— Челядьыс и радлуныс лои. Эн менө кут,— Анфиса зільө мездысьны чиганкаысь, нетшыштчө.— Ме сійөс радейтлі...

Анфиса Ивановна зіліс апыштны сынөдсө, но лолыс эз шед. Отчыд, мөдысь, сэсса нюжөдчис да лөнис. Лөнис пыр кежлө.

Кыпыд чужөмөн куйліс Анфиса Ивановна. Быттө став төждыс бырөма, быттө став уджсө лои вөчөма.

Андрей сулаліс мам дінас. Тюрисны синва войтъяс. Исковтісны бан бокөд, веськалісны вомө. Курыд, курыд синваыс.

Верстьөнас сійө тырвыйө бөрдіс мөдысь. Первой батысьө дзедигөн, мөдысьсө өні...

Коли вежон, Игнатов удж кузя могөн лэччис карё. Пырис минсельхозё да коридорын паныдасис министркөд.

— Пырав ме дорё,— кисё мыччыліс сійё.

Игнатов вётчис министр бёрся. Пуксис индём улос выло да кутіс виччысьны. А министр мыйкё дыра чөв оліс. Гашкё, мөвпаліс, мыйсянь сёрнисё панны. Андрей Васильевич гөгөрвоис нин тайос, но ачыс сёрнинас эз водзмөстчы.

— Тэ збыльысь пыксян Карбердё мунөмысь?

— Да.

— Мезды менё өти шогысь. Сэтчөс овмөсас уджыс некытчө туйтөм. Веськөддысьбөс вежысь абу. Тэ сэні верман асьтө петкөддыны, Одьюад тэтөг оласны.

Министр неуна ланьтыштліс. Думсьыс, тыдалё, виччысис, кутшөм ногөн Игнатов паныдалас сылысь кывъяссө.

— Патератё сетам,— содтіс сійё.

— Кытысь? Ме Карбердё овны ог мун.

— Сыктывкарысь, куим жыръяёс,— министр регыдик чөв оліс. Сэссия веськыда видзөдліс синмас Игнатовлы.— Но мый, босьтчам?

Андрей Васильевич ыджыда ышловзис. Окота эськө министрлы нбылыд мунны. Сылы өні абу жө кокни. Со ставыс киссьө. А мөдарё кө, Игнатов асьсө рыё тойлалё. Оз кыскы сійөс Карбердса овмөс. Оз, но колё кодарё кө сетчыны, чорыд кыв шуны. Воча пукалысьыс виччысьө. Откажитчыны чорыда нин али көсийысьны? Думайтис, весиг пөсь кымөсас чепөсйис. Быттьө дыр нюжаліс костыс. Сідз сылы чайтсис, но коли сөмын некымын здук, гашкё, этшаджык на. Медбөрын век жө пычиктіс ас пытшсьыс.

— Да.

Көсийысьөмыс артмис сьөкыда, асьсө мырдөналөмөн. Эз пыр и казав министрлысь чургөдөм кисё. Ассьыс воча мыччыліс да майшасигтырйи и петіс жырсьыс.

«Мый ме вөчи? Ас окота серти сы ыджда сійөс голяё пысалі. Ой, лёка вөчи, карса патера выло ышти. Лёка вөчи!— Андрей Васильевич каитчигмоз восьлаліс минсельхозса коридорөд.

Лариса Матвеевна верөсыслысь Карбердө мунны көсийысьөмсө эз ошкы.

— Ме ог лэччы!— орөдіс сійё.— Төндзи нин шулі. Ачыд ланьтлін мунөмысь, а министр дорын сылін, нбылыд сетчин. Мед кодөскө мөдөс корсяс! Йөйтө аддзөмаөсь, безотказнойөс!

— Көсийыси да, ковмас мунны. Бөр кывйөс босьтны абу лөсьыд. Сэссия бара жө, патерасө мөд ног он босьт.

— Тані олам.

— Тані ме овны ог көсийы. Ме өд абу на пенсионер, дыр на колё уджавны.

— Сідзкө, мун да өтнад уджав и ов!

— Ола!— воча дөзмис Андрей Васильевич.— Ковмас кө, выльысь гөтрася!

— Видлы! Эськө бугыльтө лукйышта!

Одьюын эз жө ошкыны Игнатовлысь карё лэччыны мөдөдчөмсө. Кызвын уджалысьыс эз көсийы лэдзны директорөс.

— Уджав тани, патератö карсыд асьным тэныд ньобам.

— Ог лэдзöй, овмöстö кө некод оз примит, кытчö мунап?

Андрей Васильевич йöзöс гөгөрвоис. Сы дырйи найö кутисны бурджыка овны. Кутшöмкө лача кутисны аския лун вылö. Полисны, мый сы мунöм бöрын ставыс ваяс бергöдчас.

— Ваяс оз бергöдчы,— такöдiс сийö полысьясöс.— Тi асьныд нин он лэдзчысьöй, водзö кутанныд нырчыны.

— А кодi татчö директоравны локтас?

— Татчö öдвакö кодкö бокысь сурас. Зоотехникыды ковмас кутчысьны. Тi сылы отсаланныд.

Андрей Васильевич пöкөрйтчис нин ловнас, мый Карбердö мунап. Эз ёнасö майшась, весиг нюмтор йöзкöд сёрнитигөн петавлис.

Но öти паныдасьлөм бара на йирыштiс морöс пытшсö. Рытладорыс петiс кантораысь. Мöдöдчис гортас, Ягдорö. Шоперыс пукалис нин ас местаас. Друг машина сайысь петiс Пустышев. Игнатовлы нырас паркнитiс вина дук.

— Чолөм.

— Но, чолөм.

— Муна-ан?— Пустышевöс сутшиктöдiс.— Правильнö, тани кө дырджык уджалан, олöмтö ворссиян.

— Мыйла ворссия?— чуймис Игнатов.

— Вунöдiн прокурор дорö шыöдчылöмтö, кор тай депутаталiн. Тэ вöсна ме срок нажöвитi. Көть условнö, но лои мыждөм мортөн. Көсйи сиктсöветö юравны кутчысьны, сöмын öдзöсö петкöдлисны: судимöй пö. Тэ вöсна, дзик тэ вöсна менам туйыс тупкысис!

— Гашкö, тэ и машина көлесаыслысь гайкаяссö разин? Падла, ме тöлысь бурдöдчи! А кыддза рас дорад лыйсьöмыс тэнаджö удж?!— дözмис Игнатов.

— Тайö этша на, лыйöмыс вöли öлөдөм, повзьöдөм ради. Көсйи кө, сэтчö и тiмбыльтi, кыз рас дорас эськö чергöдчин.

— Ме милициялы висьтала. А мый судитöма лоин, ачыд мыжа. Эн ыршась ружьён бур йöз вылö.

— Ха, ха, ха. Висьтав, он докажит! Так что, пока ловъя, уматывайтчы öдйöджык! Ачым мыжа., тэ, тэ мыжа!— Пустышев здук кезлö мурч курчис парсö да водзö нуöдiс.— Да, нöшта öтитор. Меысь öдтор на эм тэнö мöдарьюгыдас мöдöдысьыс.

— Кодi?

— Ог висьтав, ачыд тöдан, кодлысь гач зепсö дукöсьтiн!

Пустышев зумыштчис, сулалис Игнатовлы паныд да эз и думайт вешйыны. Сийö, кыз көсйысьлис Петровлы, эз кут явитны, паськөдны сыкөд сёрнисö. Сэки Петровыд, кор паныдасисны карса уличын, ёна норасис: ме пö Игнатовсö удж вылö босьтли. Весиг медаль сетли, а сийö, пасибö пыдди, кляуза ме вылö чукөртiс, быдса досье. Сэссия сы местаö директоравны пуксис. Эз кө көсйысь, эськö сийöс некод эз вешты удж вылысь. Сы вöсна ковмис мунны Карбердö да муртса сутуга сайö эз веськав. Уджалис кө Ягдорын, эськö Карбердын моз милицияыд эз кыскав. Сийö, сийö мыжа! Менсым пö олөмöс урсалис! Менам пö сылы дасьтöма нин кык быгзян дзоридз!

Петров сэки копыртчыштлис Пустышевлы дзик пель дорас да шöпнитiс:

— Төддытөгүс сьылдзирсө бергөд. Одьюад олігөн кокниа позьö тайöс вöчны.

Пустышев Петровкөд важөн төдса. Гусьөн гоз-мөдысь өтлаын йөра кыйны ветлісны. Радпырысь көсйысис Пустышев и эз дыр нюжөдчы. Регыд мысти и матыстчыліс машина дорас. Чайтіс, мый Игнатов «уазик» улө и чермунө. И збыльысь сьылдзирйыс песовтчас. Петровлөн кык дзоридзыс эськө згөдитчис.

— Сука! Весась туй вывсьыс!— Игнатов чабыртліс кулаксө, ырыштчыліс лөсыштны техноруклы бан бокас, но кутчысис. Пустышев сы дорысь төдчымөн ыджыд да ён вөлі. И вина юан другьясыс матынөсь.

Игнатов чорыда ёрчыштіс, а Пустышев бара букыштчис да веськөдчис неылын сулалысь «кунг» дорө. Ыджыд, вөр пөрөдысь-ясөс новлөдлан машина виччысис мир туй бокин.

Овмөс сдایتан лунө кантора вөлі уна йөза. Министрөс вержысьлы, коді воис Одьюө асывсянныс, бура дыр ковмис сёрнитны, корны, медым лэдзисны Игнатовөс выль удж вылө. Висьталіс, мый виччысьö сійөс ыджыд овмөс.

Андрей тшөтш жө подулаліс мунөмлысь коланлунсө. Медбөрын лои көсйысьны, мый оз нэм кежлө мун, кутшөмкө кад мысти бөр локтас Одьюө. Сөмын та бөрын шуисны лэдзны Игнатовөс...

Дасөд глава

1

Андрейөс овмөдісны СПТУ-са общагалөн ичөтик жырйө.

— Регыдик кежлө,— такөдіс минсельхозын кадръяс юкөнса веськөддысь.— Корсям патера, да вуджан сэтчө.

Сэки Сыктывкарын уна патераа керкаяс кыпөдісны гежөда. Сьөмөн дзескыда олісны пөшти ставөн: ас вылө уджалысьяс, керка кыпөдысьяс, прөстөй йөз, но Игнатов кутіс лача, мый сьөм сюрас. Эскис чина йөзлы да сьөлөмсянь босьтчис уджө.

Овмөсыс сэтшөма нин эңдөма, кытчө он кутчысь, сэті и орө-резьдө. Став техникаыс, машина-тракторыс важөсь, босьтавлөмаөсь Петров дырйи на. А тайө 1985 воясын, дас өти, дас кык во сайын.

Важ машинаяс видзтісны уна ломтас-мавтас, тшөкыда жугласисны. Налы помся лоө корсьны запчасьт. Та дырйи бурджык шопер-трактористъяс пышйисны мөд удж вылө, көні быд төлысь мынтысисны сьөмөн. Унаөн вуджисны Эжва районө, ЛПК-са овмөсө. Төлка специалистъяслөн мөдлаө пышйөм лои медея ыджыд воштөмөн. Көть кутшөм бур техника эз вөв, көть кутшөм бур сөян-юан польбяслы эн лөсьөд, абу кө ыджыд мывкыда да кывкутысь уджалысь, омөля чеччалан, водзлань воськов оз ло.

Медея ыджыд могыс Игнатовлөн сэки лои — корсьны төлкаджык уджалысьясөс да быд лун вердны польбясөс. Пемөсьясыс эз нин уна вөвны. Комиын нянь эз быдгыны, а вына көрымсө судзөдөм вылө сьөм эз тырмы. Та вөсна водзджык нин юр лыдсө чинтылөмаөсь. Уджалысьясыс казъывлісны: овлө пө вөлі, мый кык лунөдз оз вердчыны. Көрымыс абу да, карта өдзөссө

оз восьтыны, мед порсыясыс оз шызыны. Тайо сёрниясыс Андрей Васильевичлысь сьолөмсö зэв ёна дойдлісны. Сійö эз аддзы татшөм оломысь петан туйсö, и чуйдысьыс эз вöв. Одыюын кө ставыс вöлі гөгөрвоана, ставыс ас саяд, кызди уджалан, сідз и олан, тані дзик мөд пөлөс серпас. Медвойдөр коліс бура вердны порсыясöс, медым босьтны яй, кодөс позис вузавны да нажөвитны сьом. Та дырйи дзоньтавны киссьыны заводитөм техника, оборудование да скөт картаяс. А мый вылө вына көрымсö ньобан? Эн кө быдты польөсö. Мый вылө? Первой колө быдтыны, вердны-юктавны, сэсса вöлись нин юасыны нажөткасö. Тайос Игнатов зілис вайөдны минсельхозын пукалысь чинаяс пельөдз, но сылөн сёрниыс эз имит.

Эз вöв бурджык серпасыс и мөс картаын. Кыксё юр видзисны, медым посни польөясöс йөлөн юктавны.

Гожөмнас чукөртлісны турун пуктан бригада. Унджык видзыс вöлі ю сайын. Вуджөдчыны нинөмөн, овмөсса катер жугалөма. Та вөсна Игнатов шыөдчис районөн юрнуөдысь дорö. Корис сетны таладорсьыс видзсö, кодөс водзті пуктыліс Эжваса чипан фабрика. Сэки фабрикаыс тупкыса нин вöлі. Игнатовлысь корөмсö могмөдісны, и карбердсаяс заводитісны лөсьөдчыны петны видз вылө.

Өтчыд котөрөн локтіс агроном Татьяна Павлова, аштөма.

— Андрей Васильевич, сетөм видзтö ытшкө карса овмөс. Директор Агапов тшөктөма пара лунөн ытшкыны, куртны да уль турунсö вайны аслыныс скөт карта дорö.

— Збыль?

— Ог жö пөрийөдды. Агаповыс сідз и шуөма механизаторьясыслы.

— Ветлам видз вылас.

Овмөсса «Волгаөн» мунісны ытшкысьяс дорö. Вильмөдөм видзьяс юклөма нель, вит гектара торьяс вылө. Некымын юкөн ытшкөма нин. Видз кузя ветлөдіс косаа трактор да куртан машина.

— Со өд мый вөчөны!— агроном дөзмөпырысь шавксьөдіс ытшкысь трактор дорö, өвтыштіс кинас.— Сувт! Сувт!

Тракторист, томиник зон, сувтөдіс көрт вөвсö. Татьяна Павлова пыр жö заводитіс пинявны морттö.

— Ті мыйла гусяянныд?! Тайö видзьяссö районса администрация сетіс миянлы. Тіянөс кабааөн водзвыв вöлі өлөдөма.

— Водзын ми ытшкылім.

— Водзын ті ытшкынныд сеттөгыс, ас наукөн.

— Миянөс директор мөдөдіс, со бригадырыс,— индіс тракторист куртан машина дорын сулалысь мужичөй вылө.— Сыкөд сёрнит.

Павлова тэрыба матыстчис бригадир дорö. Кинас шенасьөмөн заводитіс пинявны, тшөктіс энөвтчыны ытшкөмысь. Мөдыс кутіс нурдысьны: ытшкөмсö пö көть нуам, но Павлова сійос эз кывзы. Эз повзьөд бригадирлөн аслас веськөдлысьлы звөнитөм. Павлова чорыда кывкөрталіс:

— Ме милицияö заявление сета!

Игнатов дөзмис жö Агаповлөн вывтіасьөмысь. «Асьсö вылө пуктö. Көнкө оз лыдды коланаөн мекөд сёрнитны. Кутас началь-

стволы триньгыны,— ас кежысь думыштіс сійё.— Агроном молодеч, эз повззы».

Андрей Васильевич пукаліс машиналөн воддза пуклос вылас. Карбердө пыригөн лэдзис өшинь стеклосө. Нырас паркмуни аслысполос чоскыдтом дук.

— Бара нин порсь картасянь төлыс пөльтө,— бергөдчыліс агрономлань.

— Слесарьяс, тыдалө, куйөд васө ортсө лэдзөны,— Павлова көрліс нырсө.

— А мый вөчан? Картасө стрөйтөмаөсь увтас местаө, сөй гуранө. Нөшта куйөд воргаяссө кодйөмаөсь куим метр джуджда. Куйөд пыдди унджык чукөрмө веркөса ваыс. Водзын, кор бура олісны, тырмымөн вөлі машина, удитісны васө петкөдны муяс вылө. А өні киссьөм машинаяснад этша мый вөчан. Со гусьөн и качнитөны ортсө. Он кө, чошөясыс кутасны больөдчыны көдзыд няйт ва пытшкас. Колө эськө выльмөдны картаяссө, кыпөдны, медым васьыс мездьсыны. Вьль технология пыртны, но кыдзи? Минсельхозса чинаяс сөмын кисө паськөдлөны: сьөмыс пө абу.

— Не кө порсь картасянь да ЛПК-сянь лөк дукуыс тані, Карбердас, позьө вөчны шөйччан местаяс. Сиктыс пуксьөма джуджыд кыр йылө, Эжва пөлөн. Кыр йывсяныыс со Эжваыслөн отыс шыльквидзө-ворсөдчө югыд шонді улын. Мөдар берегас веж корьясөн ворсөдчөны кыдзьяс, пельсыяс. Со и тані туй бокас пельсь пуяс быдмөны, гөрд розьяс өшалөны, ловтө кышөдөны. И быд керка дорын веж пуяс, весиг уна патераа керкаяс дорө садитлөмаөсь. А сиктыс ачыс кыдзи пуксьөма! Вывтас да увтас, вывтас да увтас. Төвнас лыжи вылын гөра горувсө позьө шутөвтны. Сөмын кутчысь, мед ю шөрөдз, осьса инөдз он искөвт. Кыті тай ЛПК-ыслөн шоньд ваыс визувтө.

— Татьяна,— Игнатов нюмсорөн видзөліс агроном вылө.— Тэ он-ө кывбурась?

— Шуан жө.

— А мый? И нывбабаяс унаөн гижөны.

— Ог, ог гиж,— Павлова бергөдіс юрсө өшиньялань. Төдчөдіс, мый та йылысь оз көйы водзө сёрнитны.

Овмөсса кантора дорөдз воисны чөла.

Веськөдлысьлөн жырийө пырөмкөд тшөтш помся кутіс триньгыны телефон. Первой звөнитіс Агапов. Грөзитчис, медбөрын этшыс раммыштіс да, джын видзсө корис аслыс пуктыны. Кор Игнатов өткажитіс, кутісны звөнитны управлениесянь, министрствосянь, но и та пөрийө Игнатов налы ньылыд эз мун.

— Эз кө гусьөн, шыш моз пыр видз вылас, позис сёрнитчыны, но өні сёрниыс оз ло. Агроном милицияө нин шыөдчис.

Агапов кыкысь на шыасьліс, грөзитчис ыджыд чина йөзөн. Скөрысь и помаліс сёрнисө.

Пиньясьмөмөн босьтөм видз Павлова өдйө ытшкөдіс, куртөдіс да прессуйтөдіс. Чукөртісны тьокьяссө некымынлаө да тэчисны. Мед арся зэрьяс эз бакшөдны тьок вывсө, сигөртісны турунөн. Тайө гожөмын көрымсө сюраньяслы лои заптөма бура төвйөмөн.

Коркө сэсса Агапов паныдасис минсельхозын. Зэв скөрысь чөвтліс синсө Игнатов вылө, эз шыасьлы. Лөгыс петө, милицияд корлөмаөсь да.

Карбердса порсь видзан овмөс сьокыд, воыстөм ноп моз өшаліс. Нуны он вермы, гөйгыд вөрзяс, и шыбитны жаль. Муртса заводитас вывлань кыпөдчыштны, бара нин мыйкө сконйыштас. Нөшта кантораса уджалысьяс аслыспөлөсөсь. Медвойдөр зілісны могмөдны ассыныс олан төжд-могсө. Но вөчисны тайөс ас ногыс.

Игнатовлөн овмөсө локтөмсянь асывсяныыс өдзөс дорын черед сулалө. Ставныс сылысь сьөм пычкөны: коркө пө нажөвитлім да, эз сетлыны. Овмөссө кө примитін, мынтысь. А воддза веськөдлысьыс йөзсө нарошнө ыстө, дэльөдө.

— Мунөй, камөдчөмөн корөй сьөмтө. Тян эм та вылө инөд!

И локтісны, камөдчисны. Игнатов зіліс асьсө кутны, эз лөксы. Көть эськө тайө зэв сьокыда сетчис. Мукөддырйи окота вөлі наян мужиксө шошукөдыс жырйысь петкөдны, корны милицияөс, но татшөм мөвпсө пыр жө шыбитліс юрсыс. Муніс министр дорө. Сөмын сы вылө вермис кутны кутшөмкө надея. И збылысь, волөмыс эз ло весьшөрө. Министр тшөктіс гижны шыөдчөм, мый кузя колана сьөм овмөслы позис сетны дотация весьтө водзвыв. Быд кило яй вузалөмысь оланпас серти овмөс босьтліс сьөмөн неыджыд дотация. Тайө сьөмсө и сетісны. Сы отсөгөн и вештіс уджйөзсө.

— Мыні чередьясысь,— ошйысис Игнатов министерствоын.

Вөлөмкө, водз на асьсө такөдіс. Друг кутісны воавны орчча обласьтса мужичөйяс. Öвтчөны накладнөйясөн: ми пө ваявлім татчө комбикорм, шобді тусь, но воддза веськөдлысь эз мынтысьлы. Овмөс коли уджйөза, вештысь!

Игнатов кутіс туясьны, кытысь сы мында уджйөзыс прөстөй накладнөйяс серти. Некутшөм гижөда сёрнитчөм өд абу.

Пырис бухгалтерияө, но сэтысь нинөм эз сюр. Ставөн ыстысисны вөвлөм веськөдлысь вылө. Петіс, өдзөссө сиптөм бөрын кодкө гусьөн чукөстіс.

— Андрей Васильевич, матыстчылөй татчө.

Неылын сулаліс бухгалтерияын уджалысь Тамара Павловна, олөма коми нывбаба.

— Лөг петө жуликъяс вылө,— шөпкөдіс сійө.— Ме пенсия вылын нин. Менө тані нинөм оз кут. Позьө талун энөвтны уджсө, но ог вермы терпитны ылөдчысьяссө. Главбухыс да главнөй экономистыс өти гуө кудзалөны, өтув муклюйтөны. Төдөны, вель морттө кокныд бөбйөдлыны. Накладнөя мужикъясыс первой пыралөны главнөй экономист Патракеева дорө, а сэсса вөлісь нин тэ дорө локтөны. Пөрийөг накладнөйсө кырымалө вөвлөм директорыс, а сэсса тэсянь заводитөны сьөм пычкыны. Главнөй бухгалтер Инна Николаевна тэнө эскөдө: вайліс пө көрымсө. Бөрас сьөмнас и юксьоны.

— Аттьө, мый висьталін.

Игнатов дусыдмис. Мый вөчны татшөм жуликъясыскөд? Эз, эз казавлы, мый главбух гуга-бана. Сійө быд асыв висьтавлө, уна-ө сьөм лунтырөн чукөрмис. Юасьө, кытчө веськөдны сьөмсө. Экономист Патракеева зэв аслыспөлөс морт, куш киөн он босьт. Чуньтө вомас эн суй, латшкөбтас да чуньтөг колян. Казявліс өд, казявліс, кыдзи төдтөм мужикъяс пырөны-петөны Патракеева дорысь, но думыштны эз куж, мый шөр специалист, кодлөн могыс сөвмөдны овмөссө, вермас нөшта на содтыны уджйөзсө.

Игнатов думайтис, сы пытшкын муніс ыджыд вен. Ачыс дөж-насис, мый эз казав главбухлысь да шөр экономистлысь муклюй-төмсө, некор эз терпитлы наян йөзсө, вывтасьсыяссө. И со мый сы ныр улын вөлөмкө вөчсьө! Тайос өмөй поэьо кольны сідз?! Оз! Игнатов думнас корсис петан туй. Главбухос өні оз вөрзёд, а Патракеевакөд колө мыйкө вөчны.

Лун-мөд мысти корис сійос ас дорас да мыччис кабала.

— Тайө мый?

— Тайө тэнад менам ним выло удж вылысь мунөм кузя шы-өдчөм.

— Ме некытчө ог мун!

— Мөвпыштлы, бурджык мунны, и тэ төдан мыйла.

— Ме тані уджала овмөс котыртөмсянь. Менам тэ дорысь ыджыдджык правоис кольчыны. Он кө төр, ачыд мун!

— Тэ көсьян, медем ме шыөдчи милицияө?

Патракеева пыркнитчис, кыв шүтөг чеччис улөс вылысь, круп-крап петіс жырйысь. «Нөшта өти враг лои»,— шогпырысь мөвпыштис Игнатов.

Мөд луннас экономист вайис удж вылысь мунөм йылысь шыөдчөм.

Игнатов юксис министркөд аслас төждъясөн. Мөдыс дыр эз думайт.

— Аддзөма мыйысь шогсьыны. Баба — доддысь, көбылалы кокныдджык.

— Сідз эськө, но менам аслам отсасысьяс абуөсь. Ме Карбердө локті өтнам. Бурджык специалистыс мунөма. Коді вермө, сійө и пышйө. Муніс кө да инасис мөд удж выло, бөрсө оз нин лок. А төлка специалистсө кысь корсян? Мыйөн бокиса том мортсө ышөдан резьдөм овмөсө воны? Съом абу, патера сетны он вермы, мыйөн?

Колины сөмын найө, кодъяс муклюйтөмөн зильоны өстаткисө овмөсысь нетшыштны. Либө найө, кодъяс сяммөны сөмын дзайгыны: вай сьом. Та дырйи асьныс кивыль оз вартны, медем мыйкө вөчны, бурмөдны асьыныс уджсө. Та понда тшөтш и видз-му овмөсыс киссьөмөн киссьө.

Игнатов корсьысис, юасис томъясөс и оломаджык йөзөс, кодъяс эськө вермисны на уджыштны. Воліс весиг Петров дорө, коді Закарсиктса овмөсысь мунөм бөрын петіс пенсия выло. Мыйкө дыра оліс аслас чужанінын, Ване грездын, вылысь тшупөм керкаын. Во куйм, гашкө, унджык ашөр овмөс видзис, но бөръя кадас вузалис пемөсьяссө да локтіс гөтырыскөд Карбердө овны. Коркө сылы татысь сетлісны патера.

Паныдаліс Петров көдзыда.

— Мый мөгөн?

Игнатов выло сук дзормөм синкым увсянь видзөдіс крепыд тушаа олома мужичөй. Гөрба нырыс нөшта на лэччыштөма увлань да быттө кызыштөма. «Эм на вын-порокыс»,— думыштис Андрей.

— Көсья отсөг корны. Тэ татчөс овмөсын уджавлін. Төдан йөзсө и ладсө. Гашкө, волан мыйкө дыра кежлө?

— Йөз пельпом вылын райө көсьян кайны? Али ыджыдджык чинө метитан? Ачыд уджав! Ме кута пессыны-котравны, а тэныд славаис?! Министрыд кө коралис, сылысь и кор отсөгсө!

— Меным водз на райо кайны, оз виччысьны. И слаvasо йоз кион да юрон ог косий шедодны. Просто, чайти, тэныд татчос овмосыс абу дзик боковой. Сы понда и пыри тэ доро. Кора проща, мый ылавсьома...

Петров бугжыльтчис, бергодчис мышкөн. И пеляс бара, коркоя моз, кодко быттьо шопнитис: «Тайо мортыс тэныд погуба выло». Дрогмуні весиг. «Погуба выло?! Оз ло сидз! Меню куш кион он на босыт, асьсо погубита!»,— скорысь мовпыштис сийо.

Игнатов кутчысис одзос вугйо. Синмас тшотш югнитис логлун и пыр жо куси. Чола петис патерасыс. «Мыйла и воли?— думнас видис асьсо Игнатов.— Тодис од, мый Петров сылы нбылыд оз мун, но локтис, медся мустом морт дорю пырис! Погубитчис, некодсянь прамой отсөг эз ло да, сы всна и локтис. Кыдзи вабергачо веськалом морт быд лопсо кватитю, сидз жо сийо уськодчис отсөгла и Петров дорю. Но весьшорю, асьсо сомын син водзас уськодис!»

Игнатов эз тод, мый муртса сы водзвылын татчо волис Патракеева. Норасис да ена зилис вейпны Игнатовос. Петров тшоктис вовлом экономистлы гижны норасяна шыодчюм газето, министр ним выло.

— Кыргызод унджык йозос, мед морччана воли!— велодис сийо Патракееваос.

Водзын, важ министр дырйи на, кор Игнатов уджалис Одьюын, Петров гижлис норасяна письмо. Суклялис сэни сийос, ена суклялис. Мод нимон кырымалис да ыстылис министрсылы. «Водзос босыта,— мовпалис ас кежысь.— Досьесыд водзосыс!» Весьшорю лои, регыд мысти министр вежсис да, некод сы письмо кузя туясьны эз кут.

Но Петров эз косий сьолмнас бурмыны. Патракеевалон воломыс лои кивыв. Важ чусалысь логлуныс выльысь ыпмунис-озйис. «Ягдорын паныд мунис, менам местаю пуксис. Карбердо ме борся локтис. Эз пыр жо, костон, но локтис!— лекодис асьсо.— Мед тодлас и Карбердса овмос! Ягдорысь тодмышкалисны, тани сидзи жо лою! Ачым отсала, ачым!»

2

— Андрей Васильевич, милицияса курсантыс разьоны посни кукьяслы пеноблокысь кыподом карта. Вевтсо кольли сомын вочны. Повйыс эз тырмы да энотчылим,— матыстчис корко овмосса прораб Матвеев.— Ветлам?

Локтисны и адзоны: картаыслысь унджык пайсо разьомаосьнин. Куим том зон совтоны пеноблокьяссю кузола машинаю.

Игнатов шурк-шарк матыстчис совтчысыс дорю.

— Коди тьянлы картасю тшоктис разьны?!

— Начальство.

— Кутшом начальство? Картаыс тайю мян овмослон.

— Асланым, картасю вузалисны Эжваса милицейской училищелы. Ми сэтысь курсантыс.

— Ми эг вузалюй, они жо весасюй татысь! Оно ко, милицияю шыодчам!

Зоньяс лэптыштлисны пельпомсо, солисны орчон сулалысь автобусю да мунисны. Борсяныс вогчис кузола машинаыс.

Игнатов кыпөдіс бухгалтерияын колана кабалаяс. Збыльсы, баланс вылын сулаліс эштөдтөм кук карта, видзөма сы выло сьом. Некутшөм сёрнитчөм Эжваса милиция училищекөд эз сюр.

— Коді сёрнитчис?— заводитіс юасыны Игнатов, но вочакыв-йыс эз вөв. Кодлысь оз юав, сійө и мымляйтө.

— Гиж шыөдчөм милицияө,— чорыда тшөктіс прораблы.— Оз кө отсав тайө, мунам прокурор дорө!

Мөд луннас, пажын гөгөр, Игнатов дорө пырис шопер, Аркадий. Том морт, регыд на армиясыс воөма. Муртса вөлі заводитөма новлөддыны воддза директорсө. Öнi ветлісны бухгалтеркөд юрсиктө.

— Андрей Васильевич, татчө локтігөн гаишникъяс «Волгалысь» номерсө перйисны.

— Мыйла?

— Моторыслөн номерыс пө оз лөсяв, мый машина паспортас пасйөма.

— Оз лөсяв?

— Да, важөн нин вежлөмаось моторсө.

— А водзын гаишникъяс нинөм эз шулыны?

— Эз. Öнi машина пастөгыс ветлыны оз позь. Мырддасыны да нөшта на штрапуйтасыны. Ог төд, мыйөн гортад мунанныд?

— Аддзам, а кыдзи сувтөдісны?

— Сера бедьсө лэптыштлісны и сувті. Пыр жө капот пытшкө пырисны.

— Сідзкө, төдісны, мый моторыс абу аслас.

— Да, кодкө, буракө, удтіс.

Игнатов кутіс корсьны помкасө, мыйла машиналысь босьтісны пассө. Удтыны гаишникъяслы вермис воддза директорыс. Эз бура торйөдчыны. Дерт жө, сійө и кук картасө вузаліс. «Алкашыд» вина доз выло вермис сетны. Сёрнитчөмсө кабала выло эз гижөд. А öнi Игнатов шызыөдіс найөс, вөтліс курсантьястө. Воддза директорыслы абу кивыв зык-шумсө паськөдны, вермасны өд и мыждыны. А ньөбысыс, погонаыс бокө кольө? «Оз,— чорыда думыштіс Игнатов.— Республикаса МВД-ө муна!»

Машинатөг сійө уджавны эз вермы. Звөнитіс ГАИ-са да РОВД-са веськөддысыслы, но телепон пыр өткывъясьөм эз артмы. Сөмын майор-гаишник көшти-пөвті шуис, мый воис индөд: колө пө аддзысылыны РОВД-са веськөддыськөд.

Игнатов ас кежас шумитыштіс на. Лөк кывъясөн казтыліс кузь киа погона йөзөс, овмөсса воддза веськөддысьсө. Көсйис мунны веськыда МВД-са министр дорө, но мөд луннас этшыс лөнис нин. Сөліс «Волгаө» да мөдіс РОВД-ө. Туйвежын гаишникъяс пыр жө сувтөдісны.

— Мыйла торкаланныд туйвивса оланпас?!— стрөга юаліс гаишник.

— Мунам РОВД-са веськөддысь дорө,— вочаасис Игнатов.

— Виччысьлөй, звөнитла.

Здук мысти матыстчис.

— Сөмын юрсиктөдз, тиянөс быд пост вылын кутасыны пасъявны.

РОВД-са начальник подполковник Бочков здоровайтчис. Юаліс, кутшөм мөгөн воис. Дерт, сійө бура төдіс, мыйла воис ов-

мөсса директор, но виччысис, кор ачыс заводитас сёрнисö. Игнатов висътасис.

Бочков сюся видзöдлiс воысьлы синмас. Тыдалö, казялiс, мый позяс öткывъясьны. Сы пыр быдсяма йöзыс мунлiс. Важөн велалiс вöчны морт йылысь кывкöртöд первойя аддзысьöмсянь. Тучнитiс чуньнас пызан бокысь кнопкаö. Пырис секретар, томи-ник нывка.

— Юктöд мянöс чайнад.

Здук мысти нывка пыртiс поднос вылын кык чашка. Коли минут вит, подполковник видзöдлiс часi вылö да лэптiс телефон трубка.

— Кывза,— кылiс трубкаын.

— Ме дорын пукалö бур морт, Андрей Васильевич Игнатов. Колö сылысь корöмсö могмöдны.

— Гөгөрвои.

Подполковник мыччис кисö.

— Ог эшты, министерствоö муна. Машинаыддысь пассö сетасны. Öнi жö пырав ГАИ-ö. Эжваса училищеөн веськöддысь волас. Кор верман сыкöд тöлкуйтны?

— Кöть аски.

— Бур.

«Волгалысь» пассö пыр жö сетiсны.

— Öнi олöмыс сэтшöм, тэ — меным, ме — тэныд,— гаишник синсö дзебигмоз мыччис пассö Игнатовлы.

Игнатов машина пас бергöдöмлы эз радлы. Лов вылас дiльсвидзис, асьсö коритiс. Та дыра кежлö и тырмис веськыдлуныс? Бөръяпом небыд нямöд кодь лои! Повзис погона мортысь. А мöдарö кö, быть öд пов, уджавны колö, а тани кок лапа вылад сувтöны. Кутан ерепенитчыны, панасны кутшöмкö делö да сутуга сайö на йöртасны. Насянь быдторсö позьö виччысьны. Погонаяскöд öтнад водзасьны он вермы, весиг министрыд оз отсав.

Овмöсын некод сэсся карта разьöм кузя, прорабысь öтдор, эз матыстчыв, эз дивит шпанаяссö. А прорабыс шыасис директор дорö сöмын сы понда, мый стрöйбаыс вöли эштöдтöм да бухгалтерияса кабала серти öшалiс сы вылын. «Некодлы кö оз ков, сiдзкö, нинöм и чеччавны. Киссьöм овмöстö тайö пеноблока ичöt картаыд оз нин мезды»,— и век жö сьолöмыс Игнатовлөн эз примит татшöм асалöмсö, но миритчис.

Öти асылö сийö матыстчис гараж дорö. Сиптыса öдзöс дорö чукöртчöмаöсь трактористъяс, шоперьяс.

— Мыйла ывлаынöсь?

— Öдзöсыс игналöма и пломба улын.

— Кодi игналiс да пломбасö пунктiс?

— Пöжарникъяс,— шыасис механик.— Тöрыт рыт кытшовтiсны да пломба пысалiсны. Талун кöсйисны протоколөн тэ дорö локны. Сё сайö торкалöм аддзöмаöсь.

— Кысь сы мындаыс? А водзын пöжарникъясыс дзескöдлiсны тiянöс?

— Водзын эз, директор накöд ас ногыс сёрнитчылiс.

— Кыдзи?

— Локтасны да асьныс висъталасны.

— Ладнö, нетшыштöй пломбасö да пырöй, уджавны колö.

Пажын гөгөр локтис юрсиктысь пөжарной инспектор, майор Васенков. Мудер видзөдласа, гөгрөс чужома, кушмыны заводитом юра. Аслас ичот туша вөсна, кор пуксис пызан сайо, муртса пельпомыс да шмака юрыс тыдыштіс.

— Директор ёрт, торкаланнуд оланпас,— шыасис Васенков, быттё пинькай чипөстіс.

— Кутшөм?

— Пөжарной правилөяс, сэсся пломба нетшыштіннуд. А ті сы вөсна кывкутаннуд.

— Пломба вөсна?

— Да.

— Ме сійөс өдзөсас эг пысав и эг нетшышт. Эг кырымасьлы, эг көсйысьлы пломба видзны. Ті кө пысаліннуд, ті и стөрөжитөй.

— Выльысь пломбируйтам, гараж уджөдны оз позь. Сетам тшөктөм: бырөдны сё дас нель торкалом.

— Сы мында?

— Да.

— А водзын мыйла торкаломсө эн аддзөй? Ме жө тані регыд на уджала.

Васенков ассыс кабалаяссө папкао пукталігмоз мудера ваш-муні.

— Воддза веськөдлысьыс гөгөрволис миянөс, а ми сійөс.

Пөжарникъяс воча өти воськов эз көсйыны вөчны. Гаражысь пломба эз босытны, тшөктисны бырөдны сё сайо пасйөм торкаломсө ставнас.

Игнатов локтис районса юрнуөдысь Ганев дорө.

— Пөгибө воштисны пөжарникъяс, уджавны оз сетны,— норасис сійө.

Ганев лэптыліс телепон трубка.

— Николай Петрович, ті мый сідз топөдіннуд Игнатовсө?

— Пөжарысь видзчысян правилөяс торкало.

— Сё сайо торкалом, тайө ставыс Игнатов уджалігөн лои?

— Мхы, эз эськө да.

— А мыйла воддза веськөдлысьсө эн дзескөдлөй?

Пөжарной инспекцияса начальник сөмын мымляйтис. Таөн и помасис районса юрнуөдысь дорө волөм.

Мөд луннас Игнатов дорө матыстчис овмөсса прораб.

— Андрей Васильевич, бара волис майор Васенков. Пөжарной инспекцияса начальник юрсиктын кыпөдө куим судтаа кирпич керка.

— Аслыс?

— Да, корө сё метра кузьта канализация нуөдан трубаяс.

— Ньөбны?

— Дон босыттөг. Сетам кө, сэки став мытшөдыс пөжарникъ-яскөд лоө бырөдөма.

— Водзын тадзи жө мытшөдьяссө бырөдліннуд?

— Да, мый сетлім, киритлім ас овмөс выло, быттё асьным удж вөчигөн видзим.

Андрей Васильевич здук кежлө ланьтліс, сэсся өвтыштіс кинас.

— Сет, мый корөны, мед мынам нин наысь.

Муртса прорабыд петіс, триньөбтіс телепон. Звөнитө техни-кумса директор Тренькин.

— Андрей Васильевич, колö волены татчö.

— Мый могөн?

— Иван кузя сёрни эм.

— Обед бöрын пыр жö вола, лöсялас?

— Виччыся.

Тренькин пукаліс ас местаас да чуньяснас тотшöдіс пызан пöвйö. Киасисны, Игнатов пыр жö юалис:

— Мый Иваныс та пöрйö вöчис?

— Дугдіс велöдчыны, юö, кампузитчö. Тöрыт общагаас шумитöма, ковмас вöтлыны. Оз гөгöрво морт кывсö.

Игнатов чöла кывзіс. Кöсйис мыйкö шуны, но жырйö пырис директорöс вежысь, да выльысь пансис Иван йылысь сёрниис.

— Техникумас колям, но общежитиенысь вöтлам!— дöзмöмпырысь помалис директорöс вежысь.

— Да, сідз и вöчам. Сійö армия бöрысь, нывъясасьö. Мед кöртымалö оланінсö,— содтіс Тренькин.— Кöть оз син водзын ло.

Игнатов зумыштчис, нöшта соді öти тöжд. Быд ногыс нин Иванкöд сёрнитіс, но сылы нинöм оз имит.

— Техникумсыс он вöтлöй да, и сыысь аттьö.

3

Игнатовлы лов вылас вöлі сьöкыд эз сöмын овмöсса лыдтöм-тшöттöм мытшöдъяс понда, но и сы вöсна, мый ачыс быдса во нин олö общежитиенын. Кöсйысьлісны патера, но эз сетны.

— Суббöтаö кая Ягдорö, бöрсö ог лок, терпенньö быри,— öлöдіс видз-му овмöс управлениеысь веськöддысьöс.— Овмöсын ставыс мöдар путкыль бергöдчö. Чошöясыс регыд ачимöс нылыштасны. Помся вына сёян удждысьöмөн лоö дзайгыны-корсыны. Нöшта ачим «бомжуйта». Ог лок, кая и бöрсö ог лок!

Час мысти звöнитöны минсельхозсянь.

— Министр муніс юралысь дорö. Лоö патераыд, эн эновт уджтö.

Кольчис Игнатов, бара став вынсö кутіс пуктыны овмöслы. Тöлысь мысти и патераыд вичмис. Морöс пытшкыс личмуні, а кор ключсö сетісны, радысла весиг «ура» горöдіс.

Выль патераö овмöдчисны куимөн: ачыс, Иван пиыс, коді помалö вöлі техникумын велöдчöм, да Тася нылыс. Лои лöсьöдны патераса эмбур. Некымынысь шойччан лунö Игнатов эз кайлы Ягдорö. Ветлöдліс лавкаясöд, бöрйис пызан-улöс да мукöд керка пытшкын коланатор. Гозъялысь коставлöмсö, тыдалö, сиктса йöзыс ас ногыс бергöдöмаось, Лариса Матвеевнаны пеляс кодсюрö вашкöдöма: верöсыд пö пöдруга видзö.

Аньлөн оз узьсыс, сёр рытнас звöнитö Андрейлы:

— Тэ узян?

— Ог, тэнсыд звöнок виччыся.

— А тэ öтнад?

— Абу, менам тані чередын нывъяс виччысьöны.

— Шмонитан?

— Кутшöм шмонитöм вой шöрын? Каститчыны вермас, вай вод да узь, эн пальöдчы.

Андрей Васильевич ышловзис. Мыйла гöтырыс вой шöр кадö

звонитчö? Оз узь, вежög ру босьтöма? А мыйысь вежөгтыны? Гашкö, торйон олігад полö эновтöмысь? Но татшöм думьясыс сылы юрас некор эз волены.

Да, вöлі аддзысьлöм öти озыр нывбабакöд. Валентина Матвеевнаöн асьсö ыдждöдліс, мужиктög олö. Нывбабаыс кутіс асьыс кафе. Коркö сэні пажнайтігөн тöдмасисны. Сёрни-басни, а сэсса гортас корис. Кутшöмкö рытö Игнатов и локтіс сы дорö.

— Пыр, пöрччы вылыс паськöмтö, мыськы китö да пуксыы пызан сайö,— нюмъяліс кöзьяйкаыс.

Игнатов эз виччысь выльысь тшöктöм. Ужинтöм вöлі да пыр и сатшкысис инпöвса пызан сайö.

Валентина Матвеевна ваяліс быдпöлөс сёян-юан. Кусыыс петіс, зіліс чесьтö уськöдчыны.

Гöсьт видзöдіс сылөн вывті кыз зад выlö, коді мисьтöмтіс нывбабалысь ичöt тушаа мыгöрсö. Да-й водзсяныыс сійö эз кыскы ас дорас: кöвдум кодь чужöма, шмака ныра, кыз льöбъя, паськыд вома. Векныдык кымöссö пöшти дзоньнас тупкö рыжöй юрси. Морöсас чурквидзис ыджыдкодь кык мыльк. «Метр с кепкой»,— ас кежысь думыштіс гöсьт.

— Панясь,— воча пуксис Валентина Матвеевна.— Путь к сердцу мужчины лежит через желудок!

— Мхы,— Андрей Васильевич панясис, мыйкö шуышталіс Валентина Матвеевналы, ошкыштіс сёян-юансö.

— Да, да, чöскыд. Менам удж вылын пöвар пуис, сэтысь сёянсö вайи. Мися, бура пу, талун менам том морткöд аддзысьлöм. Сідзкö кажитчис?

— Висьтав пусысыдыды аттьö, ставыс кажитчис,— Игнатов чеччис пызан сайысь.— Аттьö и тэныд, Валентина Матвеевна.

— Мунан нин?

— Да, удж вылысь кабалаяс вайи, колö видлавыны.

— Он жö мун,— нывбаба зэв зіля пыраліс пыді жырьö.— Со доллар пачкаыс! Кольччы, кабалаясыд оз помасьлыны, колö и шойччыштны уджсыыд.

Андрей Васильевич юрси йылöдзыс гöрдöдіс.

— Валентина Матвеевна, тэ мый?..

Нывбаба чушкыльтчис, бергöдчис мышкөн, а Игнатов пасьтасис да öдзöс вугйö кутчысигмоз нурбыльтіс:

— Став бурсö, нöшта öтчыд аттьö чöскыд шыдсыыд... пусысыдыды.

Дзик öтчыд лои татшöм аддзысьлöмыс. Вежон чöж сэсса горзöдліс сёянсыыс. Мыйöн воас дум вылас нюжöдöм доллар пачкаыс, пыр и заводитас горзöдлыны. Коркö, недыр мысти ырыштчыліс эськö висьтавыны аддзысьлöмсö гöтырыслы, но эз лысьт.

Öтчыд, удж бöрын, локтіс гортас, а инпöлын пусьö-пражитчö гöтырыс, патера пасьта чöскыд кöр разалöма.

— Эновтчи уджысь, пыр кежлö локті карас,— висьтасис Лариса Матвеевна.

— Но и бур. Эновтчин кö, кокныдджык меным тані лöö. Тасялөн пусьöмыс оз артмы. Тöндзи Иванкöд вежон чöж öти пöлөс шыд панялім. Ыджыд кöструльын вöлі пуöма. Ми сійöс сёйим куим лун. Джынйыс кольлі на, а кор выльысь кöструльсö

восьтім, сійö бара тыр. Ва содтöма да гудрыштöма. Мися, Карбердса чошöясöс моз нин миянöс заводитин вердны.

— Содталанныд,— дорйис Тасяöс мамыс.— Оз кө кажитчы, асьныд мед пусинныд!

4

Карбердса овмöсын вошласисны польöпиян. Бөръя кадас шышгъяс пыр тшöкыдджыка пыралисны картаясö. Видзсыяс кыкысь лун вöли лыддьöны чошöяслысь лыдсö. Рытнас арталасны да сы мында лоö, а асывнас локтасны да кызь, а то и комын юр оз тырмы. Воис сэтчöдз, мый весиг пажнайтiгкостi наян йöз заводитисны веськыда картаас начкыны порсьяссö. Ветланинас и кульöны, яйсö нуöны. Сöмын уналатi вундалöм кучикыс кольö туплясьны.

Игнатов юрсö жуглис, мый вöчны? Гижöдөн шыасьлис милицияö, татчöс томиник участкöвöй дорö, но весьшөрö. Шышгъясöс эз аддзыны, а порсьяс öтарö вошласисны. Игнатов топöдiс стөржъяс вылын ыджыдсö, Пётр Андреевöс.

— Пётр Сергеевич, тэнад службаын дас морт. Быд сменаын кыкөн дежуританныд, а шпанаяс дугдывтöг гусясьöны. Кор пуктанныд талы пом?!

— Ми ставсö вöчам, мед тшапнитны кузь кияяссö, но ог адзöй. Шышкыс код тöдас кор волö. Ми абу мыжабсь, колö содтöд йöзöс медавны. Быд карта вылö мед стөржжыс вöли.

— А тi öни кымынönöсь? Висьтав!— Игнатов горзьöдiс гөлөсö.— Дасөнöсь, нöшта казгышта, тыра порсь картаыс дас и эм нин. Мукöдыс боввидзöны тыртöг. Гашкö, тэныд быд öдзöс дорö пищаля мортöс сувтöдны?

Андреев чöv олис. Сöмын тшөгöм голясö да паськыд плешсö öтарö зырыштлис ныр чышкöдөн. Та дырйи крукыля нырыс зэв тешкодья көрсьылис, быттö несйöдны көсийö. А дзoляник, порсьлөн кодь синмыс зiлис дзeбсьыны сук синкым улас.

— Мый шуан?— водзö юасис Игнатов, но вочакывйыс эз ло. Андреев пызан сайын пукалис чöла. Директор зумыштчис да стрöга помалис сёрнисö.— Матысса кадö кө нинöм оз вежсьы, стөржжяслөн лоö выль юрнуöдысь!

Тайö сёрни бöрас вежон кык вöли лөнъ. Шышгъяс порсь картаö эз пыравны, но öти шойччан лунö бара кык тöлысся дас польö воши. Планёрка дырйи Игнатов сувтöдiс Андреевöс.

— Висьтав, öни кыдзи шышгъясыс картаас пыралисны?

— Öшиньöдыс.

— А тi көнi вöлинныд? Öшиньясас көрт тасъяс тувъялöма, кыдзи пырисны? Гусялисны эз öтиöс, а дасöс. Öтисö босьтан киад да чилзöмысла пельыд сьöдмö, а танi дасöс колö öшиньöд мыччыны. Та вылö кад колö и гусьөн петкöдны оз артмы. Гусялигас нö көнi вöлинныд? Мыйла эн ас кадö картаяссö кытшлалöй?

— Туясям, мыжаяссö накажитам.

— Мда,— Игнатовлөн дусыдмис чужöмыс.— Пажын бöрын мед туясян актыс вöли менам пызан вылын!

Докладнöйсö Андреев вайис ас кадö. Сэнi вöли гижöма, мый гусясьöмын мыжаясыс — стөрöж удж вылö регыд на босьтöм том йöз. Мыжаясыс Виктор Минайлов да Александр Напалков.

— Ме эг көсийи найöс примитны. Мися, томöсь на, муртса

армия бөрти, оз кутны бура дөзьөритны,— пызан сайо пуксигмоз Андреев довкнитис юрнас кабала выло.— Ти асьныд босьтінныд: выльмөдны по колө службасө.

— Мыйын налөн мыжыс?— юалис Игнатов.

— Эновтөмаось вөли уджсө, сэккості и гусясысысыд волөмаось.

— Налөн гижөда правдайтчөмыс кытөн?

— Кутшөм правдайтчөм? Вөтлыны колө, и ставыс!

Игнатов чукөстис секретарсө да тшөктис дзик пыр жө чукөстны мыжмөм стөрөжъясөс.

— Весьшөрө коранныд,— өлөдіс Андреев.— Найө өні абуось тані, аски сөмын локтасны.

— Сідзкө, аски асывсяныыс ме дорө.

— Ме тшөтш вола,— пызан сайыс чеччигмоз шуис Андреев.

— Тэ он ков, ме ачым накод сёрнита.

Мөд лун асылө мыжа стөрөжъяс сулалісны Игнатов водзын.

— Төданныд, мыйла татчө кори?— стрөга юалис директор.

— Ми польөяс вошөмын абу мыжаось,— пөся заводитис сёрнитны Минайлов.— Шойччан луннас, квайт час рытө, стөрөжъяслөн жырйө локтис Андреев. Пыригмозыс сійө ыстис миянөс порсь картаяслань кежан туйвежө. Шуис: директорлөн по машинаыс сэтчө сибдөма да, колө көлеса увсыс лымсө шыблавны. Зыр тшөктис босьтны. Миян ветлігкості сійө ачыс көсйис дежуритыштны: ачым по кытшовта картаяссө. Ми босьтім зыръяс да мунім туйвежө. А сэтчөдз, асьныд төданныд, дзонь верст лоө. Локтім, а некутшөм машина абу. Гөгөр видзөдалім, буксуйтөм местасө эг аддзөй. Сулыштім куригчигмоз да косім бөр. Муртса мөдөдчим, паныдасис тупкыса дзоля машина. Пемыд вөлі, да коді пукаліс кабинаас, эг төдөй. Кысь сійө петис, колө на туясьны. Картаяс сайөдыс өд мөд, кытшөла туй эм. Сы кузя и вермис локны. Стөрөжкаын Андреев вөлі өтнас. Ошинь пыр аддзылім, кыдзи сійө киас кутис сьөм чукөр. Буракө, казяліс миянөс да весиг чужөм вылас вежсьыліс, пыр жө суйис сьөмсө морөс зептас. Мыйла по сэтшөм регыд ветлінныд? А ми сылы, мися, некутшөм машина туйвежас абу. Сідзкө по удитис мунны, кодкө по водзджык отсөг выло, тыдалө, локтис.

— Дзик тадзи и вөлі,— эскөдіс ёртыслысь кывъяссө Напалков.

— Андреев тшөктө тиянөс вөтлыны: оз по туйны эмбур видзны.

— Ми эг ылөдлөй, висьталім збыльсө,— Минайлов дузгөдчис да ланьтис.

— Кыдзи шпанасө тшапнитны? Кыдзи?— Игнатов виччысис зонъяссиянь вочакыв, но найө чөв олісны.— Ладнө, мунөй уджалөй.

Игнатов кутис думайтны, мый вөчны? Шойччан лунө сійө некытчө эз ветлы, машинаыс гаражын сулаліс. Сідзкө, Андреев төдөмөн ылөдліс том йөзсө?..

Татчөс овмөсын и водзын гусясьлісны. Сійө помнитө на ыло кольөм воясса лөөмторсө. Газетъясын гижлісны, быдсяма сёрнияс сэки ветлісны.

А заводитчис со кыдзи. Важтыбок сиктын, Игнатовъяссиянь неылын, олісны гозъя, Көсьта Лидя да Прокө Микулай. Налөн быдмис өтка пи, ичөтсяныыс яйсер мунөма: юмовторйөн по ёна

вердөмаоьс да сы понда тшөгөма. Лидяыс кызиник жө вөлі, а верөсыс кос печкан кодь. Сійө радейтис курыдтортө. Гажмас вөлі да пыр нырччө бабасө тышкавны. Мөдыс өтчыд-мөдыс терпитас, сэсся кватитас Микулайөс кок вож костөдыс да лэп-тыштлөмөн шыбитас джодж шөрө. Микулайлөн синсыс би пета-влас, дойысла весиг чеччыны дыр абу вермөма. Джодж шөрас кок вож костсө топөдөмөн нюкрасьөма. Андрей тайөс бура помнитө, Микулайыс локтис батыс дорө норасыны да. Эз яндыс да гачсө весиг лэдзліс: видзөдлы пө, мый менам гөтырөй вөчис.

— Членовредительство,— серөктис бать да вөзйис шыөдчыны милицияө.

А сэккості Көсьта Лидя чукөртас чемо-дансө, босьтас писө да сөлас карө лэччыс автобусө. Оти кывйөн кө, пышьяс верөс дорсыс. Пырас уджавны Сыктывкарса мясокомбинатө, сэні индасны сійөс скөт примитны. Сэки зэв уна скөт вөлі вайөны совхозьяс, да-й торья йөз сдایتисны ассыныс видзанторьяссө. Быд лун скөтөс примитан ыджыд жырйыс вөлі тыр. Весиг график лөсьөдлісны, кодлы уна да кор вайны. Сөмын порсь видзан овмөсын тшөгөдісны сдایتөм вылө комын сюрс юр. Чошөясыс эз өнія кодь вөвны, ставныс вердасаөсь, быдөnlөн сьөктаыс сөыс унджык кило лоө.

Лидя зэв өдйө гөгөрвоас, мый тані позяс озырмөдчыны. Ад-дзас порсь видзан овмөсыс ас кодьыс жө горш йөзөс. Тайө овмөсса куим бригадир да бухгалтер. Сёрнитчасны быд сдایتөм юрыс сьөктасө чинтыштны, а тадзи чукөртөм яй вылө гижны сэтшөм кабалаяс, быгтө найө мясокомбинатас вайисны ассы-ныс быдтөм-тшөгөдөм чошөясөс. Кызди сёрнитчисны, сідз и вөчны кутисны. Лидя тайө чукөрас нырщикаліс. Та вөсна артмөм сьөмыс сылы унджык жө и вичмис.

Тайө, өнія ногөн кө ОПГ-ыс, нажөвитчис некымын во чөж. Гашкө, дырджык на гусясысны, но порсь видзан овмөсын шөр зоотехникыс казялас яй сдایتөм да примитөмын торьялөмсө. Шыөдчас веськыда видз-му овмөс министерствоө, а сэтысянь юөрыс локтас милицияө. Туясьөмыс муніс дыр.

Көсьта Лидялыс татшөм ногөн чукөртөм сьөмсө аддзасны уналаыс. Весиг пөрыс мам керка гөбөчсыс перьясны куим литраа өкмыс стеклө доз. Быдлаө топыда сюялөма ветымын пасьяса бумага сьөм.

Гусясысыс пөвстыс ставнысө пуксьөдісны дыр кад кежлө, но Көсьта Лидяөс регыд лэдзисны. Йөзыс кывлісны да шызылісны. А сійө вежон-мөд мысти нин энөвтис таладорсө: лөк висьөмөн пө вөлөм висьө, сы вөсна и лэдзөмаөсь. Став гусялөм сьөмсө аддзис милицияыс али эз, некод оз төд. Лидя шулөма: корсьөй пө, мый сюрс, тьян лоө.

Сёрнитөны вөлі, пыс армия бөрти овмөдчөма Ленинградө да сэтыс ньөбөма куим жырья кооперативной патера да «Волга» машина. Сідзкө, милицияыд эз став гусялөм сьөмсө аддзы...

Өнія гусялөмторсө, дерт, он өткодяв сэксаяскөд, но век жө и тайө мөрччө өмөлик овмөсыдлы. Сідзкө, шпанасө быть колө тшапнитны...

Директор дорсянь Виктор Минайлов да Александр Напалков локтисны стөрөжьяслөн жырйө. Андреев найөс виччысө нин вөлөм.

— Мый шуис директорыд?— пыр жö юалис сійö.

— Тшöктис уджавны.

— Но-но,— шпыньмуні Андреев да петіс.

Зонъяс колины ас кежын. Минайлов довкнитіс юрнас öдзöс-лань да шöпнитіс:

— Ки пöлöс сета, гусыс петысьыс.

— Кыйöдны да тшапнитны колö! А то миян вылö лёк слава лэптö!— дöзмöмпырысь вочаасис Напалков.

Ёртъяс сёрнитчисны кыйöдны Андреевöс. На думысь сійö шойччан луннас воліс эз найöс видлыны, а ассьыс делöсö вöчны.

Лун дас мысти Игнатов кытшлаліс порсь картаясöд. Индаліс тырмытöмторъяс вылö, сёрнитіс йöзкöд. Кöрым пуанінысь петігөн сы дорö матыстчисны стөрöжъяс Минайлов да Напалков.

— Ми полам кантораö локны,— небыдика шуис Минайлов.— Андреев ачыс миян бёрся кыйöдчö. Лои тöдса, мый рытнас талун бара воласны польöпиянла.

— Кыдзи тöдмалінныд?

— Миян öти тöдса кывлöма Андреевлысь телефон пыр сёрнисö. Квайт час рытын корöма ньöбысьсö.

— Тайö дзик збыль?— Игнатов эскытöма видзöдліс зонъяс вылö.

— Збыль, мортыс весьшөрö оз больгы. Сöмын асьсö эз тшöкты йöзöдны, полö.

— Ладнö, нöшта колö тöдмавны, кутшöм картаысь кутасны петкöдны.

— А мый тані тöдмавнысö?— чуймис Минайлов.— Кык тöлысса польöясыс сöмын коймöд паса картаын.

— А гашкö, ыджыдджыкöс либö дзояджыкöс ньöбысьыс корис?

— Мортыс тшукысь кывлöма, воддза моз пö кык тöлыссаöс. Водзын öд сы ыждаöс жö гусялісны,— пöся эскöдіс Минайлов.— Воддза кодсьö кö корö, тöдöмысь, и ньöбысьыс важыс.

— Талун стөрöжъяслөн мöд смена уджалö. Тіянöс Андреевыс эз аддзыв?

— Эз, ми куйöд ва качайтанінсянь локтім.

Зонъяслы Игнатов тшöктіс индöм кадсьыс водзджык локны карта дорö, и ачыс кöсйысис матыстчыны.

— Сöмын мед нинöм оз казаяв,— торйöдчигас öлөдіс сійö.

Рытнас, квайт часысь неуна водзджык на, ставныс вöліны места вылын. Гөгөр лөнъ, сöмын көнкö ылын пон увтыштаö. Карта дорö некод на эз матыстчыв.

— Весьшөрö виччысям,— шуис Игнатов.

Но виччысьтөг коймöд паса карта помын кыліс порсышилөн гораа чилöстөм. Игнатов да кыкнан том морт уськöдчисны карта пыраніно, биасисны. Порсьяс шызисны, заводитісны лёкысь чилзыны. Картаыс кузь, öтар помсянь мöдарöдзыс сё метраысь унджык лöö.

Зонъяс котөртісны карта помö, кысянь кыліс первойя чилöстöмыс. Некодöс эз аддзыны, сöмын куйöд ворга вевт вылын туплясис куш мешök.

— Кутшöмкö аслыспөлöс лекарство дук кылö,— Минайлов вайöдліс мешökсö ныр дорас.

— Гашкө, ветврачъяслөн?— Андрей Васильевич матыстчис зонъяс дорө да тшөтш исыштис мешөксө.

— А, гашкө, гусыслөн?— Минайлов сюся гөгөртис синнас.— Мыйла либө порсыпиыс чилөстис?

— Көни гусыс? Тани со некод абу, а порсыпияныс мукөддыр-йи өта-мөд костас тышкасьоны, чилзөны. Мунам,— кывкөрталис Игнатов.— Мешөксө вай меным, аски ачым ветеринарыслы петкөдла.

А тайө кадө стөрөжъяс вылын ыджыдыс, Андреев сулалис на улын куйөд воргаын. Син бөжнас кыйөдчис көрт тасъяс костөд сёрнитысьяс бөрся да шы эз лэдзлы. Сийө картаас локтис пыр жө порсь видзысьяслөн мунөм бөрын. Пөнара биөн корсялис мичаджык да вердасаджык польөпиянөс. Öтикөс босьтис киас, а сийө лёкысь кутис чилзыны да лои лэдзны. А кор кылис карта-лөн шөр өдзөс воссьөм шыыс, Андреев повзис, заводитис лукйыны зепсө. Корсис картапомса өдзөс томанлысь ключсө. Кыскигас прөступитис да, ключыс уси куйөд воргаас. Пышйыны некытчө, вештыштис куйөд ворга вылысь көрт тасъяса вевттьөдсө да лапкыштис пытшкас. Кизьөр порсь куйөдыс лои голяысь вылынджык.

«Сукаясыд абу петкөдөмаось»,— скөрысь ёрчыштис вом-горулас слесаръяс вылө вевттьөдсө ас местаас пуктигмоз. А кор Минайлов адзис сылысь мешөксө, нөшта на дөзмис, ас вылас нин, мый тэрмасигад сэтчө сийөс колис.

Кор мужичөйяс сьөрсьөн-бөрсьөн мунисны картаысь да кусө-дисны бисө, Андреев петис куйөд воргаысь. «Сволочьяс! Часлы, водзөс босьта, мынтысянныд на менам купайтчөмысь!»,— лөгпырысь думыштис сийө.

Мөд луннас төдтөм зонъяс сиктын кутөмаось Минайловөс да Напалковөс. Сы выйөдз нөйтөмаось, мый найө бурдөдчан койкаөдз воисны.

Кык лун костөн шышъяс бара на пыралисны порсь картаө да нуисны өтпырйө кызь польөпиөс.

Игнатов дөзмис, гижис приказ — бергөдны стөрөжъяслөн веськөдлысь Андреевлысь төлысья удждон да шняпкис сылы выговор. Андреев төдмасис приказнас, матыстчис Игнатов дорө.

— Мыйла менсым бергөдінныд та мындасө?— юалис сийө.

— Тэ кывкутан польөяс вошласьөмысь, нинөм он вөч, медем пуктыны талы пом. Сідзкө, ачыд и вешты убыткасө.

— Судө сета!— горөдис Андреев.

— Сет, а ме милицияө шыөдча, мед пуксьөдасны тэнө.

— Мыйысь?

— Гусьясьөмысь!

— А тэ менө киөд кутин?

Игнатов весиг падмылис, кор кылис Андреевсянь тайө кывъяссө. Зумыштчис, сы выйөдз скөрмис наян, этш төдтөм морт вылө, мый тшөктис петны жырсыйс. Чорыда думыштис янсөдчыны сыкөд. Неыдждыд кад коластөн нөшта шняпкис кык выговор да вөтлис кузь киа морттө овмөсысь.

Стөрөжъяс вылын ыджыдө коралис олөма нин мортөс, милицияса вөвлөм участкөвөй Павел Сергеевич Мельниковөс. Сийө, арлыд вылө видзөдтөг, зэв өдйө ладмөдис стөрөжъяслысь уджсө. И регыд мысти Андреевөс да сылысь гусьясьысь другсө кутис буретш польөпиянсө картасыс петкөдигөн...

Гусьясöс тшапнитöм бöрын коли лун-мöд. Муртса удж по-масытöдз мыччысис секретарша:

— Андрей Васильевич, локтис ЛПК-лөн орчча подсобной ов-мöсысь Тренькин Кирилл Матвеевич.

— Мед пырас.

Тренькин кисö водзö чургöдöмөн шавксьöдис веськыда пызан дорöдз.

— Чолöм, чолöм! Секретарыд шуö: час пö юала. Мися, меным юасытöг позьö пырны. Оз пö позь. Со кутшöм тэнад отсасы-сьыд принципиальной.

— Тэнад сэтшöм жö!

— Менам öнi абу, ас нянь вылас мöдöдi. Вывтi уна аддзыны кутис.

— Мыйкö дзевантор эм?

— Öнiя олöмын сытöг некыдз оз позь, лöб дзевсясны.

— А менам ставыс ки пыдöс вылын моз, нинöм дзевны.

— Тайö öмöй бур? Колö и ас йывсьыд мöвпыштны. Прöста тайö улöс вылас оз позь пукавны! Öтчыд олам, асьтö некыдз оз позь вунöдны!

— А йöзсö бокö йöткыштны?— чуймöмөн юалис Игнатов.

— Сьöлышт, сöвеститчан йöз водзын! Öнi сöмын визув да горш олö! Сидз и скокорнитны видзöдöны! И правильно, сват да брат бур, но сьöмыд торъя! Быдөн жмитчö матыссасö скон-йыштны. Тэ кö он, сийö ылöдлас! Кöсьян, велöда, кыдзи сьöмсö зептавны?

— Кытысь зептавнысö?

— Овмöсыдлысь.

— Сийö и сидз коньöр кодь.

— Сидзкö, мед тэ тшöтш коньöрнас вöлин? Тадзи мöвпалан?

— Ог эськö да.

— Удж помад пырав ме дорö, бутылка сайын пукуштам, велöдышта.

— Мыйла волин?— вежис сёрнисö Игнатов.

— Теплицаясö куйöд колö. Донсö ачим пукта, ог öбöдит.

— Кодöс?

— Тэнö, йöй улö эн лэдзчысь, юксям шöрипов. Джынсö тэ-ныд ки вылад сета.

— Меным ки выlö оз ков, кассаö сдайт. Тэ коддьöмыс во-лисны нин ме дорö. Ми гöтыркöд шуим, мый оз ков лякöссьыны, кокныдджыка узьяс. Да-й аскöдыд мöдаръягыдас сьöмтö он ну.

— Челядыды коляс.

— Найö мед асьныс нажöвитасны.

— А ну тэнö!— дöзмис Тренькин.— Кутшöм вöлин, сэтшöм и колин. Кадыс сямтö абу вежöма, коммунака и эм!

Тренькин сьöломсяныс ёрччыштитс, но öдзöсöд петигөн казь-тыштитс на:

— Думыштан кö, триньöбтыв телепон пыр, кута виччысьны.

Республикаын заводитчисны выль бöрйысьöмъяс. Игнатов ас-лыс шулис нин, политикаö сэсся оз суйсьы. Тöдмалис, мый сийö

абу сөмын гудыр, но вывтi няйт делö. Сэни суклялöны öта-мöд-сö, зильöны тальыштны, увтыртны. Унджыкыс нырччö сэтчö, медым асавны содтöд сьöм, эмбур, этш тöдтөг гусясьны. Тайö Андрей Васильевичлы эз кажитчы. Ветлис бөрйысьянинö да чöла гөлöсуйтлис демократьяс лыдö пырысьяслы паныд.

Коркö локтiс Сыктывкарса калбас вöчан овмöсö инавны порсь яй. Паныдасис сэтчöс веськöдлысь Каневкöд. Здравойт-чисны, Канев пыр жö юалис:

— Тэ код вöсна сулалан, код вöсна гөлöсуйтан?

Игнатов серöктiс.

— Власьт вöсна.

— А-а, тэ, сiдзкö, важ юралысь понда висян?! Эн чотась, верман ворссьыны.

— Мыйöн?

— Öнiя дорас кутчысян. Кор ми воам власьт бердö, ставныс-лы, кодьяс миянлы паныд, индам öдзöс вылö.

Игнатов бара серöктiс. Каневöс сьлөн серамыс нöшта на дöзмöдiс.

— Думаышт, мед сёр эз ло!— чорыда кывкöрталiс сийö.

Андрей Васильевич эз пыдди пукты сылысь öлөдöмсö. А весьшöрö, бөрйысьясыс унджык гөлöссö сетöмаось вьль юралысь вöсна. Сийö сиктсаяслы кöсйысьöма бурмöдны олөм, сийөн и вермöма.

Юралысь вежсис, и министрöс вежисны. Пуктiсны буретш Игнатов вылö лöгалысь Агаповöс, карса овмöсысь директорсö.

Карбердса овмöслы этшаджык кутiс чуктыны сьöм. Нöшта сьöкыдджык лои чошöяслы ньöбны вына кöрым, чиныштiсны привесьяс.

А öтчыд кантора дорö сувтiс сьöд «Волга». Воöма министрöс вьль вежысь, Матвеев. Аддзис öшинь улысь Игнатовöс да пыр и кватитiс сойбордöдыс. Министрöс вежыськöд Андрей Васильевич важысянь тöдса. Чайтiс, овмöс кытшовтны локтiс, а сийö весиг эз гарышт та йылысь.

— Сёрни эм,— машина дорысь бокö вешйигмоз тöдчöдiс сийö.

— Кутшöм?

— Министр шуис: миян эм вьль директор, тэныд пö колö мунны татысь. Кодкö тэ вылö норасян гижöд ыстöма.

— Кытчö мунны?

— Минсельхозö либö управлениеö.

— Валяйте,— дöзмöмпырысь öвтыштiс кинас Игнатов.— А кодi нö кляузасö мöдöдöма?

— Тшукысь ог тöд, но волöма сы дорö Петров. Да и Агаповыс ачыс тэ вылö пиньсö йирö. Тöдан öд, а норасьöм гижöд кузя тшöктiс висьтавны, чайта, мода вылас: мунас кö пö, ог кутöй сы кузя нинöм туявны,— шöпнитiс Матвеев.

— Гөгөрвои.

Регыд мысти Игнатов сдайтiс делöяссö вьль веськöдлысьлы. Та пöрийö эз и шогсьы, мый öдзöс вылö индiсны. Веськыда кö шуны, сийöс порсь картасыс вукöдö нин вöли. Ачыс гоз-мöдысь ырыштчылис мунны, но пыр кольöдлiсны, а öнi со сюрöма вежысьыс.

Кор мездысис Карбердса овмöсысь, Игнатовлы лов вылас личмуни. Став тöждыс, кывкутöмыс исковтiс ас вьвсьыс, ас вö-

ляя морт моз лолыштис. Первойысь уна во бöрын гожом шöрын петис шойччыны. Кайлис Ягдорö, гожйöдчис, ю дорын кадсö колялис. Важөн нин тадзисö эз шойччыв. Помасис отпускыс да локтис минсельхозö, министрöс медводдза вежысь дорö.

— Вöрзöдінныд кө, вайöй удж.

— Он көсйы Сыктывкарскöй овмöсö директорöс вежысьö кутчысьны? Сэни веськöдлысьыс пöрысь нин, петны вöзйысьö. Сйö ёна тэнö корис ас дорас мöдöдны.

— Ог, эг кө Карбердса овмöсын шогмы, мöдлаö ог нин кутчысь.

— Сидзкö управлениеö, шöр инженерөн, чиныс госслужбаö пырö.

— Кутчыся.

Петис минсельхозса коридорö, паныдасис Агапов.

— Тэ, чайта, он дыр тані пукав, тодмышкаласны!— сёлöм-сянь крапкис сылы Андрей Васильевич.

— Ме, ме, ме,— Агапов гöрдöдис да заводитис мыктавны.

Но Игнатов эз кывзы, весиг эз сувтыштлы, юрсö выlö лэптöмөн мунис дай.

Игнатов заводитис уджавны видз-му овмöс дöзöритан юкөннын. Пукалö пызан сайын, бергöдлö кабалаяс, инас оз öшйы. Дыр кадтö овмöсөн веськöдлөм бöрын лоны специалистөн, кодöс асьсö кесйöдлöны, абу любö. Ой, сьökыд сылы лов вылас! Сьökыд тайөн миритчыны! Дась көть öнi энöвтны уджсö!

— Терпитышт,— корис гöтырыс.

Андрей Васильевич терпитис.

Агаповöс, кызди сйö и тунавлис, нель во тыртöдзыс на чöвтісны министрысь. Республикаса юралысьлөн медводдза вежыськөд гуся сьöмсö абу юкөма, зепталöма аслыс. Тадзитö ас горшасьöмысь ыджыд чинаыд ёна дöзмöма.

Буретш министрöс чöвтан луно минсельхоз коридорын Игнатов бара паныдасис Агаповкөд. Асьсö вöвлөм министр эз нин тшапа кут.

— Öнi мекөд, тöдöмысь, унаөн оз кутны здоровайтчыны,— норасис сйö.

— Мый көдзин, сйöс и вартан,— вочавидзис Андрей Васильевич.

Агаповлы татшөм вочакыв бара эз кажитчы, синмас югнитис лөглун. Зывöка вашмунис да сувтлөмөн синнас кольöдис мортсö.

Водзö лöө на.



«Быттö ачыс Иван Куратов мыччö пырысьлы ассъыс ки...»*

*Öг музейным, көн Куратов,
Лои гижысьяслөн храм...*
В.Тимин

Ветымын во сайын 1969 вося июль 18-öd лунö коми литературалы подув пуктысь Иван Куратовлы чужан лунсянныс тырис 130 во. Тайö жö лунас юркарын Коми мулөн историяын лои вывті тöдчанатор — воссис поэтлөн литературно-мемориальной музей. Музейсö лои лöсьödöма Орджоникидзе уличавывса куим судта кирпич керкалөн улі судтаас. Тайö керка местаас XIX-öd нэмын сулавліс кык судтаа пу керка, көні овліс Куратов.

Музей восьтöм йылысь мөвпыс чужліс 1939 воö на, сэк, кор медводдза коми поэтлы чужан лунсянныс тырис 100 арöс. 1930-öd воясö Куратовлысь олöм да удж тöдмалöмö ыджыд пай пуктісны коми кыв, культура да литература туялысьяс А.С.Сидоров, В.И.Лыткин да А.А.Попов.

А.С.Сидоров видзис поэтлысь тетрадьяссö 1923-öd восянь да сэки жö медводдзаөн висьталіс коми йöзлы Куратов йылысь «Парма ёль» журналын.

Та бöрын В.И.Лыткин (Илля Вась) гижö Куратов йылысь «Югыд туй» газетын. 1932-öd воö И.А.Куратов кывбуръясөн петö медводдза небöг. Лöсьöдіс сійöс пединститутса велöдысь И.И.Оботуров.

1930-öd воясö поэтлысь творчествосö пыдісянь туяліс литературовед, Немдін сиктын чужлöм морт А.А.Попов (Öльöк Öндрей). Андрей Алексеевич помавліс Москваын Гөрд профессура институт да зіліс Горький нима Литературной музейын научной сотрудникөн. Сійö медводдзаөн шуис, мый колö пасйыны поэтлы 100 во тырöм да лöсьöдны Литературной музей, дасьтіс и юбилейной выставкалысь план. 1930-öd воясö уджаліс Куратовлөн творчестволы да олöмлы сиöм диссертация вылын, но чорыда висьöм вöсна уджсö помавны эз удит, кувсис Москваын.

1939-öd воын Коми АССР-са Верховной Советлөн Президиум лэдзö постановление поэтлысь нимсö видзöм могысь. Тайö индöд сертигыс Куратовлысь нимсö сетісны поэт чужанінлы — Кебра сиктлы, Сыктывкарса 1-öd номера педучилищелы да школалы, нöшта и мукöд каръясын лоины поэт нима уличаяс. Сэки жö петісны И.А.Куратовлөн научной уджъясөн да кывбуръясөн медводдза небөгъяс, найöс лöсьöдысьясөн лоины коми кыв туялысь А.А.Вежев; коми гижысь да гижысь котырөн веськөдлысь, поэтлысь

* В. Тиминлөн кывбурьысь. Гижöдсö сиöма И.А. Куратовлы 180 во да Литературной музейлы 50 во тырöмлы.

100 во тырөмсө котыртысь-нуодысь В.В.Юхнин, коми гижысь да историк П.Г.Доронин.

И.А.Куратовлысь ыджыд чужан лун пасйөмө тӧдчана пай пуктисны коми гижысьяс С.М.Морозов да Г.А.Фёдоров. С.Морозов Куратовлысь олөмсӧ тӧдмалӧм могысь 1939 воӧ ветліс Алма-Атаӧ да архивын уджалӧм бӧрын аддзис Куратовлысь снимокъяс. 1950-ӧд воӧ Павел Доронин Куратовлӧн небӧгъяс костысь бара жӧ аддзис фотоснимок. Кор ӧтлаӧдісны С.Морозовӧн вайӧмасӧ да П.Доронинлысь аддзӧмторсӧ, лои гӧгӧрвоана, мый тайӧ и эм И.Куратов.

Г.А.Фёдоров 1939 воын уджаліс «Ударник» журналын. Сійӧ,



дерт, тӧдіс, мый ачыс Куратов рӧдысь: пӧчыс — Александра Афанасьевна — вӧлі поэт ыджыд вок Афанисийлӧн нылӧн. Фёдоров пырис Куратовлысь юбилейсӧ дасьтан-нуӧдан котырӧ, окотапырысь тӧдмасис Куратовлӧн творчествоӧн да йӧзӧдіс журналын «И.А.Куратовлӧн поэтической творчество йылысь» статья. Тайӧ уджыс и талун кежлӧ на эз вошты ассьыс тӧдчанлунсӧ.

Вывті уна вӧлі вӧчӧма 1930-ӧд воясӧ Куратовлысь удж да олөмсӧ тӧдмалӧмын, но век жӧ музей лӧсьӧдӧм вылӧ унатор на колӧ вӧлі корсьны-туявны да чукӧртны.

И тайӧ ыджыд уджыс пансис выль ӧдӧн война бӧрын нин, 1950-1960-ӧд воясӧ. Медыджыд пайыс сійӧ кадӧ Куратовлысь творчество да олӧм тӧдмалӧмын А.Н.Фёдоровалӧн. Сійӧ уджаліс Вӧлӧгдаса, Москваса, Казаньса, Алма-Атаса, Ленинградса архивъясын, а 1960-ӧд воӧ нин сылӧн петіс «И.А.Куратов. Очерк жизни и творчества» небӧг. А.Н.Фёдорова бӧрын ыджыд пай уджас пуктисны А.А.Вежев, Е.С.Гуляев, А.К.Микушев, А.Е.Ванеев, В.А.Латышева, Г.И.Тираспольский, Н.П.Ивлев, В.Н.Демин, В.И.Мартынов да мукӧд.

1963 вося апрель тӧлысьӧ Коми АССР-са Министръяс Сӧветлӧн петӧ И.А. Куратовлысь музей лӧсьӧдӧм йылысь индӧд. Музейлысь медводдза научной план лӧсьӧдысьнас лои краеведческой музейса история юкӧнӧн веськӧдлысь Аристарх Михайлович

Рубцов, экспозициясö дасьтис Тамара Алексеевна Чисталёва, сийö жö лои музейын медводдза веськöдлысьöн. Экспозиция вылын важ кöлуй отсöгöн вöли петкöдлöма поэтлысь челядьдырсö, архивьясысь аддзöм документьяс петкöдлысьны Куратовлысь велöдчан да уджалан вояссö. Зэв ыджыд пайыс музей восьтöмын вöли и поэт рöдвужлөн. Тöдса, мый поэт кувсис ылын чужан мусянныс, миянöдз сылөн воисны сöмын ки помысь гижöм тетрадьяс да Куратов кырымпаса некымын небöг. Г.А.Фёдоров козьналіс музейлы поэтлөн вок Афанасийлысь XIX нэмса часі. Тобольск карын овліс да уджавліс велöдысьöн Афанасийлөн ыджыд пиыс Николай, кодöс вывті пыдди пуктыліс Иван Куратов. Т.А.Чисталёва ветліс Тобольскö да вайис музейö Куратов кадлы уна лöсялана экспонат: чернильнöй прибор, подсвечник, фисгармония, снимокьяса альбомьяс, документьяс да с.в. Таысь кындзи Тамара Алексеевна ветліс на и Алма-Атабдз да вайис юрта мичмöдан кöлуй, öд Куратов сэні уджалігас ёна ветлывліс и унаысь овліс юртаын. Тадзи и лои лöсьбöдöма И.А.Куратовлөн нейджыд литераурно-мемориальнöй музей.

А сэсся музей пыр водзö сöвмис, некымынысь вежсьыліс экспозиция. Сотрудникьяс медводдза луньясыянысь чукöртисны XX нэмса коми литература сöвмöм йылысь экспонатьяс, на лыдын гижысьяс, коми кыв да литература туялысьяс В.И.Лыткинлөн, В.А.Савинлөн, В.Т.Чисталёвлөн, К.Ф.Жаковлөн, А.С.Сидоровлөн, В.В.Юхнинлөн, Г.А.Фёдоровлөн, Я.М.Рочевлөн, С.А.Поповлөн, А.П.Размысловлөн, В.И.Елькинлөн, И.М.Вавилинлөн, А.Н.Фёдоровалөн, А.К.Микушевлөн да мукöдлөн, а сідзжö серпасалысьяс В.В.Поляковлөн, М.П.Безносовлөн, А.В.Мошевлөн архивьясысь материальяс. Дерт жö, экспонатьяс чукöртöмын ёна отсасисны гижысьяс да налөн рöдвужыс. Тадзи некымын дас воон чукöрмис кызь сюрс гөгөр экспонат, да лои позянлун лöсьбöдны выль литературнöй музей. 1998 воö музей медводз





шыөдчис коми войтырлөн съезд дорө, а сэсса нин республикаса юралысь Ю.А.Спиридонов шуис сетны литературной музейлы вöвлөм купеч керка. Научной сотрудникъяс Ильчукова Л.Д., Михайченко Н.А., Холопова Д.Г. да художник Мишарина Л.В., директор Котылева И.Н., директорос вежысь Бандура С.В. журнаодом улын керкасо дзоньталігкості лөсьөдісны выль музейлы научной уджтас.

2009-өд вося апрель төлысьö, медводдза коми поэт Иван Алексеевич Куратовлы чужан лунсянъыс 170 арос тыран воö, литературно-мемориальной музей вуджис выль оланінö XIX-өд нэмса купеч С.Г.Сухановлөн кык судтаа кирпич керкаö. Музейлөн лои выль ним — И.А.Куратовлөн Литературной музей. Квайт залын лөсьөдöма экспозиция, көні висьтавьö коми кыв да литература сөвмөм йылысь XIV-өд нэмсянь öнія кадöдз.

Музейлысь выль оланінсö карса йөз öнөдз на шуоны купеч Суханов керкаөн. С.Г.Суханов оланінсö лэптыліс XIX-өд нэм пансигөн. 1850-өд воö купечлөн гөльмөм рөдвужыс керкасо вузалисны карлы, да сэні воссис уездвса велөдчанін. Медводдза коми поэт И.А.Куратов 1861-65-өд воясö велөдіс Усть-Сысольскын, а сылөн ёртъясыс вöліны велөдысьясөн жö уездвса велөдчанінын. Куратов, дерт жö, тшөкыда пыравліс на дорö. Тані жö 1870-өд воясö велөдчис төдчана коми гижысь К.Ф.Жаков. Велөдчан вояс йывсьыс сійö казьтывлö «Сквозь строй жизни» небöгын. Тайö велөдчанінсö помавліс и коми кыв да Коми му туялысь Г.С.Лыткин.

1885-өд воö уездвса велөдчанін лои карсаөн. 1890-өд воясö сэні велөдіс коми музей да архив подув пуктысь А.А. Цембер, а 1910-1912-өд воясö тані жö велөдчис кывбуралысь, коми да финн-йöгра кывъяс туялысь В.И.Лыткин.

Октябрь революция бöрын 1924-өд воö тайö керкаас вуджис коми областювса музей. 1920-1930-өд воясö татчö тшөкыда пыравлісны коми поэтлысь удж да олөмсö туялысьяс А.С.Сидоров да В.И.Лыткин. Экспонатъяс чукöртан уджын налөн пайыс зэв төдчана. Ыджыд война пансьытөдз да тышкасянінысь доймалөм бөрас воөм мысти музейын уджавліс коми поэт Ф.В.Щербаков. Артмö, мый тайö керкаыс и лөсялö Литературной музейлы.

Өнія музейын петкөдлөма уна сикас дона экспонат, на пын XVIII-XIX-өд нэмса небөгъяс; И.Куратовлөн библиотекаыс да К.Жаковлөн, В.Савинлөн, М.Лебедевлөн гижөдъяса небөгъяс, ки помыс лөсьөдөм кывбуръяс, поэмаяс, торъя пасйөдъяс, снимокъяс, гижысыяслөн көлуй да с.в.

Экспозициялөн медводдза зал төдмөдө финн-йөгра кывъясөн, коми йөзкостса творчествоөн, сйөс туялысыяслөн уджъясөн да медводдза анбур пасъясөн.

Мөдөд залын петкөдлөма коми войтырлөн гижөда культура-лысь чужөм-сөвмөсө XIV-өд нэмсянь XX-өд нэм шөрөдз. XIV-өд нэмө Коми муө йөзөс ен эскөмө пыртөм могысь воис енбиа морт Перымса Степан. Сйө ичөтдырсянныс төдіс коми кыв, комиялысь оломсө да комиөн лөсьөдіс молитваяса небөгъяс. 1372-өд воө Перымса Степан дасьтис медводдза коми азбука. Нимсө сылы сетөма медводдза шыпасъяс сертиыс анбур (ан да бур). Перымса Степанлысь анбурсө пыдісянь видлалөм бөрын В.И.Лыткин аддзис, мый вөчөма сйөс грекъяслөн да рочъяслөн алфавит подув вылын. Анбурас пыртөма и коми пасъяс.

XVIII-өд нэмө войвылын паськаліс важ крестлы эскысыяслөн культура. Налөн медшөр мөгөн вөлі ас эскөм да важ небөгъяс видзөм. Татшөм небөг видзысыясөн вөліны Чилимдін да Удора сиктъясын олысыяс. Экспозицияын петкөдлөм небөгъяс та йылысь и висьталөны. Таысь кындзи залын петкөдлөма Улляна манастыр библиотекаыс небөгъяс. Содтөд тайө жыръяс жө поэбө төдмасыны ас киөн дасьтөм небөгъясөн. Найөс лөсьөдліс Куломдін сиктын чужлөм крестьянин, грамота төдысь морт И.С.Рассыхаев.

XX-өд нэм пансигөн ыджыд пай коми кыв туялөмө пуктис А.А.Цембер. Сйө лөсьөдіс роча-комиа кывкуд. Уджыс петис



торъя небөгөн 1910-өд воын Усть-Сысольскын да лои зэв коланаон велөдчанінъясын.

1917-өд восянь Комиын велөдчанногыс ёна вежсис. 1918-өд воё нин коми кыв туялысь В.А.Молодцов лөсьөдіс выль коми анбур. 1920-өд воясё петёны коми кыв велөдан небөгъяс. Тайё жё кадё коми кыв сөвмөдөмө ыджыд пай пунктис В.И.Лыткин (Илля Вась). А сэсся сійё лөсьөдіс коми кывлы да мукөд финн-йөгра кывъяслы сiom уна удж. Сылөн нимыс лои төдса мир пасьтала. Залын лөсьөдөма В.И.Лыткинлы сiom пельөс.

Литературной музейлөн экспозицияын шөр темаон лоё «И.А.Куратовлөн олөм, поэтлысь ки помысь лөсьөдөм тетрадь-яссө төдмалөм да велөдөм».

Экспонатъяс висьталёны И.А.Куратовлөн челядьдыр йылысь, Яренскын, Вөлөгдаын, Усть-Сысольскын, Москваын, Казаньын, Шөр Азияын олөм да велөдчөм йылысь. Торъя юкөн сioма сылы, кызди рөдвужыс видзисны поэтлысь тетрадьяссө да на йылысь төдмалісны коми йёз.

XX-өд нэм пуксигөн сөмын лыда учёнйлы вөлі төдса И.А.Куратовлөн нимыс. На пиын Гельсингфорса университетысь профессор Ю.Вихман, Санкт-Петербургса психоневрологической институтын велөдысь К.Ф.Жаков, Санкт-Петербургса университетын велөдчысь П.А.Сорокин. Тайё йёзыс төдісны нин, мый поэтлысь тетрадьяссө меддонатор моз видзёны сылөн рөдвужыс, но төдтөм киясө сетны найёс эз көсйыны. Поэт кувсис чужан мусяньыс ылын Шөр Азияса Верный карын, ассьыс тетрадьяссө рөдвужыслы ыстөм могысь колис ёртыслы, В.И.Чистопольскийлы. Сійё пошта пыр мөдөдіс ки помысь лөсьөдөм гижөдъяссө поэтөс дядьөн шуысьлы, Николай Афанасьевич Куратовлы. Н.А.Куратов сэки велөдчис Санкт-Петербургса институтын. Сэсся нин сійё вайё тетрадьяссө Межадорё бать керкаас, та бөрын найёс видзис бара жё Куратовөс дядьөн шуысь, священник Степан Афанасьевич Куратов.

1923-өд воын С.А.Куратов сетё поэтлысь тетрадьяссө зятъыслы, сэки педтехникумын велөдысь, бөрынджык филология наукаясса доктор А.С.Сидоровлы. Сидоров медводдзаон и висьталіс коми йёзлы Куратов йылысь.

Олігас поэтлөн небөгъяс эз петавны, сөмын вит кывбур, кызди йёзкостса сыланкывъяс, йёзөдлісны «Вологодские губернские ведомости» газетын. Оні Куратовлысь кывбуръяссө вуджөдөма Россияса да мирса уна кыв вылө.

1950-1990-өд воясё поэтлысь удж да олөм төдмалөмө ыджыд пай пунктисны куратоведъяс В.И.Лыткин, А.Н.Фёдорова, Е.С.Гуляев, А.К.Микушев, А.Е.Ванеев, В.А.Латышева, В.Н.Дёмин, В.И.Мартынов, Г.И.Тираспольский, Н.П.Ивлев, В.М.Полещиков, Т.А.Чисталёва. И.А.Куратов рөдвужлысь олөмсө уна вояс чөж нин туялө А.Г.Малыхина. Талунъя лун кежлө Куратовлысь удж да олөм төдмалөмө төдчана пай пунктис филология наукаясса кандидат П.Ф.Лимеров. Сійё поэтлөн чужан лунсяньыс 180 во тыригкежлө дасьтис «Иван Алексеевич Куратов» небөг.

Нельөд залын петкөдлөма литературалысь сөвмөмсө XX-өд нэм пансьөмсянь 1930-өд воясөдз. Тайё кадас культура да литература олөмын лоины ыджыд вежсьөмъяс: сөвмисны выль видзөдласъяс да уна сикас котыръяс. Татшөм төвруыс вөрзёдіс

и енбиа коми йӧзлысь съӧлӧмъяссӧ. Олӧм йылысь джуджыд мӧвпъяса роч гижӧдъясӧн тӧдмасьӧм бӧрын унаӧн босьтчисны гижны да корсьны литератураын асьыныс туйвизь.

Коми йӧзлӧн медтӧдчана гижысьӧн Октябр революцияӧдз вӧлі К.Ф.Жаков. К.Ф.Жаковлысь творчествосӧ медводдзаӧн туяліс тӧдчана социолог П.А.Сорокин. К.Жаковлӧн удж да олӧм йылысь экспозицияын висьталӧны небӧгъяс, ки помысь лӧсьӧдӧм гижӧдъяс, снимокъяс да мукӧдтор.

Революцияӧдз роч кыв вылын босьтчисны гижны А.Чеусов, М.Лебедев да И.Шергин.

В.Лыткинлӧн да А.Маеговлӧн медводдза кывбуръясыс чужисны сэк, кор найӧ велӧдчисны Тотьмаса учительясӧс дасьтан семинарияын да ветлывлісны литературно-художественнӧй кружок вылӧ. 1917-ӧд вося революция бӧрын кыкнанныс лоины тӧдчана кывбур тэчысьясӧн, туялысьясӧн да общественнӧй уджалысьясӧн. В.Т.Чисталёв медводдза гижӧдъяссӧ лӧсьӧдіс 1908-ӧд воӧ. Тайӧ жӧ кадӧ А.А. Суханова нуӧдіс ыджыд удж йӧз тӧдӧмлун кыпӧдӧм могысь.

Октябр революция бӧрын тэрыб ӧдӧн кутісны сӧвмыны коми культура, литература да искусство. Виль коми литературалы подув пуктысьӧн лои В.А.Савин.

1918-ӧд вося август тӧлысьӧ «Зырянская жизнь» газет йӧзӧдіс Виктор Савинлысь медводдза «Гӧрд звӧн» кывбур, кодӧ чуксаліс лӧсьӧдны виль олӧм. Нӧбдінса Виттор жӧ лӧсьӧдіс подув коми театрлы,— та йылысь висьталӧны залын петкӧдлӧм экспонатъяс.

Революция бӧрын верстыӧ и томулов пӧвстын колӧ вӧлі нуӧдны ыджыд удж грамота да культура паськӧдӧм могысь. УОНО бердын (Усть-Сысольскса народнӧй образование юкӧн) В.Лыткин, А.Маегов, А.Цембер, В.Молодцов, И.Чисталёв да мукӧд котыртісны сідз шусяна «коми комиссия», кодлӧн медшӧр могӧн вӧлі лӧсьӧдны йӧзлы да школаяслы литература. «Коми комиссияса» членъяс йылысь висьталӧны экспозиция-вывса снимокъяс.

1920-ӧд воӧ воссис коми небӧг лӧдзанін. Медводдзаӧн петіс В.А.Молодцовлӧн «Лыддысьны велӧдчан» небӧг, сӧсся ӧта-мӧд бӧрсяыс петісны велӧдчанінъяслы учебникъяс, коми гижысьяслӧн небӧгъяс, кывкудъяс да с.в. Залын петкӧдлӧма и медводдза коми небӧгъяссӧ, и медводдза коми журналъяссӧ. Бара жӧ снимокъяс пыр эм позянлун тӧдмасьны коми гижысьяслӧн котыр сӧвмӧмкӧд.

1920-ӧд вояс помӧ чужӧны висьтъяс, литератураӧ локтӧны том йӧз, на пӧвстын И.Изъюров, И.Пыстин, П.Шеболкин, Я.Чупров, И.Симаков, Г.Фёдоров, В.Юхнин, В.Латкин да мукӧд.

1930-ӧд вояс пансигӧн виль идеологияӧн веськӧдлысьяс кутӧны мыжавны унджык гижысьсӧ сыысь, мый найӧ быттӧ оз гӧгӧрвоны Октябрьскӧй революциялысь донсӧ, оз чуксавны йӧзӧс виль олӧмланы, а босьтӧны кадлы лӧсявтӧм, посни да ковтӧм темаяс. Гижысьясӧс да налысь гижӧдъяссӧ (Илля Васьӧс, Нӧбдінса Витторӧс, Тима Веньӧс, Жугыльӧс) кутӧны быд ногыс пинявны-увтыртны, а сӧсся и мыжалӧны. Ковтӧмӧн шуисны и К.Жаковлысь гижӧдъяссӧ. 1937-ӧд воӧ унджык гижысьсӧ йӧртӧны кӧрт сутуга сайӧ, на пиын вӧліны и томъяс.

Экспонатъяс пиысь петкөдлөма В.Савин архивысь сьёлөм вөрзьөдана кык письмө. Воддзасө гижлөма театра уджалысь-яслы дзескыдинө пуксьөдтөдзыс на. Мөдсө Савин ыстылөма горт-саясыслы ылі Сибирсянь, сэтчө сійөс нуисны 1943-өд вося февраль төлысьö. Тайö письмөясыс висьталöны Нёбдинса Вит-торлөн бөръя шог олан вояс йылысь.

Экспозицияын петкөдлөма уна шензьөдана документ В.И.Лыткин (Илля Вась) да Н.П.Попов (Жугыль) архивъясысь. Найö висьталöны гижысьяслөн 1920-1930-өд вояся велөдчөм да олөм йылысь.

Снимокъяс да документъяс отсөгөн позьö төдмасьны В.Т.Чис-талёвлөн (Тима Веньлөн) уджөн да олөмөн.

Музейлөн витөд залса экспонатъяс висьталöны Великөй Отечественнөй война кадся коми литература йылысь, гижысь-фронтöвикъяс йылысь, гижысьяс йылысь, кодъяс война кадö уджа-лісны тылын. Экспозициялысь юкөн сиöма войнабөрся литера-тура сөвмөмлы.

Война вояс лоины кузь да шог воясөн и налы, кодъяс тыш-касисны фронт вылын, и налы, кодъяс вөліны тылын. Коми гижысьяс пиысь кызь көкъямысөн мунісны тыш вылө, дас квайтөн бөрсө эз воны. Ставныс найö вөліны томось, торъялісны сөмын енбинас. Усьөм гижысьяс войнаөдз вөліны журналистъя-сөн, налысь гижөдъяссө позьö вөлі аддзыны газет-журналъя-сысь, унджыкыслөн торъя небөгъяс эз на петавны. Усьөмаяс пөвстын вөлі и енбиа поэт А.П.Размыслов. 1941-өд вося лөддза-номъя төлысьö, война пансытөдз на, сылөн петіс «Медводдза любов» небөг, коді лои медводдзаён и медбөръяён. Война воясö ёнджыка сөвмис кывбур гижөм. Тышъяс костын ассьыныс ги-жөдъяссө лөсьөдісны И.Вавилин да С.Попов. Позьö шуны, налөн поэзияыс быдмис да ёнмис вир кистана воясö, а медводдза не-бөгъясыс — И.М.Вавилинлөн «Ни öти шаг бөрö» (1942) да «Сө-ветскөй воин» (1944), С.А.Поповлөн «Фронтөвөй туй» (1945) — петісны тайö сьөкыд кадас.

Война кадö чужисны тшөтш прозаа гижөдъяс. Войвылын тышкасигөн окотапырысь лөсьөдіс висьтъяс, очеркъяс да новел-лаяс Иван Изъюров, сылысь уджъяссө тшөкыда йөзөдлісны фронтвывса газетъясын. Илья Пыстин ассьыс сьёлөмкылөмъя-ссө да мөвпъяссө висьталіс дневник лист бокъяс вылас. Тылын гижисны очеркъяс, повесьтъяс да пьесаяс В.Юхнин да Я.Рочев, Н.Дьяконов да С.Ермолин.

1930-1950-өд воясö йөзлысь культура кыпөдөмын ыджыд удж нуөдісны Республикаса драма театр да лагеръясын чужөм театр-са котыръяс, сценааяс вылын вөлі пунктöма кадлы лөсялана уна спектакль. 1940-өд вояс помын да 1950-өд воясö паськыда лоины төдсаөсь Н.Дьяконовлөн «Свадьба приданөйөн», В.Лека-новлөн «Сиктса рытъяс», А.Ларевлөн «Льөм пу дорын аддзысь-лөмъяс» пьесаяс; В.Юхнинлөн «Алөй лента» да «Тундраса бияс», Я.Рочевлөн «Кык друг» романъяс.

Война вояс йывсьыс экспозицияын висьталöны А.Размыслов-лөн, В.Елькинлөн, Г.Фёдоровлөн, И.Изъюровлөн фронтвывса письмөяс да гижөдъяс, И.Пыстинлөн дневникын пасйөдъяс, сідзжө петкөдлөма гижысьяслысь көлуй: А.Размысловлысь ги-тара, В.Елькинлысь гудөк, Г.Фёдоровлысь шынель, П.Доро-

нинлысь планшет, И.Пыстинлысь гижод лосьодан машинка да портфель. Экспозиция тодмодас тылын уджалысь М.Лебедевлөн, В.Юхнинлөн, Я.Рочевлөн, Н.Дьяконовлөн да С.Ермолинлөн архивса снимокъясён, ки помысь лосьодом гижодъясён да небогъясён, кабалаясён да наградаясён.

Онїя кадся литература экспозицияыс зэв аслысполос: шойчан пельос нога. Тані позьё босьтны небог да тодмасыны



В.Юхнинлөн, Г.Фёдоровлөн, Я.Рочевлөн, С.Поповлөн, И.Тороповлөн, Г.Юшковлөн, А.Ванеевлөн, В.Кушмановлөн, Н.Мирошниченколөн, В.Тиминлөн, Н.Куратовалөн, П.Столповскийлөн, Е.Габовалөн, Г.Бутыревалөн, Е.Козловалөн, А.Поповлөн да миян республикаса уна мукод гижысьлөн геройяскод, гашкө, олыштны накөд да мөвпалыштны онїя олөм йывсьыс.

Музейлөн экспозицияын быд залын торья темаон мунө коми, роч, финн-йöгра да суйöрсайса кывъяс вылө вуджөдом. XIX-öд нэмын И.Куратов вуджөдис коми кыв вылө А.С.Пушкинлысь да уна мукод поэтлысь кывбуръяссө. 1920-1950-öд воясö роч да суйöрсайса литература коми кыв вылө вуджөдисны В.Савин, В.Чисталёв, В.Лыткин, П.Доронин, И.Изъюров, Г.Торлопов, А.Размыслов, Г.Фёдоров, В.Елькин, Д.Конюхов да мукөд. Тайö гижысьяс отсөгөн музейлөн залъясысь ми вермам аддзыны небогъяссө роч классикъяслысь, совет вояс кадся да суйöрсайса гижысьяс А.С.Пушкинлысь, И.С.Тургеневлысь, Н.В.Гогольлысь, Л.Н.Толстойлысь, С.А.Аксаковлысь, А.П.Чеховлысь, А.М.Горькийлысь, М.А.Шолоховлысь, В.Гюголысь, Г.-Х.Андерсенлысь, Дж.Лондонлысь да мукөдлысь. Медводдзаысь коми гижөдъяссө роч кывйö вöлі вуджөдома 1930-öд воясö. Сэки жö Москваын рочон коми гижөдъяс петисны «В парме», «Поэты коми» да «И.А.Куратов. Стихи» небогъясын. 1950-1970-öд воясö роч вылө лой вуджөдома Н.Дьяконовлысь, В.Лекановлысь да А.Ларевлысь пьесаяс; В.Юхнинлысь, Я.Рочевлысь да Г.Фёдоровлысь романъяс; С.Поповлысь, А.Ванеевлысь да В.Тиминлысь кывбурчукöръяс; Г.Юшковлысь, И.Тороповлысь, П.Шаховлысь, Н.Куратовалысь, Е.Рочевлысь гижөдъяс. Онї коми республикаса гижысьяс ёна йöздöчöны оз сöмын финн-йöгра, но и мукөд суйöр-

сайса кывъяс вылын. 1989-öd воын медводдза коми поэт И.А.Куратовлön «Менам муза» кывбурыс петіс торъя небөгön 49 кыв вылын.

Литературнöй музейлön удж пыр паськалö, сöвмö. Уджалысьяс оз сöмын дасьтыны да нуöдны экскурсияяс, но и вöчöны ыджыд туялан удж: тшöкыда пырöдчöны конференциясö, лöсьöдöны докладъяс, йöзöдöны гижысьяс йылысь статьяяс.

2018 воын петіс музейса уджалысьясöн лöсьöдöм небөг. Сійöс сійöма война вылын усьöм коми гижысьяслы. Чайта, регыдъя кадön лоö дась гижысь-фронтöвик И.М.Вавилинлы сійöм небөг.

Музей топыда уджалö гижысь котыркöд, Коми наука шöринлön кыв да литература институткöд, культура учреждениеяскöд. Гижысьяскöд öтув музейын тшöкыда овлöны литература рытьяс комиön да рочön.

Öнiя Литературнöй музей тöдса абу сöмын Комиын, но и Россиялön уна пельöсын. Тшöкыда музейö пыралöны Санкт-Петербургсь, Москваысь, финн-йöгра республикаысь гöсьтъяс, найö окотапырысь тöдмасьöны кыв да литература сöвмöмкöд да пыр тöдчöдöны, мый став петкöдлöмторйыс зэв колана да интереснöй.

Музейлön медшöр могыс паськöдны волысьяслысь коми кыв да республикаса литература йылысь тöдöмлунсö, бура видзны коми кыв да гижысьяслысь нимъяссö.

Снимокъяс вылын:

1. Литературно-мемориальнöй музей. Т.А. Чисталёва нуöдö медводдза экскурсия. 1969 вося июль 18-öd лун.

2. Сухановгьяслön керка.

3. Гижысь-фронтöвикгьяслön рöдвужыс И.А.Куратовлön Литературнöй музейын. 2012 во.

4. Öнiя кадся экспозиция.



Сьölöмсянь чолöмалам И.А. Куратовлön литературнöй музейын уджалысьясöс музейлы 50 во тырёмön! Сiam и водзö лоны ставлы татшöм жö коланаön да водзö ёртасьны миянкöд!



Коми поэт Иван Куратов да Пишпекын медводдза кыргыз школа восьтөм*

1982 вося февраль-мартын ветлі научной командировкао Алма-Атао, Казахской ССР-са Государственной шор архивысь коми литературалы подув пуктысь И.А.Куратовкод йитчөм документъяс корсьөм могысь. Сэни меным сюрисны материалъяс, кодъяс серти Куратовлөн Туркестанын олөмыс воссис дзик выльладор боксянь. Военно-судебной чиновникалом (аудиторалом), стрөитчөмын торъя поручениеяс кузя чиновникалом, Семиреченск обласьтса губернаторлөн торъя поручениеяс кузя чиновникалом, а сідзжө поэзия да коми войтырлысь история да финн-йöгралысь кыв туялом, ставыс тайö падмөдіс Куратовос Туркестанса войтырлысь оласног, кыв да обичакөд бура төдмасьöмысь**.

Век жö Казахской ССР-са Госархивын кольөма «Об устройстве школы для киргизских мальчиков в Токмаке и Пишпеке» делö, кытысь тыдовтчö, мый и И.А.Куратов зильөмөн восьсьывлөма кыргыз челядьлы медводдза школа.

1870 воын на Семиреченск обласьтса Токмак уездысь кыргызъяс шыөдчывлөмаөсь роч колония администрацияö Токмакын ли Пишпекын кыргыз челядьлы школа восьтөм йылысь корөмөн. Школаас көсйөмаөсь велөдны роч да татары грамота (роч ни кыргыз букваръяс абу на вөлөмаөсь), öтувъя история, география, арифметика, кипод уджъяс, сиктса уджъяс, шуам, сад вөдитөм да ветеринария. Кыргыз челядьöс шүөма вөлі велөдны и Роч империялөн законъясö.

Тайö школасö кутөм вылө Токмак уездысь кыргыз вөлөсьтса олысьяс көсйысьөмаөсь чукөртны быд кибиткасянь (юртасянь) дас эзысь урөн. Медводз сьөмсö чукөртөмаөсь Теспей, Сарыбагниль, Ала-Аргин да Ана-Медин вөлөсьтъясысь, а сэсся и кольөм дас кык вөлөсьтсаяныс та йылысь мирса приговоръясыс воөмаөсь.

Роч власьтъяс гөгөрвоөмаөсь, мый татчөс администрацияын да школаясын ковмасны татчөс кадръяс жö. Семиреченск обласьтса генерал-губернаторлы отсасысь Росицкий та йылысь гижөма: «О желаний киргиз Токмакского уезда было доведено

* *Петалис рочөн: Куратовские чтения, Т. 5, Сыктывкар, Коми книжной издательство, 1989, 75-80 л.б. Пишпек öнйя ногөн —Бишкек.*

** *Збыльысьö И.А.Куратов Туркестанас уджалыгас велөдіс араб, кыргыз (сэки: кара-кыргыз) да казах (сэки: кайсак-кыргыз) кывъяс, шыльөдіс асьыс татары кыв төдөмсö, кодöс велөдіс Казанын аудитораыс велөдчигас на (ред.).*

до сведения Главного Начальника Туркестанского края, который, вполне одобряя возникающее стремление к грамотности, выразил желание, чтобы это благое дело было основано на прочных и верных началах. Посему приказать составленный и рассмотренный военным Губернатором проект устройства школы на его утверждение» [ЦГА Казахской ССР, ф. И-44, оп. 1, д. 21204, л. 33].

Но школа воссьом воысь-во нюжаліс, кызвыннас татчөс чинаяслөн мөжгөм да велөдан уджсө гөгөрвотөм понда. Сідз, Токмак уездса начальник 1873 вося август 16 луно юөртлөма генерал-губернаторлы, мый квайт вөлөсьтса кыргызъяс чукөртөмаөсь школа вылас 534 шайт 30 ур, да сьөмыс куйлө уездса управлениеын ковтөг. Сійө жө рапортас начальникыс вөзийө тайө сьөмсө удждавны «бур йөзлы» прөчентъяс улө.

Семиречьеса роч власьтъяс босьтчисны школа уджас сөмын 1874 во пансигөн. Медсьөкыдторнас лоис колония администрацияын уджалысьяслы (кызвыннас офицеръяслы да военнөй судьяяслы) кыргыз школалы устав лөсьөдөмыс. Пишпекын либө Токмакын кыргызъясөс сөвмөдан школалы Устав гижны сетісны Семиреченск обласьтса велөдчан заведениеясын юралысь, коллегияса асессор Галицкийлы. 1874 вося июнь кезлө сійө пунктис комиссия ныр улө нелямын статьяа устав. Проектас вөліны и котыртан юкөн (рөскодъяснас и пом), и велөдчан программа.

1874 вося июнь 28 луно Проектсө видлалісны Семиреченск обласьтлөн правление вылын. Галицкийлөн проектын вөлі зэв уна тырмытөмтор, да сійөс шуисны «зэв веркөсаөн». Присутствие постановлениеын индісны бөр сетны Галицкийлы шыльөдөм вылө, мед гижысьыс пыртас сэтчө юклөмөн кыздз, унаө да кор велөдчысьяс кутасны төдмасьны кипом уджъясөн, садоводствоөн, му вөдитөмөн, ветеринарияөн да мукөд искусствоөн.

Шыльөдыштөм проектис 1874 вося ар помнас воис Туркестанса губернаторствоөдз, Ташкентөдз, көні сәки Туркестанса начальникөс, генерал-адъютант К.П.Кауфманөс, вежис Семиреченск обласьтса военнөй губернатор генерал-лейтенант Г.А.Колпаковский. Колпаковский тшөктөма ещө на шыльөдыштны да ноябр 1874 вося 28 луно косөдөма Уставсө Семиреченск обласьтса военнөй губернатор Россицкийлы, кодлөн уджыс, тыдалө, лов вылас абу воөма. Скөрмөм Россицкий сылөн индөд вылө стрөга гижөма: **«Исполнить немедленно и сообщить это в копии с копиею устава г-ну Галицкому. В уставе сделать по сему изменения. Этим делом, если кто не умеет, прошу заняться г-на Куратова при содействии советом г-на Начальника отделения!»** [ЦГА Казахской ССР, ф. 44, оп. 1, д. 21204, л. 60]. Тадзи И.А.Куратовлы мойвиөма помөдз шыльөдны Токмакса ли Пишпекса кыргыз челядьлы школа Уставсө.

Абу эськө первөйсө көсийөмаөсь дзерөдны И.А.Куратовөс, кодлөн и сідз уджыс вөлөма юр выв тырыс. Аслас быдлунъя удж кындзиыс сійө сәки нуөдөма, сідз шусяна, «Эманлысь делө», зэв дзуг да сьөкыд, кодлөн йөлөгаыс кывсьывлөма абу сөмын Верныйөдз да Ташкентөдз, но и Петербург шызьөдлөма. Сэсся 1874 онас Куратовыд зэв нин өна висьөма.

Но Россицкий бөрийөма Куратовөс сы понда, мый форму-

ляръяс* сертиыс Иван Алексеевич велөдлөма аудиторавтөдзис Усть-Сысольскса приходскөй училищевин некымын во. Сэсса и кызд инородечлы** да инородечьяслы школаын уджавлөм мортлы ачыс Енмыс шуөма ноксыны национальной школа восьтөмнад.

Куратов өдйө да сьөлөмсянныс вөчөма воясөн кыссьөм тайө уджтө, коді, дерт, лов сертиыс сылы вөлі. Россицкийлөн резолюцияыс вөлі гижөма 1874 вося декабр витөд лунө, а 1875 вося январ мод лунө нин канцелярияса секретар Д.Катаев вылас пасйө: «Примитөма Куратовсянь». Коми гижысьлы ковмөма төлысьысь этшаджык, мед пырөдчыны педагогика да школа котыртан уджө да помөдз вайөдны документсө, код серти Пишпекын и воссис кыргызьяслөн медводдза школа. Документсө вайөдам вежлавтөг:

**Военный губернатор
Семиреченской области
23 января 1874 г.
г. Верный
О Токмакской
киргизской школе**

**Господину
Заведующему учебными
заведениями
Семиреченской области
Исправляющий должность
Туркестанского Генерал-
Губернатора предписанием от
28 ноября**

минувшего года за № 4979 дал мне знать, что представленный мною при рапорте от 28 сентября за № 3469, проектированный Семиреченским областным правлением устав воспитательной киргизской школы, утверждён им со следующими дополнениями:

1. Школа должна быть построена в Пишпеке.
2. Учителю назначается жалование в 600 рублей при готовой квартире, для того, чтобы к этой важной обязанности можно было пригласить человека действительно полезного.
3. На содержание каждого воспитанника полагается 75 рублей в год.
4. Число воспитанников ограничивается на первый раз 15-ю.

Сообщая об этом Вам, Милостивый Государь, и препровождая при сем в копии устав школы, исправленный согласно указаний, сделанных Исправляющим должность Туркестанского Генерал-Губернатора, предлагаю озаботиться принятием мер к возможно скорейшему открытию школы, в наёмном помещении до постройки дома, приобрести для школы мебель, учебные пособия и пригласить учителя и о том, что Вы предпримете, по совещании с находящимся здесь Начальником Токмакского уезда полковником Лисовским, который гасст Вам нужные генежные средства, а также и о времени, когда школа может быть открыта, не оставьте мне сообщить для соответствующих распоряжений.

* *Формуляр — өнія ног кө, и послужной список, и характеристика, мыйкө «Трудөвөй книжкаын» гижөдьяс сяма (ред.).*

** *Комиясөс, эськө, инородечьяснад эз ёна шулыны, но Россицкий код-дөмдылы, тыдалө, өткодь вөлөма, мый Роч империялы подув пуктысьяс лыдысь «зыряна», мый Туркестанса колонизируйтан войтырьяс (ред.).*

При этом я не могу не заметить, что в программе предметов, предположенных к преподаванию в школе, не говорится ничего о преподавании киргизского языка и письма. Преподавание этого предмета в туземной школе, очевидно, не должно быть исключено — что и рекомендуется Вам принять к сведению и руководству при открытии школы». [ЦГА Казахской ССР, ф. И-44, оп. 1, д. 21204, л. 68–69 об.]

Тайё документыс муніс Семиречьеса военнӧй губернатор Г.А.Колпаковскийсянь, вӧлі кырымалӧма сылӧн отсасысь Россицкийӧн да юклан юкӧнса начальник Монастырскийӧн, но предписаниеыслӧн збыль авторнас вӧлі И.А.Куратов. Стӧч сылӧн шылӧдӧм бӧрын документыс вӧлисти шогмис.

Дерт, Куратов артавтӧг эз ов К.П.Кауфманлысь да Г.А.Колпаковскийлысь индӧдъяссӧ. Куратовлы вӧлі ӧткодь, Пишпекын али Токмакын восьтыны школасӧ, но сійӧ, ӧти-кӧ, кывзысис Кауфман совет дорӧ, мый «школасӧ колӧ восьтыны Пишпекын». Тӧдіс эськӧ Куратов, мый школа восьтан мӧвпыс чужис Токмак уездын, мый стӧч сійӧ уездса вӧлӧсьтъясыс медводз чукӧртисны школа вылас сьӧмсӧ. Но, мӧд-кӧ, тӧдіс и сійӧс, мый Токмак уездса начальник полковник Лисовский петкӧдліс асьсӧ мисьтӧмладорсянь. Ӧти кадӧ чукӧртӧм нин сьӧмсӧ кӧсьйивліс лӧдзны ссудаяс вылӧ. Артмис кӧ сы ног, кыргыз школа лӧптӧмыд эськӧ нюжаліс код тӧдас на кутшӧм кадъясӧдз, а гашкӧ, и дзикӧдз дудіс. «Об устройстве школы для киргизских



мальчиков в Токмаке или Пишпеке» делӧ материалъясысь Куратов бура гӧгӧрвоис, мый Лисовский быд ногыс падмӧдӧма школа восьтӧмсӧ, да, дерт, Лисовский кийсь сьӧмсӧ Куратов вуджӧдіс Пишпек уездса начальниклы.

Учитель удждон индӧгас Куратов бура жӧ думыштчывліс. Усть-Сысольскын велӧдігӧн ачыс Куратов босьтліс жалӧванньӧсӧ 120 шайт онас. Эз лышкыдасыны и Верный карса чиновникъяс. Воддза проектас велӧдысьыслы вӧлі индӧмаӧсь сӧмын куимсӧ шайт во кежлас. Видзӧдлыны кӧ, особӧй поручениеяс кузя чиновниклы сӧки вештывлісны 1200 шайт, юкӧнӧн веськӧдлысьылы — 2000 шайт, а Военнӧй губернаторлы — 7000 шайт эзысьӧн.

Куратов төдчөдiс, мый велөдысь удж вылас колө корсьны збыль колана да сяма мортөс, да синiс сылань, мед велөдысьлы удж-донсө сетасны 600 шайт, а сы дорө содтөд и дась шоньд да югыд патера на.

Содтiс и кыргыз челядьöс видзöм вылө сьöмсö во кежлас 60 шайтсьянь 75-öдз, мед челядь вöлины пötöсь да кöм-пасяöсь. Та ради, дерт, ковмис велөдчысь лыдсö чингыны кызьсьянь дас витöдз, но Куратов бура помнитiс аслас велөдчан кадся тшыг нисьö пöt олöмсö да корысялöмсö.

И век жö, медся главнöйнас, мый пыртiс документас Куратов, вöли индöд, мед кыргыз челядьлы сетасны кыргыз кыв вылын грамота. Воддза устав проектьясас кö мыччысьлысны на мöвпьясыс, мед кыргыз кывсö велөдны татаралөн букварьяс да велөдчан книгаяс кузя, Лисовскийөн да Галицкийөн лöсьöдöм проектьясас кыргыз кывсö вöли киритöма велөдчан программасьыс. И.А.Куратов, кодi, стрöжитöм вылө видзöдтöг, аснаукөн велөдлiс Усть-Сысольксса челядьöс комиөн, и тан эз сетчы. Неуна водзджык нин чужан кыв йывсьыс И.А.Куратов гижлiс: *«Когда есть народ, то ему нужно образование, познания же ему можно передать через его же язык. Нам нет дела до будущей участи этого языка, мы должны им пользоваться теперь, потому что он теперь-то есть единственный орган распространения знания».*

Куратов пыксис да нырис асьыс, и кыргыз челядьлы программаö дзик сылөн зильöмөн пыртiсны кыргыз кыв велөдöмсö. Туркестанын коми поэтлөн да велөдысьлөн артмис сiйö, мый эз тырвыйö артмы коркö Коми муын, усть-сысольксса коми челядьöс велөдiгас.

Дерт, оз позь вывтiасьны, вывти лэптыны И.А.Куратовлысь кыргыз челядьлы Пишпекын школа восьтöмас пайсö, но и сiйö, мый вöчис, зэв нин ыджыдтор: XIX нэмся Шöр Азияд унджык вылө и надейтчыны вöли нинöм.

Комиöгiс Олег УЛЯШЕВ.

Снимок вылын:

Пишпекса медводдза школаясысь öти, 1900-öд вояс заводитчöм. Снимокыс Интернетысь, www.tourkg.com сайтысь.



Иван КУРАТОВ



Коми бал

КЫВБУРЪЯС

Коми бал

Со кӧн балыс вӧлӧм!
Тані абу ӧлӧм
Нинӧкодлы лоны —
Мыйла нӧ не воны!
Татӧн быдся пырысь
Пыдди пуктӧм, гырысь...
Гашкӧ, кодкӧ повзяс
Шунысӧ, мый ковзяс!..
Кӧсьяс, кага бӧрддзас,
Мам кӧть кулак гӧрддзас!
Паччӧр-пӧлать вылын,
Труба сайын ылын
Быдсӧ гӧсьтьяс миян!
Джаджъяс вывсянь пиян
Ӧшӧдӧмны кокъяс!
Джоджным векньыд, вокъяс,
Съылысь-йӧктысьяслы.
Кӧтшасын тай — часлы —
Мед на гажа вӧлӧм.
Томмӧм пӧрысь сӧлӧм.
Юис — мый кӧть вӧчӧ —
Куим румка пӧчӧ.
Колян вынсӧ ӧктӧ,
Аддзиг йӧктӧм, йӧктӧ
Кокнас гусьӧникӧн
Рама пукалігӧн...
Эдз сэн шогасясны!
Кодыр нюжӧдчасны
Том йӧз сера гезйӧн,
Кодыр черань везйӧн
Найӧ гартчыласны,
Кодыр разӧдчасны

Торйӧн, кодыр кинас
Морта-мортсӧ дӱнас
Матӧ кыскавласныс...
А ӧд некор асьныс
Оз и торксывлыныс!
Синкуньӧм кост шыныс
Ӧвсьыліс... Мый лоис?
Нем! Зон гӧгӧрвоис,
Нывлысь чужӧм тупкис
Юрсинас — и чупкис...
Сійӧн, тӧдан, пӧтсис —
Да и бара ӧддзис!..
Чӧскӧдісны вомсӧ,
Бара виччысь помсӧ!
Йӧктӧм, шутӧв, сьылӧм!..
Сӧрни, гашкӧ, кылам!
Кысь бара! А пӧчӧ:
— Ті кӧть мый сэн вӧчӧ,
Вина этша шондіс,—
Сьывны-й ачыс пондіс!
Сӧмын нора горӧн
Артмис тай — и шорӧн
Визыв синва сьлӧн
Мунӧ пидзӧс вылын...
Шмыньялӧ пӧль, шуӧ:
«Мыля нӧ он нуӧ
Йӧктыны тшӧтш мортсӧ?
Ичмонь колис ортсӧ,
Кыдз оз эльтчы, пиӧ?
Со ӧд кутшӧм сійӧ!»
А пӧч олӧ-вылӧ,
Водзӧ бӧрдіг сьылӧ!..
1865.

Гӧсьткӧд

Лок жӧ, лок, бур гӧсь!
Видлы менсьым керка-карта
Со тӧд сурдоз, вина парта,
Чериньянӧй пӧсь...
Лок жӧ, лок, бур гӧсь!

Пуксьылам кык вок.
Медводз ачым видла-юа,
Пувваӧн ог юктӧд, шуа...
Мыччылі туй, лок...
Пуксьылам кык вок!

Нурьясь, ю, бур морт!
Яран моз ми огӧ юӧ;
Коми пыр нин юрсӧ нуӧ,
Тӧдӧ удж и горт...
Нурьясь, ю, бур морт!

Лючки сёрнитам;
Сэсса бара юам. Сідз-ө?
Кыз нин Катьотө ен видзө?
Шедысьджык нин, рам?..
Лючки сёрнитам!

Көсйи коравны,
Да тэ панйин вайны сійөс.
Өні ныв вылад нин пиөс
Колө готравны.
Көсья коравны!

Кисьты чукйөн, вок!
Миян томлун кольём ылө;
Готыръяс нин этша, кылө,
Пиньтөммөны... ок!
Кисьты чукйөн, вок!

Мыйкө шогасьлім!
Том дырйиныс менам Анө,
Тэнад Катьө... Шондібанөй!
Мыйкө гоньявлім,
Мыйкө шогасьлім!

Муніс миян нэм!
Мед ас пайсө мукөд олас!
Олас мед да лёкысь полас!
Вокө, сійө-й эм!
Муніс миян нэм!

Енмыс мед оз вун!
Гөртөгыс мед оз коль мусө,
Юысьлысь мед оз босьт русө,
Шышөн мед оз мун...
Енмыс мед оз вун!

Квайт лун удж, бур гось!
Сизимодас этша юам,
«Быд йөз лоасны мед,— шуам,—
Бурось, авъяось!»
Юыштам, бур гось!
1865. Сыктывдін.

Йөгралы

(Гижөд)

1.

Со кыз, зонмөй, сійө мөдөм!
Коми школаясын ньөр
Оз зэв швычъяв, эм көть вөр...
Чөвлы, велөдчөм и төдөм

Паськаласны регыдик
Ачыс Тимаизӧдз дзик.
Эпидемия моз найӧ
Вуджасны и Урал сайӧ!

2.

Кор ми этша школа-рок
Панялам, сэк вуджмысьт Урал
Сетам водзӧ сійӧс. Курал
Школа пыдӧс, йӧгра вок!
Мед и тэнад чорыд лысьӧм
Тӧдмалас тшӧтш школа висьӧм;
Мед и тэ, лӧк теолог,
Артасян зэв миян ног:

3.

Узьлывлӧ оз коркӧ Нума?
Весьт-ӧ-кык весьт сылӧн тош?
Ыджыд-ӧ му вылын ош?
Ош энъ Нумаыслы кума,
Соч-ӧ-пӧч? Тшӧтш видчан мед,
Коді тамугӧ оз шед,
Код дженнетӧ оз ин? Татчӧ
Ог жӧ видчытӧг туй аддзӧ!

4.

Мед и тэыс та бӧрын
Романтизмлысь тӧдан кӧрсӧ,
Мусаыдлысь нюлан чӧрсӧ,
Кодыр сылӧн сьӧлӧм кын,
И кор сійӧ — сідз нин колӧ —
Тэысь мусаджыккӧд олӧ...
Вой-вой пукав, дзугыль, виж,
Ныв йылысь поэма гиж!

5.

Мед и тэнсьыд, кор та висьӧм
Лоас ёнджык, йӧгра вок,
Сьӧлӧмшӧртӧ ёнгас лӧк...
Мыйла корысь паськӧм киссьӧм?
Мыйла оз пу кынӧмас,
Кодыр тшыгйӧн виньгыртлас?
Мед и тэ, кор тайӧс тӧдан,
Гуманизмӧн висьны мӧдан.

6.

Шогсьыд вунӧдчыв тэ сэк!
Мед кор рысялан, кор югыд
Он вӧч вылысь и он гугӧд
(Шаман, тӧд, мый бур, мый грек!),

Петан космополитö тэ,
Кыздз Германияын Гётэ,
Мича сьылан нюжодан,
Кöть и пыр на виньгыртан!

7.

Мед и тэ, кор Гёте ногөн
— Сийö вöлис ачыс пöт —
Он зэв нюжод мича вöт,
Мед и тэсö выльвыв шогөн
Вийсьыштан — и Байрон ног
Чайтлан дыр кежлö кö мог
Ас саяд быд енмöс ёрны,
Найöс лёк кось вылö корны.

8.

Мед и тэ, кор, йöграй,и,
Байронизмысь бурдны пондан,
Дыр на морöс пыткад шондан
Лöгтö шуысь вылö: «Йöй!
Медвыль енкöд эн тэ вермась
И поэт вылö эн тэрмась
Пуктысьны. Эм тэнад удж!
Паськöд сывтö, состö пудж!»

9.

Мед и тэ (пыр лоас тэкöд
Тадз жö, кыз уджысь он тшöг!)
Лёк вöсна син тупкывтöг
Серöктылан Беранжекöд,
И Барбье моз лөгасьлан,
Да и морт моз бурасьлан
Олöмыдкöд... Быд ног овлö;
Серавны и бöрдны ковлö!

10.

Мед и тэ, зон, шмыньявлан
Ас вöчöм ен вылад бура
(Мортлөн мелі тай натура!)
Кызди öнъя истукан
Гейне... Сöмын кызди рочын
Быд поэт, эн бöрд; сэн шочын
Пессимизм оз лимзы... Зон!
Эн босьт öти олöм тон!

11.

Мед и тэнад кымöс вылö,
Важ Европа ляпöдлас

Быдся ас сись измлысь пас;
Мед и тэнад этша кылө,
Кызд выль йөзлөн, вем чорзьём,
Кызь арөсөн кос висьём,
Тамышмөм; мед, йөгра-й, тэнө
Медицинаын ог венө!

12.

Мед и тэ нин вөрзъыштан,
Мед и тэнад олөм өзъяс,
Петан туйө, кодөн йөзъяс
Мунөны,— и көйялан
Накөд корсиг ассьыд шудтө,
Мед и тэ он регыд кут тэ
Сийөс бөжөдыс; а сэн
Мед и тэкөд лоас ен!
1865.

* * *

Помөдз дзугыль менө сёяс!
Төд вылө мем өні
Сьökыд кадъяс, мунан вояс
Бара воалөны.
Ывлаын швачөдчө март;
Муна ме, нарт,
Школаө көмтөг.
Школа бөр зонмыслы, дерт,
Некод оз берт
Няньторсө сьөмтөг.
Аслас, көзяинлөн, зон
Тшыг кызди пон,
Нырувсө нюлө...
«Лунтыр ми эг сөйө нур...
Енмөй, тэ бур —
Тшыгйөн ог кулө!»
Рытын ме кевмывлі сідз:
«Дзоньвидза видз
Менө Келеськөд!
Кодыр ми быдмам, оз сюр
Ми кодъяс бур —
Быдмөд и веськөд!»
Помөдз дзугыль менө сёяс!
Вежөр вылө өні
Мукөд лунъяс, мукөд войяс
Мырдөн воалөны.
Төді кө ме, төді
Олөм сэтшөм гажөн,
Эг ме эськө кевмы
Быдмөм йылысь важөн.
Сөмын мый нө өнөдз
Кувны меным оз ков?

Кыдзи надз морт быд ур,
 Лыддя ме быд воськов.
 Сылы долыдджык, мый унджык
 Лыддытөм монета...
 А ме эськө став сьом, став эм
 И минутысь сета!
 Өтарлань сувтөмны
 Сьолөм и олөм,
 Мөдарлань тувдөмны
 Кулөм и полөм.
 1875.

Рөштво дырйи

Мам

Кывзы мамтө,
 Мыччыв сямтө,
 Менам муса ныв!
 Ачyd йөкты
 Й-йөзлы тшөкты,
 Вильшась, серав, сьыв.
 Юрас думсө,
 Вомас юмсө
 Петкөд том мортлысь!
 Мед тэ бөрысь
 Гажмас пөрысь,
 Сьолөм гажөдысь!
 Югид шондi,
 Долөд, шонды
 Көдзыд муыввсө!
 Мича нылө,
 Мыччыв милы
 Кокныд олөмсө!
 Эн ло, нылө,
 Серам вылө,
 Гаж вылө тэ ов.
 Вөчөда ме,
 Козьнала ме,
 Тэныд пукта лов.
 Лоан мөмөт,
 Ме ог көмөд,
 Руч ку пась ог сет;
 И ог пөрьясь,
 И ог бөрйысь,
 Йөйнөш сайө пет!
 Ыджыдлуно
 Йөзө муна
 Гөгөр, ыліті,
 Мед он пыртө
 Гозья мырдөн
 Ош гуаныд ті!
 1875.

Гуговлөн

Кызд быд морт, вөлі ме поэтөн,
Кор дас вит арös тырис мем;
Сэн лои мывкыдджык, а сэтөн
Поэтлөн овсис дженъыд нэм.
Кызь арösөн ме пыр на сьылі,
Да мөд гор сэк нин лолысь кылі.
Дыш бордйысь рифма оз нин чуж,
Ме вунөдчыны ог нин куж...
Ог пыр кут чорыд кылысь асös
И торкла долыд сьылысьясös.
1862.

Гуговлөн

Унаысь пондылі олөм ме ёрны,
Енвевтысь дугдылі бурсö нин корны;
«Пуктысьны нем вылө!» — йөзлы ме шулі;
Йөзлысь и асьым ме шудлун сідз гулі.
Бөртіджык бурсины понді ме мамлы;
Сэссия ме аддзи — бур чой-воклы колö;
Кевми ме сэн, мед быд йөзлы шуд волö...
Оз сет ен ёрсьыны дыр Валаамлы!
1865.

Гөсьтъяс

(Гуговлөн)

Мича гөсьтъяс чукөртчисны,
Кияснысö чабралісны,
Морта-мортлы шмыньялісны...
Бара аддзысьөдөм ен!
Муза, радлөмныс мый сэн!

Олас, тырмас... Мый сідз? Дыр-ö?
Абу кагаяс нин! Жырö
Тшайөн астрапель-ныв пырö...
Быдсөн лючки пуксьöны
Сөрөмтъяснас юксьыны.
1865.

Менам муза

(Гугов тетрадьысь)

Менам муза
Абу вуза:
Базар вылө виршъясös ог ыстö,
Ньöбысьясös виччысьны ог лысьтö...
Гусьöникөн
Сьывлам кыкөн;

Ичотик фальш ас костын коть петас,
 Коді сійö фальшлы нимсö сетас?
 Ас кежын ми серавламö сійöс
 И тетрадьöн дiнысь
 Югыдджыка биöс
 Öзтылам каминысь...
 Регыд видламö и йöз водзын ми киöс,
 Регыд босьтам ёнджык тема,
 Мед поэма
 Петкöдлас ханжаöс,
 Лёка паськыд паськöмаöс,—
 Паразитöс, кодi йöзысь гырысь
 И код гöрд йöз вирысь,—
 И бур йöзсö, кодъяс öнi
 Оліганыс кынмöны и тшыгъялöны,
 А быд шудсö кулöм бöрсыйс виччысьöны...
 Менам муза
 Оз ло вуза!
 1866. [1867]

Гуговлöн

Кутшöм коми виршъяс
 Сета тэныд рама?
 Ода-ö Стефанлы,
 Кодысь пышйö Пама?

Эпос-ö, кызд Ягморт
 Важöн овліс-вывліс,
 Кепысь пöвнас йöзлы
 Шондi тупкывывліс?

Колö-ö легенда,
 Кыдзи вöліс виöм
 Коми Михаил князь,
 И кызд абу сиöм

Сылы мöдысь кувны?
 Гашкö, тэ зэв долыд,
 Йöктан сыланкылысь
 Гажмö шуда лолыд?

Гашкö, зiля корсян
 Трагикöс? Со видзöд
 Коми йöзöс; кызди
 Синватö оз пычöд?

Сэн быдсöнлы
 Сьöлöм серти волö...
 Со тай сійö — лыдды,
 Кор сатира колö.
 1870. *Капал.*

Гуговлӧн

Важӧн узыӧ сылӧн мывкыд,
Дзуглясьӧ пыр сылӧн сьӧлӧм.
Суйӧ сылы пель пытшкас ті
Императорлысь капелла,
Мӧд пеляс оркестръяс лэдзӧ,
Ворсасны мед ӧтпырйысьӧн
Вагнерысь и Оффенбахысь —
Сийӧ пондас важ ног узыны!
Нырборд вылас Цицеронӧс,
Мӧд вылас Сократӧс лэптӧ,
Мед на юр пыдӧсьяс вылӧ
Вожасяс Брадло и равзас
Индия и вичко йылысь —
Сийӧ дзугыльмас тай важ ног!
(1874—1875).



ПЫДДИ ПУКТАНА АВТОРЪЯС!

Редакцияӧ гижӧдъяснытӧ ыстігӧн быть колӧ юӧртны:

1. Ассыныд ним, вич, ов; кор да кӧні чужлӧмныд (лун, тӧлысь, во).
2. Паспорт юӧръяс: номер, серия, кор да кӧні сетісны, гортса адрес (прописка серти).
3. Индивидуальной налогӧвой номер — ИНН.
4. Страховӧй свидетельство номер.
5. Банкын счѣт реквизитъяс.

Тайӧс юӧрттӧг редакция гонорар оз вешты.

*Журналын йӧзӧдтӧм гижӧдъяс
редакция оз рецензируют и авторыслы найӧс оз мӧдӧд.
Редакция оз век во ӧти кывйӧ авторъяскӧд.*

Компьютерный набор — **Н.Кузнецова.**

Учредители: Администрация Главы Республики Коми,
«Союз писателей Республики Коми» — региональное отделение общероссийской
общественной организации «Союз писателей России».

Издатель: АУ РК «Издательский дом Коми». Директор Орѣл И.Н. Адрес издателя: 167982,
ГСП-2, Республика Коми, г. Сыктывкар, ул. Карла Маркса, д. 229, Дом печати.

Адрес редакции: 167982, ГСП-2, Республика Коми, г. Сыктывкар, ул. Карла Маркса, д. 229, Дом печати. Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

E-mail: kodzuv@mail.ru; Сайт: www.komimu.com

Подписано к печати 12.07.2019. Дата выхода в свет 26.07.2019. Формат 70x108^{1/16}. Печать офсетная. Усл. печ. л. 7; усл. кр.-отг. 8,4; учѣтно-изд. л. 7,54. Тираж 375. Заказ № 19-6010. Регистр. ПИ № ТУ11 - 00347 от 24.03.2017 г. выдано Управлением Федеральной службы по надзору в сфере связи, информационных технологий и массовых коммуникаций по Республике Коми. Публикация материалов на социально значимые темы осуществляется за счет субсидии, предоставленной Администрацией Главы Республики Коми из республиканского бюджета Республики Коми. Отпечатано в ООО «Коми республиканская типография», 167610, Республика Коми г. Сыктывкар, ул. В.Савина, д. 81. Цена свободная.

Изьва. «Луд» гаж



Снимокъясыс Алексей Полугрудвлөн.

